

लूकां च्वःगु भिंगु खँ म्हसीका

लूकां च्वःगु भिंगु खँय् येशू यहदीत व संसारया फुक्क मनूतयत् मुक्ति बीम्ह ख्रीष्ट खः धकाः क्यनातःगु दु। थ्व सफुलिइ यशैया अगमवक्तां परमेश्वरं छवयाहइतिनि धाःम्ह मनू “जि हे खः” धकाः प्रभु येशू थःम्हं हे धयादीगु दु। अले थुकी वयक्कलं “मगाःमचाःपिन्त भिंगु खँ न्यंकेत” परमप्रभुयागु आत्मां जितः ल्यायादीगु खः धकाः नं धयादीगु दु। उकिं थ्व भिंगु खँय् ग्वाहालि मालाच्चं पिं मनूतयगु खँ न्ह्यथनातःगु दु। नापं थुकी लयतायेगु खँय् नं बःबियातःगु दु। अथे हे प्रार्थना यायेगु, मिसातयसं वयक्कःयात ग्वाहालि यायेगु, पापीतयत् परमेश्वरं क्षमा यानादीगु व पवित्र आत्मायागु खँय् नं अप्वः बःबियातःगु दु। व छम्ह यहदीमखुम्ह डाक्टर खः। व यहदी मखुसां पुलांगु नियमया खँ बांलाक स्यू। अथे जुयाः वं अप्वः यानाः भजनसंग्रहया सफू व यशैया अगमवक्ताया खँ न्ह्यथनातःगु दु।

मत्ती, मर्कस व यूहन्नां च्वःगु भिंगु खँय् मदुगु खँत नं थुकी दुथ्याकातःगु दु। गथेकि — जकरियायागु खँ, येशू बूबलय् स्वर्गदूततयसं भजन हाःगु व फैजवाःतयसं स्वःवःगु, मचा येशू देगलय् त्वःफ्यगु अले भिंम्ह सामरी व तंम्ह काय्यागु उखान।

थ्व सफू ई.सं. ६५ निसें ७० पाखे च्वःगु जुइफु।

धलः पौ

न्ह्यखँ १:१-४

येशू व बप्तिस्मा बीम्ह यूहन्ना बूगु १:५-२:५२

बप्तिस्मा बीम्ह यूहन्नायागु ज्या ३:१-२०

येशू बप्तिस्मा काःगु व वयक्कःयात जाँचय् याःगु ३:२१-४:१३

गालीलिय येशूयागु ज्या ४:१४-९:५०

गालीलं येशू यरूशलेमपाखे झाःगु ९:५१-१९:२७

दकलय् लिपायागु वालय् येशू यरूशलेमय् १९:२८-२३:२६

येशू हाकनं म्वानाझाःगु व स्वर्गय् थाहां झाःगु २४:१-५३

लूका

1 यःम्ह थियोफिलस,

जिमिगु न्ह्यःने जूगु खँ ला यक्वसिनं हे च्वःगु दु।

2 शुरु शुरुनिसें थ्व खँ खंपिन्सं व न्यंका जूपिन्सं जिमित कना थकूगु गथे खः अथे हे च्वयाच्चना।

3 हनेमाःम्ह थियोफिलस, थ्व खँ नं जिं शुरुनिसें बांलाक सीका थुइका तयागुलि छितः कथंहंक च्वयेगु हे बांलाः ताल।

4 छिं न्यनादी धुकूगु खँ बांलाक थुइकाः सत्य म्हसीके फयेमा धकाः जिं छितः च्वयाच्चनागु खः।

बप्तिस्मा बीम्ह यूहन्ना बुइ धकाः धाःगु

5 यहूदियाय् हेरोद जुजु जुयाच्चंबलय् अबिया कुलयाम्ह जकरिया धाःम्ह छम्ह पुजाहारी दु। एलीशिबा धाःम्ह वया कलाः नं अथे हे हासून पुजाहारीया कुलयाम्ह खः।[☆]

6 इपि निम्हं परमेश्वरया न्ह्यःने धर्मीपिं खः। इपिं व्यवस्था फुक्कं मानय् याइपिं खः। उकिं इमित छुं धायेथाय् मदु।

7 इमि मस्त मदु, छायाःसा एलीशिबा थारिम्ह मिसा खः। अले हानं इपिं निम्हं बुराबुरी जुइ धुकल।

8 छकः यरूशलेमय् च्वंगु देगलय् पुजाहारीयागु ज्या यायेत वयागु पुचलय् लाःपिं पुजाहारीतनापं जकरिया नं यरूशलेमय् थ्यंकः वल।

9 उबलय् इमिगु चलन कथं चिष्टा तःबलय् देगलय् दुहां वनाः गुँगू थनेगु ज्या वयात लाःगुलि व देगलय् दुहां वन।

10 वं दुने गुँगू थनाच्चंबलय् फुक्क मनुतय्सं पिने च्वनाः प्रार्थना यानाच्चन।

11 अबलय् वं परमप्रभुया छम्ह दूतयात गुँगू थनेगु वेदीयागु जवयपाखे दनाच्चंगु खन।

12 स्वर्गदूतयात खनाः जकरियाया ग्यानाः अय् याये थय् याये मन्त।

13 स्वर्गदूतं वयात थये धाल – “जकरिया, ग्याये म्वाः, छंगु प्रार्थना परमेश्वरं न्यनादीगु दु। छं कलाः एलीशिबां छम्ह काय्मचा बुइकी, अले छं वयागु नां यूहन्ना धकाः ति।

14 छिपिं तसकं लयताइ। अले यक्व मनुत नं व बुइबलय् लयताइ।

15 थ्व मचा परमप्रभुया न्ह्यःने तसकं तःधं जुइ। वं अय्लाः थ्वं छुं हे त्वनी मखु। मांया प्वाथंनिसें हे पवित्र आत्मां जायाच्चम्ह जुइ।[☆]

16 अले वं यक्व यक्व इस्राएलीतयत् इमि परमप्रभु परमेश्वरयाथाय् तुं लिंगना हइ।

17 परमेश्वरया च्यः जूगुलि व एलिया थें तुं तसकं साहसी जुइ। अले वं प्रभु झायादी न्ह्यः मिलय् मजूपि बौ व काय् म्हाय्पिन्त मिलय् याइ। अले हानं वं अधर्मीतयत् नं धर्मी यानाः प्रभु झाया दीबलययात तयार याना तइ।”

18 अले जकरियां स्वर्गदूतयात थथे धाल – “थथे हे जुइ धकाः जिं गथे यानाः सीका कायेगु? जि ला छम्ह बुराम्ह मनु खः, अले जिम्ह कलाः नं तसकं बुरी जुइ धुंकल।”

19 स्वर्गदूतं वयात धाल – “परमेश्वरयाथाय् च्वनीम्ह गब्रिएल स्वर्गदूत धाःम्ह जि हे खः। जितः थ्व भिंगु खँ छन्त धायकेत परमेश्वरं हे छवयाहयादीगु खः।

20 मजुसे मगाःगु जिं धयागु खँय् छं विश्वास मयाःगुलि थथे मजुतले छ पाकः जुयाच्चनी।”

21 पिने मनुत पियाच्चन। जकरियां ताःई बिकाच्चंगुलि इपि तसकं अजू चायाच्चन।

22 पिहां वःबलय् जकरियां नवाय् मफु। थ्व खनाः इमिसं देगलय् दुने परमेश्वरं वयात दर्शन बिल जुइ धकाः थुइकाकाल। वं इमित ल्हाःभाय् यानाक्यन। अबलय् निसें व पाकः हे जुयाच्चन।

23 पुजाहारीयागु ज्या सिधय्वं जकरिया थःगु छँय् तुं लिहां वन।

24 अनं लिपा वया कलाः एलीशिबाया प्वाथय् दुगुलि न्याला तक छँनं गनं पिहां मवँसें च्वनाच्चन।

25 वं थथे धाल – “आः तिनि प्रभु जितः स्वयादिल। मस्त मदयाः हेपय् याका च्वनाम्हयसित आः मनुतयगु मिखाय् जितः भिकादिल।”

येशू बुइ धकाः धाःगु

26 एलीशिबाया प्वाथय् दुगु खुला दय्काः गब्रिएल धाःम्ह स्वर्गदूतयात हे परमेश्वरं गालीलय् लाःगु नासरत शहरय् छवयाहयादिल।

27 अन योसेफ धाःम्ह मनु नाप क्वःछिना तःम्ह बिया मछवःनिम्ह मिसा छम्ह दु। योसेफ जुजु दाऊदया सन्तान खः। अले व बिया मछवःनिम्ह मिसायागु नां मरियम खः।

28 स्वर्गदूतं व हे बिया मछवःनिम्ह मिसायाथाय् वनाः थथे धाल – “अय् मरियम, परमप्रभुं छन्त दया माया यानादीगु दु। परमप्रभु छ नाप दी।”

29 थ्व न्यनाः व तसकं ग्यात। अले वं मनं मनं थ्व छु जूगु धकाः बिचाः यात।

30 स्वर्गदूतं वयात धाल – “मरियम ग्याये म्वाः, परमेश्वरं छन्त माया यानादीगु दु।

31 न्यँ, छं प्वाथय् दइ। छं छम्ह काय्मचा बुइकी। अले वयागु नां छं येशू धकाः ति।

32 थ्व मचा तसकं तःधनी, अले दकलय् तःधंम्ह परमेश्वरया काय् धकाः नां जाइ। अले परमप्रभु परमेश्वरं वयात वया तापाःबाज्या दाऊदयागु सिंहासन बियादी।

33 वय्कः सदां याकूबया सन्तानतय् जुजु जुयादी। अले वय्कलं न्ह्याबलें न्ह्याबलें हे राज्य यानादी।”☆

34 अले मरियमं स्वर्गदूतयात थथे धाल – “थथे गुकथं जुइ फइ? जिगु ब्याहा ला मज्जनि।”

35 अले स्वर्गदूतं वयात लिसः बिल – “पवित्र आत्मा हे छंके झायादी। दकलय् तःधंम्ह परमेश्वरयागु शक्ति बूम्ह मचा पवित्रम्ह जुइ, अले परमेश्वरया काय् धकाः नां जाइ।

36 छं थःलाःम्ह एलीशिबां मचा बुइकी मखु धकाः ला छं सि हे स्यू जुइ। बुरीम्ह जूसां वया प्वाथय् दुगु खुला दये धुंकल।

37 उकिं परमेश्वरं याये मफुगु छुं नं मदु।”☆

38 अले मरियमं धाल – “स्वयादिस्, जि ला परमेश्वरया भ्वाति जक खः। छिं धयादी थें हे जितः जू वयेमा।” अले स्वर्गदूत लिहां वन।

मरियम एलीशिबायात नापलाः वंगु

39 थुलि जुइ धुंकाः याकनं हे मरियम यहूदियाया पहाडय् लाःगु छगू गामय् वन।

40 जकरियायागु छँय् थ्यनेवं मरियमं एलीशिबायात ज्वजलपा यात।

41 मरियमं वयात ज्वजलपा याःबलय् वयागु प्वाथय् च्वंम्ह मचा सन। उबलय् एलीशिबा पवित्र आत्मां जाल। अले वं तःसलं थथे धाल –

42 “मिस्त मध्ये छन्त दकलय् अप्वः आशिष दत अले छंगु प्वाथय् दुम्ह मचायात नं आशिष दइ।

43 जिम्ह प्रभुया मां हे जिथाय् वल। थ्व गथे जुयाजुल?

44 छं जितः ज्वजलपा याःबलय् जिगु प्वाथय् च्वंम्ह मचा लयल्यतातां सन।

45 परमप्रभुं धयादीगु खँ धाथें जुइ धकाः छं पत्याः याःगुलि छन्त आशिष दइ।”

मरियमं परमेश्वरयात तःधंकूगु

46 अले मरियमं थथे धाल —

“जिं दुनुगलंनिसें परमप्रभुयात

तःधंकाच्चवना।

47 मुक्ति बीम्ह परमेश्वर खनाः

जिगु मन तसकं लयूताः,

48 छायाःसा वय्कलं

जि थज्याःम्ह भवार्तियात नं

दया यानादिल।

आर्वनिसें जितः फुक्क मनूतय्सं तक नं

धन्यम्ह धाइ।

49 दकलय् तःधंम्ह व शक्ति दुम्ह परमेश्वरं

जितः थुकथं तःधंगु ज्या यानादिल।

वय्कःयागु नां हे पवित्र जू।

50 वय्कःयात मानय् याइपिन्त

वय्कलं पुस्ता पुस्तां तकं दया यानादी।

51 वय्कलं थःगु ल्हाःयागु शक्ति

क्यनादीगु दु।

वय्कलं घमण्ड याइपिनिगु मनय् च्वंगु ग्वसाः

फुक्कं स्यंकादीगु दु।

52 वय्कलं बल्लाःपि जुजुपिन्त सिंहासनं क्वकयादिल,

अले चिधंपिन्त च्वय् छवयादिल।✧

53 वय्कलं नये मखंपिन्त साःसाःगु लुधंक नकादिल।

तःमिपिन्त खालि ल्हातं लिछवयादिल।

54 वय्कलं थःम्हं यानादीगु बाचा लुमंकाः

थः च्यःत इस्त्राएलीतयूत ग्वाहालि यानादिल।

55 वय्कलं झी तापाःबाज्या अब्राहाम

व वया सन्तानतयूत धयादी थें

दया यायेगु ल्वःमंका मदी।”✧

56 मरियम एलीशिबापिन्थाय् स्वलाति च्वनाः थःगु छैय् लिहां वन।

बप्तिस्मा बीम्ह यूहन्ना बूगु

57 एलीशिबाया मचाबुइगु ब्यथा जुल। वं छम्ह काय्मचा बुइकल।

58 वयात परमप्रभुं तसकं माया यानादीगु खना: वया थ:ला:पि व ज:लाख:लापि फुककं लयताल।

59 मचा बूगु च्यान्हु दय्का: मचायागु म्हय् चिं तयेत इपिं वल। इमिसं मचायागु नां बौम्हय्सिगु थें तुं जकरिया तयेत्यंबलय्☆

60 मचाया मामं थथे धाल – “जकरिया मखु, थ्वयागु नां यूहन्ना तयेमा:।”

61 अले इमिसं वयात धाल – “छिमि थ:ला:पि सुयां हे थज्या:गु नां मदुनि।”

62 अले इमिसं ल्हा:भाय् याना: मचाया अबुयाके छु नां तयेगु धका: न्यन।

63 अले वं छपा: ग्वर: कया: उकी थथे धका: च्वत – “मचायागु नां यूहन्ना धका: तयेमा:।” थ्व खना: इपिं फुककं अजू चाल।

64 अबलय् हे वं न्हापा थें तुं नवाये फत। अले वं परमेश्वरयात त:धंकल।

65 अन च्वपिं मनूत फुककं तसकं ग्यात। थ्व खँ यहूदिया जिल्लाया फुककभनं बयबय् जुल।

66 थ्व खँ न्यपिं फुककसिनं मनं मनं थथे धका: बिचा: यात – “थ्व मचा छु जुइम्ह जुइ?” छाया:सा परमप्रभुं हे वयात शक्ति बियादीगु दु।

जकरियां कंगु अगमवाणी

67 अले यूहन्नाया अबु जकरियां पवित्र आत्मां जाया: थथे धका: अगमवाणी कन –

68 “इस्त्राएलीतय् परमप्रभु

परमेश्वरयात त:धंकेमा,

छाया:सा परमेश्वर थ: हे झाया:

थ: मनूतय्त पापं छुतय् यानादिल।

69 वय्कलं हे झीत छम्ह तसकं

त:धंम्ह मुक्तिदाता बियादिल।

झीम्ह मुक्तिदाता वय्क:या च्य:

जुजु दाऊदया सन्तानपाखें झाइ।

70 थथे जुइ धका: ला वय्कलं

न्हापा हे पवित्रपिं अगमवक्तातय्गु

- म्हुतुं न्ववानादीगु खः।
 71 वय्क्लं इीत मयःपिनिगु ल्हातं
 व शन्नृतयगु ल्हातं बचय् यानादी।
 72 वय्क्लं इी तापाःबाज्यापिन्त
 दया यानादीगु
 व वय्क्ःपिं नाप चिनादीगु बाचा
 लुमंकादी।
 73 थ्व बाचा इी तापाःबाज्या
 अब्राहामनाप चिनादीगु खः।
 74 उकिं शन्नृतयगु ल्हातं इीत
 बचय् याका दीगुलि
 वय्क्ःयात लय्लयत्तातां
 मानय् यानाच्चवेनेमा।
 75 अले पवित्रपिं जुयाः म्वाना च्वंतले
 मग्यासे इीपिं वय्क्ःयात यय्क् च्वनाच्चवेनेमा।
 76 छ नं, जिमि काय्,
 दकलय् तःधंम्ह परमेश्वरया अगमवत्ता धकाः छन्त धाइ।
 उकिं छ प्रभुया न्ह्यः वय्क्ःयात लँ छिकेत वनीम्ह जुइ।✧
 77 परमेश्वरया थःमनूतयगु
 पाप क्षमा जुइ,
 अले हानं इपिं बचय् जुइ धकाः
 इमित धायेगु नं छंगु ज्या जुइ।
 78 इी परमेश्वर तसकं भिंम्ह
 व दया माया दुम्ह खः।
 अय्जगुलि वय्क्लं तसकं
 थीगु मुक्तियागु निभाः जः इीत खय्कादी।
 79 थ्व निभाः जः स्वर्ग
 कालयागु हाकुगु किपालुइ
 च्वनाच्चपिं मनूतय्थाय् खय्कादी।
 थ्व हे जलं इीत शान्तियागु लँपुइ यंकादी।”✧

80 व मचा आत्मा व म्ह निताय नं बल्लानाः तःधिकः जुयावल। इस्राएलीतय्थाय् वनाः न्यकेगु ज्या मयातले व मस्भूमिइ हे च्वनाच्चन।

2

येशू बूगु

मन्ती १:१८-२५

1 अबलय लाक्क रोमी महाराजा कैसर अगस्टसं संसारय् न्यंक जनगणना का धकाः उजं बिल।

2 सिरियाय् कुरेनियस धाःम्ह बडा-हाकिम जुयाच्चंबलय् न्हापां जनगणना काःगु थ्व हे खः।

3 अयज्जुगुलि फुक्क मनूत इमि थथःगु गामय् व शहरय् वनाः नां च्वकः वन।

4 योसेफ जुजु दाऊदया सन्तान जूगुलि नासरत शहरं जुजु दाऊद बूगु बेथलेहेम गामय् वन।

5 वं थःलिसे ब्याहा यायेत क्वःछिना तये धुंकूम्ह मरियमयात नं ब्वनायंकल। वया प्वाथय् दु।

6 इपिं अन दुबलय् हे वयात मचाबुइगु ब्यथा जुल।

7 वं दकलय् न्हापांम्ह काय् बुइकल। च्वनेत गनं हे थाय् मदुगुलि इमिसं मचायात इचां भुनाः फैतय्त नकिगु थलय् थ्यनातल।

फैजवाःत व स्वर्गदूत

8 चान्हय् अनं लिक्क लाःगु ख्यलय् फैजवाःत फैचात पिवाः च्वनाच्चन।

9 अबलय् हे प्रभुया छम्ह दूत इमिथाय् खनेदय्कः वल। प्रभुयागु जः अन छचाःखेलं न्यन। इपिं फुक्कं ग्यानाः थरथर खात।

10 अले स्वर्गदूत इमित धाल – “ग्याये म्वाः। जिगु खँ न्यँ, जि छिमित लसतायागु छगू तःधंगु भिंगु खँ कं वयागु खः। थ्व भिंगु खँ फुक्क मनूतय्त खः।

11 जुजु दाऊद बूगु गामय् छिमि छम्ह मुक्तिदाता नकतिनि हे बूगु दु। वय्कः हे ख्रीष्ट प्रभु खः।

12 मचायात म्हसीकेगु चिं थ्व खः – वय्कःयात इचां भुनाः फैतय्त नकिगु थलय् थ्यनातःगु दु।”

13 अबलय् लाक्क हे छक्कलं मेपि स्वर्गदूततय्गु छपुचः खनेदत। इपिं फुक्कसिनं थथे धकाः म्ये हालाः परमेश्वरयागु जयजय यात –

14 “स्वर्गाय् च्वनादीम्ह परमेश्वर

तःधं जुइमा।

अले परमेश्वरयात यःपिं मनूतयत् पृथ्वीइ च्वनाच्चंसां
शान्ति दयेमा।”

15 स्वर्गदूतत अनं स्वर्गाय् वने धुंकाः फैजवाःतयस्सं थथे खँ ल्हात – “नु, झी
बेथलेहेमय वनाः प्रभुं धयादीगु खँ स्वये।”

16 अले इपिं हथाय् पथासं वन। अन इमिसं मरियम, योसेफ व फैतयत् नकिगु
थलय् थ्यनातःम्ह मचायात खन।

17 थ्व खनाः इमिसं स्वर्गदूतं कंगु खँ मचाया मां बौयात कन।

18 फैजवाःतयगु खँ न्यनाः फुक्कं अजू चाल।

19 मरियमं धाःसा थ्व खँ मनं मनं बिचाः यानाः नुगलय्सं तया तल।

20 स्वर्गदूततयसं धाःथें स्वये व न्यने दुगुलिं फैजवाःत परमेश्वरयात जयजय
यानाः लयत्तातां लिहां वन।

येशूयात यरूशलेमयागु देगलय् छाये यंकूगु

21 बूगु च्यान्ह दयकाः मचायागु म्हय् चिं तयकल। अले वय्कःयागु नां येशू
तल। थ्व नां प्वाथय् दये न्ह्यः हे स्वर्गदूतं तःगु खः।☆

22 मोशां च्वया तः थें बूगु पिइन्ह दयकाः मचाबू ब्यंके त्यःबलय् इमिसं
वय्कःयात छायेत यरूशलेमयागु देगलय् यंकल।☆

23 दकलय् न्हापालाक बूम्ह काय्मचा परमप्रभुया नितिं पवित्र जुइ धकाः
व्यवस्थाय् च्वयातःगु दु।☆

24 मचाबू ब्यंकीबलय् छज्वः सुकुभतु जूसां निम्ह मचापिं बखुंचात जूसां बलि
बियाः परमप्रभुयात छायेमाः धकाः परमप्रभुयागु सफलइ च्वया तः थें इमिसं नं छाये
यन।

25 अबलय् यरूशलेमय् शिमियोन धाःम्ह छम्ह मनू दु। थ्व मनू तसकं धर्मीम्ह
व परमेश्वरया भक्त खः। व इस्राएलीतयगु उद्धार जुइगु दिं स्वयेत पियाच्चंम्ह खः।
पवित्र आत्मा वयाके च्वनादीगु दु।

26 अयजूगुलिं परमेश्वरं बी धकाः धयातःम्ह मुक्ति बीम्ह ख्रीष्ट झाया मदितले
छ सी मखुनि धकाः पवित्र आत्मां वयात धयातःगु दु।

27 पवित्र आत्मां वयात देगलय् यन। अबलय् हे मचा येशूयात वया मांबौपिन्सं व्यवस्थाय् च्वया तः थें यायेत देगलय् हल।

28 शिमियोनं मचायात बुयाः परमेश्वरयात सुभाय् बियाः थथे धाल –

29 “परमप्रभु, छिं धयादीगु थ्व हे खँ

थौ जिगु मिखां स्वयेदत।

आः जि याउँक सिना वंसां जिल।

30 जिं थःगु हे मिखां थौं छिं संसारय् च्वंपिन्त बियादीम्ह मुक्तिदातायात खने धुन।

31 छिं फुक्क मनूतयगु निति थथे यानादीगु खः।

32 यहूदीमखुपिन्त नं लँ क्यनीम्ह वय्कः मुक्तिदाता व जः खः।

उकिं वय्कः मुक्तिदाता झायादीगुलिं मनूतयसं झी इस्राएलीतय्त तःधंकी।”☆

33 शिमियोनं थुकथं मचायागु खँ धाःगुलि मचाया मांबौ छक्क जुल।

34 अले शिमियोनं इमित आशिष बियाः मचाया मांयात थथे धाल – “इस्राएलय् च्वंपिं यक्व मनूतय्त भिकेत नं स्यंकेत नं परमेश्वरं ल्ययादीम्ह मचा थ्व हे खः। थ्व मचा परमेश्वरयागु चिं जूगुलि यक्वसिनं थ्वयागु विरोध याइ।

35 थुकिं यक्व मनूतयगु नुगःया बिचाः पिहां वइ। अले च्वामुगु तरवारं थें दुःखं छंगु नुगलय् इवाबी।”

36 अबलय् अन हन्ना धाःम्ह अगमवादिनी मिसा छम्ह दु। व आशेर कुलयाम्ह फनुएल धाःम्ह मनूया म्हाय् खः। ब्याहा यानाः वया भाःतनाप न्हयदँ तक जक हने खन। आः ला व बूरी जुइ धुंकल।

37 व चयप्यदँ दुबलय् तक भाःत मदय्कः हे च्वन। वं यक्व हे अपसं च्वनाः प्रार्थना यानाः परमेश्वरया सेवा यानाच्वंगु दु।

38 मचा येशू देगलय् दनिबलय् हे हन्नां नापलाः वयाः परमेश्वरयात सुभाय् बिल। अले यस्शलेमय् च्वपिनिगु उद्गार जुइतिनि धकाः पिया च्वंपिन्त व मचायागु खँ कन।

नासरतय् लिहां वःगु

39 व्यवस्थाय च्वया तः थें फुक्कं याये सिधय्काः योसेफ व मरियम गालील्य लाःगु थःगु हे गां नासरतय् लिहां वल।☆

40 मचा तःधिकः जुयावल। बुद्धिं नं जायावल, अले परमेश्वरं नं वय्कःयात आशिष बियादीगु दु।

मचा येशू देगलय् त्वःफ्यगु

41 येशूया मांबौ दँयदसं यरूशलेमय् छुत्काराया नखः हनेत वं।☆

42 वय्कः झिनिदँ दुबलय् नं इपिं नखः मानय् यायेत यरूशलेमय् वन।

43 नखः सिधय्काः इपिं छैं लिहां वन। मचाम्ह येशू जक यरूशलेमय् तुं च्वन। वय्कःया मांबौपिन्सं थ्व खँ मस्यु।

44 वय्कः पासापिनापं वयाच्चंगु दइ धकाः इपिं न्हिच्छि वनाच्चन। बहनी थःथितिपिं व पासापिनिगु पुचलय् वय्कःयात माला स्वत।

45 वय्कःयात लुइके मफुगुलि इपिं हानं यरूशलेमय् तुं माः वन।

46 स्वन्हु दय्काः इमिसं वय्कःयात देगलय् गुसपिनापं फ्यतुनाः इमिगु खँ न्यँन्यं, न्ह्यसः यानाच्चंगु खन।

47 अन च्वपि फुक्क वय्कःयागु बुद्धि व लिसः न्यनाः छक्क जुयाच्चन।

48 थुकथं वय्कःयात अन खनाः मांबौपिं निम्हं छक्क जुल। अले मांम्हं थथे धाल – “पुता, छं छाया थथे यानागु? छं बाः व जिं छन्त गुलि माले धुन। जिमि ला म्हाय् जिउ हे मन्त का।”

49 अले वय्कलं धयादिल – “छिकपिन्सं जितः माला मदीसां ज्यूगु खः नि। जि जिम्ह बाःयागु छँय् च्वनेमाः धकाः छिकपिन्सं मस्यु ला?”

50 वय्कलं धयादीगु खँ इमिसं मथुल।

51 अथेसां वय्कः इपिं नाप तुं नासरतय् लिहां झाल। अन वय्कः मांबौनं धाःथें च्वनादिल। वय्कःया मामं थ्व खँ मनय्सं तयातल।

52 वय्कः मन्तय्गु व परमेश्वरयागु दया मायां झन झन तःधिकः जुयाः बुद्धिं जायावल।☆

☆ 2:39 २:३९ मत्ती २:२३

☆ 2:41 २:४१ प्रस १२:१-२७; व्य १६:१-८

☆ 2:52 २:५२ १ शमू २:२६;

हितो ३:४

3

बप्तिस्मा बीम्ह यूहन्नां स्यनेकने याःगु

मत्ती ३:१-१२; मर्क १:१-८

यूह १:१९-२८

१ रोमयाम्ह महाराजा तिबेरिअसं राज्य यानाच्चंगु झिंन्यादँ दुबलय् पन्तियस पिलातस यहूदियायाम्ह शासक जुयाच्चंगु खः। अले हेरोद गालीलियाम्ह शासक जुयाच्चंगु खः। अथे हे इतुरिया व त्राखोनितिसय् हेरोदया किजा फिलिप व अबिलेनय् लुसानियास शासक जुयाच्चंगु खः।

२ अबलय् हन्नास व कैयाफा दकलय् तःधंपि पुजाहारीत जुयाच्चंगु खः।

उबलय् हे मस्भूमिइ च्वनाच्चंम्ह जकरियाया काय् यूहन्नायात परमेश्वरं न्यंकः वनेत उजं बियादिल।

३ अले यूहन्नां यर्दन खुसिया जःखः वनाः थथे धकाः न्यंकाजुल – “थःगु पाप क्षमा यायेत पश्चाताप यानाः बप्तिस्मा का।”

४ थ्व खँ यशैया अगमवक्तां थःगु सफलइ थथे च्वया थकूगु दु –

“मस्भूमिइ छम्ह मनू थथे धकाः

हाला वइ –

‘परमप्रभुयात लँ ब्यु,

वय्कःयागु लँ छिंकाब्यु।

५ गाःगी वंगु दक्वं ल्हाना छवइ।

पाःचापीचा दक्वं माथं वंका छवइ।

चाःची तूगु दक्वं तप्यंका छवइ।

अले छांछिं वःगु नं दक्वं पिचुका छवइ।

६ अले तिनि दक्व मनूतयसं

परमेश्वरयागु मुक्ति खनी।’ ”☆

७ यक्व हे मनूत यूहन्नायाथाय् बप्तिस्मा कायेत वल। अले वं इमित थथे धाल – “हे सर्पया सन्तान, परमेश्वरयागु तंपाखें बचय् जुइत बिस्सुं हूँ धकाः छिमित सुनां धाल?”☆

८ पश्चाताप या:थें छिमिसं थःगु चालचलन नं अथे हे या। ‘अब्राहाम हे जिमि तापा:बाज्या खः, थथे जिमित छुं नं जुइ मखु’ धका: छिपिं हाला जुइ मते, छायाधा:सा जिं छिमित धाये – परमेश्वरं अब्राहामया नितिं ल्वहँतं नं मस्त दयकादी फु।☆

९ सिमायागु प्वलय् पा: लाये हे त्यंगु दु। भिंगु फल मसःगु सिमा फुक्कं पाला: छवयकाछवइ।”☆

१० अले यक्व यक्व मनूतय्सं वयाके न्यन – “अय्सा जिमिसं छु याये माल?”

११ वं इमित थथे लिस: बिल – “निपा: लं दुम्हय्सिनं मदुम्हय्सित छपा: ब्यु। अथे हे नयेगु दुम्हय्सिनं नये मखंपिन्त ब्यु।”

१२ कर काइपिं मनूत नं बप्तिस्मा कायेत वयाथाय् वल। इमिसं नं थथे धका: न्यन – “गुरूजु, जिमिसं छु यायेगु लय?”☆

१३ अले वं इमित लिस: बिल – “छिमिसं का धाक्व जक कर का, अप्व: काये मते।”

१४ सिपाइँतय्सं नं वयाके न्यन – “जिमिसं छु यायेगु लय?”

वं धाल – “ख्याना: कर्पिन्के थगय् यायेगु, घुस नयेगु ज्या याये मते। तर छिमिगु तलबय् जक ल्थंका च्वाँ।”

१५ यूहन्ना थथे याना जूगुलि मनूतय्सु आशा चुलि जायावल। अयजूगुलि इमिसं – “थ्व हे मुक्ति बीम्ह ख्रीष्ट ला मखु ला” धका: मनं मनं बिचा: यानाच्वन।

१६ उकिं यूहन्ना इमित थथे धाल – “जिं ला छिमित लखं बप्तिस्मा बियाच्वन। जि स्वया: त:धंम्ह छम्ह झायाच्वंगु दु। वयक:यागु लाकांया पुतु फ्यनेत तंकि जि मल्व:। वय्कलं हे छिमित पवित्र आत्मां व मिं बप्तिस्मा बियादी।

१७ वय्कलं ल्हातिइ हासा ज्वना तयादीगु दु। वय्कलं फुक्क छव हाया: थःगु धुकुतिइ स्वथनादी। अले छवस जुक्व गुबलें मसीगु मिइ छवयकादी।”

१८ थथे हे यक्व स्यनेकने याना: यूहन्नां मनूतय्त भिंगु खँ न्यंकल।

१९ हेरोदं थ: हे भौमचा हेरोदियासयात कला: तःगुलि व थथे हे मेमेगु नं यक्व मभिंगु ज्या याना जूगुलि यूहन्नां वयात ब्व:बिल।

२० अयजूगुलि हेरोदं वयात इयालखानाय् कुनाबिल। थथे वं झन त:धंगु बांमला:गु, मभिंगु ज्या यात।☆

येशू बप्तिस्मा कयादीगु

मत्ती ३:१३-१७; मर्क १:९-११

☆ 3:8 ३:८ यूह ८:३३ ☆ 3:9 ३:९ मत्ती ७:१९ ☆ 3:12 ३:१२ लूक ७:२९ ☆ 3:20 ३:१९-२०
मत्ती १४:३-४; मर्क ६:१७-१८

21 यूहन्नायात इयालखानाय कुने न्ह्यः छन्हू यूहन्नां मनूतयत् बप्तिस्मा बियाच्चंबलय् येशू नं बप्तिस्मा कयादिल। वय्कलं प्रार्थना यानाच्चंबलय् स्वर्ग चाल।

22 पवित्र आत्मा सुकुभ्तु थें जुयाः वय्कःयागु म्हय् कुहां झाल। अबलय् हे स्वर्ग थये धकाः धयाहल – “छ जि यःम्ह काय् खः। छ खनाः जि लय्ताः।”☆

येशूया पुर्खा

मत्ती १:१-१७

23 येशू ज्या शुरु यानादीबलय् वय्कः स्विदँति दत। मनूतयसं वय्कःयात योसेफया काय् धकाः धाइगु। अथे हे योसेफया बाः एली खः।

24 अथे हे एलिया बाः मत्तात, बाज्या लेवी, अले वया तापाःबाज्यापिं कथहं मल्की, यान्ना, योसेफ,

25 मत्ताथियास, आमोस, नहम, इसली, नगै,

26 माथ, मत्ताथियास, सेमैन, योसेख, योदा,

27 योआनन, रेसा, यरूबाबेल, शालतिएल, नेरी,

28 मल्की, अद्दी, कोसाम, एलमादम, एर,

29 यहोशू, एलीएजर, योरीम, मत्तात, लेवी,

30 शिमियोन, यहदा, योसेफ, योनान, एल्याकीम,

31 मलेआ, मिन्ना, मत्ताथा, नातान, दाऊद,

32 यिशै, ओबेद, बोअज, सल्मोन, नहशोन,

33 अम्मीनादाब, आराम, अरनी, हेस्रोन, फारेस, यहदा,

34 याकूब, इसहाक, अब्राहाम, तेरह, नाहोर,

35 सरुग, रऊ, पेलैग, एबेर, शेलह,

36 केनान, अर्पक्षद, शेम, नोआ, लेमेख,

37 मत्तूशेलह, हनोक, येरेद, महलालेल, केनान,

38 एनोश, शेत, आदम अले परमेश्वर खः।

4

येशूयात परीक्षा याःगु

मत्ती ४:१-११; मर्क १:१२-१३

☆ 3:22 ३:२२ उत २२:२; भज २:७; यशै ४२:१; लूक १:३५

1 येशू पवित्र आत्मां जायाः यर्दन खुसिं लिहां झाःबलय् आत्मां वय्कःयात मरूमिइ ब्वना यंकाः पिइन्हु तक तये यंकल।

2 शैतानं पिइन्हु तक वय्कःयागु मन स्वयाच्चन। अबलय् वय्कलं छुं हे नयामदी। थथे जुइ धुंकाः वय्कःयात नयेपित्यात।

3 अले शैतानं थथे धाल – “छि परमेश्वरया काय् खःसा थ्व ल्वहंयात मरि जुइमा धकाः धयादिसँ।”

4 अले वय्कलं धयादिल – “थथे च्वयातःगु दु – ‘मनूत मरि जक नयाः म्वानाच्चने फइ मखु।’ ”☆

5 अले हानं शैतानं वय्कःयात पहाडय् च्वय् यंकाः संसारयागु फुक्क राज्य क्यन,

6 अले शैतानं थथे धाल – “थ्व फुक्क धन व राज्य जिं छितः बी, छायाधाःसा थ्व फुक्क जितः बियातःगुलि जितः यःमहयूसित बी थ्याः।

7 छि जितः भागि यात धाःसा थ्व फुक्क छिगु जुइ।”

8 वय्कलं शैतानयात लिसः बियादिल – “थथे नं च्वयातःगु दु –

“ ‘छिम्ह प्रभु परमेश्वरयात जक

सेवा यायेमाः।

वय्कःयात जक मानय् यायेमाः।’ ”☆

9 अले हानं शैतानं वय्कःयात यरूशलेमय् च्वंगु देगलय् च्वय् यंकाः थथे धाल – “छि परमेश्वरया काय् खःसा थनं तिन्हयादिसँ,

10 छायाधाःसा थथे च्वयातःगु दु –

“ ‘वय्कलं स्वर्गदूत छवयाहयाः

छितः बचय् यानादी।’ ”☆

11 अले ‘इमिसं छितः ल्हातय् फया काइ।

मखुसा छिगु तुति ल्वहंतय् न्याः वनी।’ ”☆

12 वय्कलं शैतानयात लिसः बियादिल – “धर्मशास्त्रय् थथे च्वयातःगु दु – ‘छं परमप्रभु परमेश्वरयागु मन स्वये मते।’ ”☆

☆ 4:4 ४:४ व्य ८:३ ☆ 4:8 ४:८ व्य ६:१३ ☆ 4:10 ४:१० भज ९१:११ ☆ 4:11 ४:११ भज ९१:१२ ☆ 4:12 ४:१२ व्य ६:१६

13 थथे शैतानं वय्कःयात फुक्क कथं मन स्वये धुंकाः पलखयात त्वःतावन।

गालीलिय् येशूयागु न्हापांगु ज्या

मन्ती ४:१२-१७; मर्क १:१४-१५

14 अनं लिपा येशू पवित्र आत्मायागु शक्तिं गालीलिय् लिहां झाल। वय्कःयागु खँ जिल्लाय् फुक्कभनं बय्बय् जुल।

15 थाय् थासय् धर्मशास्त्र स्यनीगु छैय् वनाः वय्कलं मनूतय्त स्यनेकने यानादिल। अय्जगुलि मनूतय्सं वय्कःयात तसकं तःधकंल।

नासरतय् येशूयात मयय्कूगु

मन्ती १३:५३-५८; मर्क ६:१-६

16 अले वय्कः थः ब्वलंगु गां नासरतय् झाल। विश्रामबार पतिकं वय्कः धर्मशास्त्र स्यनीगु छैय् वनीगु जूगुलि अन नं धर्मशास्त्र स्यनीगु छैय् झाल। अले वय्कः धर्मशास्त्र ब्वनेत दनादिल।

17 यशैया अगमवक्तायागु सफू ब्वनेत वय्कःयात बिल। वय्कलं व सफू पुइकाः थथे च्वयातःगु पाना लुइकादिल —

18 “मगाःमचाःपिन्त भिंगु खँ न्यकेत

परमप्रभुं जितः ल्ययादीगुलि

परमप्रभुयागु आत्मा जिके च्वनादीगु दु।

परमप्रभुं चिना तःपिन्त त्वःताबीत,

कांपिन्त मिखां खंका बीत,

अले न्हुतुन्हुया तःपिन्त थना बीत, ☆

19 अले परमप्रभुं दया माया यानादीगु

थुबलय् हे खः धकाः नं न्यंका जुइत

जितः छवयाहयादीगु खः।”

20 ब्वने सिधय्काः वय्कलं सफू तुलाः अन च्वंम्ह पालेयात लित बियाः फ्यतुनादिल। अन च्वपिं मनूत फुक्कसिनं वय्कःयात त्वालां त्वालां स्वयाच्चन।

21 वय्कलं इमित थथे धयादिल — “जिं ब्वनागु खँ छिकपिन्सं ता हे ताः। जिं गथे ब्वनागु खः, थौं अथे हे जुइ धुंकल।”

22 इपि फुक्कसिनं वय्कःयात तारिफ यात। वय्कःयागु खँ न्यनाः इपि अजू चाल। अले इमिसं थथे धाल – “थ्व मनू योसेफया काय् मखु ला?”

23 अले वय्कलं इमित थथे धयादिल – “छिकपिन्सं जितः थ्व उखान धयादी धकाः ला जिं सि हे स्यू – ‘हे डाक्टर, थःमं थःतः निं लायकि। छं कफर्नहुमय् यानावःगु जिमिसं न्यनागु दु, आः छंगु गामय् नं अथे हे या रे।’

24 वय्कलं इमित हानं धयादिल – धात्थें, थःगु हे गामय् च्वंम्ह अगमवक्तायात सुनानं मानय् याइ मखु।☆

25 “अयनं जिं छिकपिन्त धात्थें जूगु खँ कने, न्यनादिसँ – एलिया दुबलय् इस्राएलय् यक्व यक्व हे भाःत मदुपि मिसात दु। अबलय् छकः स्वदँ व खुलातक वा मवःगुलि इस्राएलय् दक्वभनं हे अनिकाल जुल।☆

26 अबलय् एलियायात सीदोन देशय् सारपत धाःगु थासय् च्वंम्ह छम्ह विधवा मिसायाथाय् जक छवयादिल, मेथाय् गनं नं छवयामदी।☆

27 अले हानं एलीशा अगमवक्तायागु पालय् नं इस्राएलय् यक्व यक्व हे कोहि जुयाच्चपिं दु। सिरियाय् च्वंम्ह नामानयात जक कोहि जूगु लाय्काबिल, मेपिं सुयातं लाय्का मव्यु।”☆

28 थ्व न्यनाः अन च्वपिं फुक्कं तसकं तंम्वल।

29 जूरुजारुं दनाः इमिसं वय्कःयात साला यनाः गामं पिने हल। इमिगु गां पहाडय् लाः। इमिसं वय्कःयात पहाडं कुर्का छवयेगु धकाः च्वकाय् थयंक हल।

30 अयनं वय्कः इमिगु दथुं दथुं हे सुस्क्क वना छवल।

भूतआत्मा दुब्यूमह मनूयात लाय्कादीगु

मर्क १:२१-२८

31 अनं येशू गालीलिय् च्वंगु हे कफर्नहुमय् क्वहां झाल। अन नं वय्कलं विश्रामबार खुन्हु अन च्वपिन्त स्यनादिल।

32 वय्कलं पूरा अधिकारं न्ववानादीगुलि न्यना च्वपिं फुक्कं वय्कः खनाः अजू चाल।☆

33 धर्मशास्त्र स्यनीगु छैय् भूतआत्मा दुब्यूमह छम्ह मनू दु। व मनू तसकं हाला हल –

34 “हे नासरतय् च्वंम्ह येशू, छि जिमिथाय् छाया झायेमाःगु? छि जिमित स्यंकेत झायागु ला? जिं छितः म्हस्यु, छि परमेश्वरया पवित्रम्ह मनू खः।”

☆ 4:24 ४:२४ यूह ४:४४

☆ 4:25 ४:२५ १ राज १७:१

☆ 4:26 ४:२६ १ राज १७:८-१६

☆ 4:27 ४:२७ २ राज ५:१-१४

☆ 4:32 ४:३२ मत्ती ७:२८-२९

35 वयक्कलं वयात ब्वःबियादिल — “हाले मते, सुम्क वयागु म्हं पिहां वा।” अले व मनूयात इमिगु न्ह्यःने छ्वावानाः भूत वयागु म्हं पिहां वल, अय्सां व मनूयात छुं हे मजू।

36 थ्व खनाः इपिं फुक्कं छक्क जुयाः थःथवय् थथे खँ ल्हात — “थ्व गज्याःगु वचन खः? थ्वं ला शक्ति व अधिकार दुम्हय्सिनं थें भूतआत्मातय्त पिहां वनेगु उजं बिल, अले इपिं पिहां नं वन।”

37 थ्व खँ अनं प्यखें बयबय् जुल।

येशू यक्वसित ल्वय् लायकादीगु

मत्ती ८:१४-१७; मार्क १:२९-३४

38 येशू धर्मशास्त्र स्यनीगु छैनं सिमोनयागु छैय् झाल। अबलय् सिमोनया ससःमां तसकं ज्वर वय्काच्चन। अय्जगुलि वयागु ज्वर लाय्काब्यु धकाः इमिसं वय्कःयात बिन्ति यात।

39 व मिसाया न्ह्यःने झायाः वय्कलं ज्वरयात हक्काः दिल। उग्रिमय् वयात ज्वरं त्वःतल। अले व दना वनाः वय्कःपिन्त नके त्वंके याः जुल।

40 सन्ध्याकाः इलय् तःतामछि ल्वय् दुपिं मनूतय्त वय्कःयाथाय् हल। वय्कलं फुक्कसित ल्हातं थियाः लाय्कादिल।

41 तःम्ह मछि मनूतय्गु म्हं नं भूतत थथे धकाः हालाः पिहां वन — “छि परमेश्वरया काय् खः।” वय्कलं इमित हक्काः न्ववाके बियामदी, छायाधाःसा इमिसं वय्कः मुक्ति बीम्ह ख्रीष्ट खः धकाः स्यू।

येशू प्रार्थना यानादीगु

मार्क १:३५-३९

42 कन्हय् खुन्हु सुथ न्हापां प्रार्थना यायेत वय्कः अनं सुनसान थासय् झाल। वय्कःयात मातुमालाः मनूत वय्कःयाथाय् वल। इमिसं वय्कःयात थःपिन्थाय् हे तयेत आपालं कुतः यात।

43 वय्कलं इमित थथे धयादिल — “परमेश्वरया राज्ययागु भिगु खँ मेमेथाय् नं वनाः जिं न्यंके मानि। थ्व हे ज्या यायेत जितः छवयाहयादीगु खः।”

44 थथे वय्कलं यहूदियाय् फुक्कभनं च्वंगु धर्मशास्त्र स्यनीगु छैय् झायाः भिगु खँ स्यनेकने यानादिल।

5

दकलय् न्हापालाक स्वम्ह चेलातय्त सःतादीगु

मत्ती ४:१८-२३; मर्क १:१६-२०

1 छन्हू येशू गनेसरेत धाःगु समुद्र सिथय् दना च्वनादीबलय् ग्वाः ग्वाः मनूत धितुधिनाः परमेश्वरयागु वचन न्यनेत वयक्ःयाथाय् वल।

2 वय्कलं समुद्र सिथय् निगः नांचा दिका तःगु खन। नांथुवाःत नांचा त्वःताः जाः सिलाच्वन।

3 वय्कः सिमोनयागु नांचाय् च्वनाः वयात नांचा भचा न्हाकि धकाः धयादिल। अले अन हे च्वनाः मनूतय्त स्यनेकने यानादिल।☆

4 स्यनेकने याये धुंकाः वय्कलं सिमोनयात धयादिल – “नांचा तःजाःथाय् यंकाः न्या लायेत जाः ह्व।”

5 अले वं लिसः बिल – “गुरूजु, जिमिसं चच्छि जाः ह्वानाः नं छम्ह हे न्या लाये मफु। छिं धयादीगुलि हानं छकः जि जाः ह्वाना स्वये।”☆

6 अले इमिसं लखय् जाः ह्वःबलय् यक्व हे न्या क्यन। थुकि यानाः इमिगु जाः हे गुइत्यन।☆

7 अय्जगुलि इमिसं पासापिन्त ग्वाहालि याः वा धकाः ल्हाःभाय् यानाः सःतल। इपिं वयाः जाः साला काःबलय् निगः नांचा जाय्क न्या दत। न्या यक्व दुगुलि नांचा निगलं लखय् तुना वनी थें च्वन।

8-9 अथे जाः जाय्क न्या क्यंगुलि सिमोन अले व नाप दुपिं मनूत फुक्क अजू चाल, नापं ग्या नं ग्यात। अय्जगुलि सिमोन पन्नुसं येशूयागु पालिइ भ्वपुयाः थथे धाल – “प्रभु, छि जिथासं झासैं, जि पापीम्ह मनू खः।”

10 व नाप ज्या याइपिं जब्दिया काय्पिं याकूब व यूहन्ना नं अजू चाल।

अले वय्कलं सिमोनयात धयादिल – “ग्याये मते, छं न्या लाः जुइ म्वाल, आवनिसें छ मनू लाइम्ह जुइ।”

11 इमिसं नांचा सिथय् सालाहल। अले फुक्कं अन हे त्वःताः इपिं येशू नाप वन।

कोहियात लायकादीगु

मत्ती ८:१-४; मर्क १:४०-४५

☆ 5:3 ५:१-३ मत्ती १३:१-२; मर्क ३:१-१०; ४:१

☆ 5:5 ५:५ यूह २१:३

☆ 5:6 ५:६ यूह २१:६

12 येशू छगू शहरय् झाःबलय् अन छम्ह म्हछम्हं कोहि जूम्ह मनू नापलात। वं वय्कःयात खनाः क्वछुनाः बिन्ति यात – “प्रभु, छिं यय्कादीसा जितः शुद्ध यानादी फु।”

13 अले वय्कलं वयात ल्हातं थियाः थथे धयादिल – “ज्यू, छ शुद्ध जुइमा।” थुलि धायेवं हे वयागु कोहि ल्वय् लाया वन।

14 अले वय्कलं थथे धकाः उजं बियादिल – “न्यँ, थ्व खँ सुयातं कने मते। अयनं पुजाहारीयाथाय् वनाः छिं थःगु ल्वय् लाःगु क्यनाब्यु। अले फुक्कसितं सीकेत व्यवस्थाय् च्वया तः थें माःकथं छायेछी यानाब्यु।”☆

15 अयनं वय्कःयागु खँ न्यंकभनं बयबय् जुयाः वन। अले यक्व हे मनूत वय्कःयागु खँ न्यनेत व ल्वय् लाय्केत वल।

16 तर वय्कः फुक्कसित त्वःताः सुं मदुथाय् याकःचा प्रार्थना याः झाल।

पक्षवातं कःम्ह मनूयात लाय्कादीगु

मत्ती ९:१-८; मर्क २:१-१२

17 छन्हु येशू स्यनेकने यानाच्चवंबलय् फरिसीत व शास्त्रीत नं अन वयाः फ्यतुनाः न्यनाच्चन। इपि गालीलं, यहूदियायागु गां गामं व यरूशलेमं वःपि खः। ल्वय् लाय्केगु शक्ति परमप्रभुं वय्कःयात बियादीगु दु।

18 अबलय् हे छम्ह पक्षवात जूम्ह मनूयात मनूतय्सं लासां नाप क्वबिया वय्कःयाथाय् न्ह्यःने तये हयेत सन।

19 मनूतयगु हुलं यानाः इमिसं वयात दुने यंके मफुत। अले इमिसं कःसि स्यंकाः ल्वगियात लासांनापं येशू च्वनाच्चंगु थासय् क्वछवत।

20 अले वय्कलं इमिगु विश्वास खनाः म्हमफुम्हय्सित थथे धयादिल – “छं यानादीगु पाप क्षमा जुल।”

21 फरिसीत व शास्त्रीतय्सं थथे धकाः मनय् खँ वाय्कल – “परमेश्वरयात क्वह्यांकाः खँ ल्हाइम्ह थ्व सु खः? परमेश्वरं बाहेक सुनां पाप क्षमा याये फइ?”

22 इमिगु मनय् च्वंगु खँ थुइकाः वय्कलं इमित धयादिल – “छिकपिन्सं छाये थज्याःगु मतिइ तयाच्चनागु?

23 ‘छंगु पाप क्षमा जुल’ धायेगु अःपु ला कि ‘दनाः न्यासि हँ’ धायेगु अःपु?

24 संसारय् च्वपिनिगु पाप क्षमा यानाबीत मनूया काय्याके अधिकार दु धयागु खँ छिकपिन्सं सीकि।” अले वय्कलं व पक्षवातं कःम्ह मनूयात थथे धयादिल – “दनाः थःगु लासा ज्वनाः छँ हँ।”

25 उलि धायेवं वं फुक्कसिगु न्ह्यःने दनाः थःगु लासा ज्वनाः परमेश्वरयात जयजय यानाः थःगु छै वन।

26 अन स्वयाच्चर्वि मनूत फुक्क छक्क जुल, नापं ग्या नं ग्यात। अले इमिसं परमेश्वरयात जयजय यानाः थथे धाल – “थौं झीसं अजू चायापुगु ज्या स्वये खन।”

लेवीयात सःतादीगु

मन्ती १:१-१३; मार्क २:१३-१७

27 येशू अनं पिहां झाःबलय कर कायेगु अड्डाय च्वनाच्चंम्ह लेवी धाःम्ह कर काइम्ह मनूयात खनाः वयात सःतादिल – “जि नाप वा।”

28 उघ्रिमय् लेवी फुक्क फाक्कं त्वःताः दनाः वय्कः नाप वन।

29 अनंलि लेवी येशूयात थःगु छैय् भव्य सःतल। भवजय कर काइपि व मेमेपि मनूत नं यक्व दु।

30 फरिसीत व शास्त्रीतय्सं वय्कःया चेलातय्त इमिगु दोष क्यनाः थथे धाल – “कर काइपि व पापीत नाप च्वनाः छिमिसं छाय नयेत्वने यानागु?”☆

31 येशू थःम्ह हे इमित थथे लिसः बियादिल – “छुं मजूपि मनूतय्त डाक्टर माली मखु, ल्वय् दुपिन्त जक माली।

32 उकि ‘जि धर्मी’ धकाः धया जुइपिन्त मखु, बरु पापीतय्त पश्चाताप याकेत सःतः वयागु खः।”

अपसं च्वनेगु खँ

मन्ती १:१४-१७; मार्क २:१८-२२

33 इमिसं वय्कःयात धाल – “यूहन्नाया चेलात व फरिसीतय् चेलातय्सं बरोबर अपसं च्वनेगु व प्रार्थना याः। अय्नं छिकपिनि चेलात धाःसा नया त्वनाजुइ।”

34 अले वय्कलं धयादिल “छु जन्त वःपि मनूत भव्य मनसे लिहांवनी ला? जिलाजं जुइम्ह दतले इपि अपसं च्वनी ला?

35 अथेसां छन्हु ब्याहा याइम्ह मनूयात लिगनाः यनीतिनि। अले तिनि इपि अपसं च्वनी।”

36 अले हानं वय्कलं इमित उखान छपु नं कनादिल। “सुनानं न्हगु वसः खुनाः पुलांगु वसतय् पर्की मखु। थथे याःसा ला झन जक हे वसःनापं गुनावनी, अज्ज ला पुलांगु वसतय् न्हगु कापः ल्वइ नं मखु।

37 “अले हानं सुनानं दाखमघ पुलांगु छेंगूया म्हिचाय् तइ मखु, छायाधाःसा पुलांगु छेंगूयागु म्हिचाय् दाखमघ तल धाःसा म्हिचा हे गुनावनी, अले दाखमघ नं वाइ, म्हिचा नं स्यनी।

38 थथे मयासें, दाखमघ न्हगु म्हिचाय् तयेमाः।

39 पुलांगु दाखमघ त्वना च्वंम्ह मनुखं न्हगु दाखमघ त्वनी मखु, छायाधाःसा पुलांगु हे भिं धकाः वं स्यू।”

6

विश्रामबारयागु खँ

मत्ती १२:१-८; मार्क २:२३-२८

1 विश्रामबार खुन्हु वय्कःपि छवबया लँ झाया च्वंबलय् वय्कःया चेलातय्सं छवमा स्वाहायकाः ल्हातिइ तयाः ब्वब्वस्यानाः नल।*

2 थ्व खनाः फरिसीतय्सं धाल – “विश्रामबार खुन्हु याये मज्यूगु ज्या छिमिसं छाया यानागु?”

3 अले येशू लिसः बियादिल – “दाऊदं थः व थःनाप वःपिनि नये पित्याःबलय् छु यात धयागु खँ छिमिसं ब्वनागु मदु ला?

4 गुकथं वं परमेश्वरया छेंय् दुहां वनाः छायातःगु मरि नल? अले थःनाप वःपिन्त नं नकल।*परमेश्वरयात छायातःगु मरि ला पुजाहारीतय्सं सिबय् मेपिन्सं नये हे मज्यू।”*

5 अले हानं वय्कलं इमित धयादिल – “मनूया काय् विश्रामबारया नं प्रभु खः।”

ल्हाः गंम्ह मनू

मत्ती १२:९-१४; मार्क ३:१-६

6 मेगु विश्रामबार खुन्हु नं वय्कः धर्मशास्त्र स्यनीगु छेंय् झायाः स्यनेकने यानादिल। अबलय् अन जव ल्हाः गंम्ह मनू छम्ह नं दु।

7 शास्त्रीत व फरिसीतय्सं वय्कःयात दोष बीत चेवा यानाच्चन। उकिं इमिसं विश्रामबार खुन्हु नं वय्कलं ल्वय् लायकादी ला कि धकाः स्वयाच्चन।

8 इमिगु मतिइ च्वंगु खँ सीकाः वय्कलं ल्हाः गंम्ह मनूयात धयादिल – “दना वयाः दथुइ च्वँ।” अले व दनाः दथुइ च्वंवल।

* 6:1 ६:१ व्य २३:२५

* 6:4 ६:३-४ १ शमू २१:१-६

* 6:4 ६:४ लेवी २४:९

9 वय्कलं अन च्वंपिन्त धयादिल — “विश्रामबार खुन्हु भिंगु यायेगु ज्यु ला कि मभिंगु यायेगु ज्यु? सुयातं बचय् यायेगु भिं ला कि स्यायेगु भिं? का, थुकियागु लिसः बियादिसँ।”

10 अले वय्कलं इपिं फुक्कसिथाय् मिखा ब्वय्काः ल्हाः गंम्ह मनूयात धयादिल — “ल्हाः तप्यंकि।” वं अथे हे यात। अले वयागु ल्हाः लन।

11 शास्त्रीत व फरिसीत तसकं हे तंम्बल, अले येशूयात छु यायेगु धकाः ग्वसाः ग्वल।

झिनिम्ह प्रेरितत ल्ययादीगु

मत्ती १०:१-४; मर्क ३:१३-१९

12 छन्हु वय्कः पहाडय् प्रार्थना याः झाल। अबलय् चच्छिं हे वय्कलं परमेश्वरयात प्रार्थना यानादिल।

13 कन्हय् खुन्हु सुथय् थः चेलातय्त सःताः इपिं मध्ये झिनिम्हय्सित ल्ययादिल। अले इमित प्रेरितत धकाः नां छुनादिल।

14 थुकथं ल्यःपिं थुपिं खः — सिमोन, गुम्हय्सिगु नां वय्कलं पन्नुस तयादिल, वया दाजु अन्दियास अले याकूब व यहन्ना, फिलिप व बारथोलोमाइ,

15 मत्ती व थोमा, अल्फयसया काय् याकूब, क्रान्तिइ सने धुंकूम्ह सिमोन,

16 याकूबया काय् यहदा, व यहदा इस्करियोत गुम्हय्सिनं लिपा वयाः येशूयात धोखा बिल।

येशू ल्वय् लाय्कादीगु

मत्ती ४:२३-२५; मर्क ३:७-१२

17 अले वय्कःपिं पहाडं क्वहां झाल। अन माथवंथाय् वय्कःया यक्व चेलातनापं यहदियाया फुक्क थासं, यरूशलेमं, समुद्र सिथय् लाःगु टुरोस व सीदोनया इलाकां

18 वय्कःयागु खँ न्येनेत व थथःगु ल्वय् लाय्केत वःपिं ग्वाः ग्वाः मनूत मुनाच्चन। वय्कलं भूतआत्मा दुबिना च्वंपिं मनूतय्त नं लाय्कादिल।

19 फुक्कसिनं वय्कःयात थीत कुतः यानाच्चन, छायाधाःसा वय्कःयात थीवं ल्वय् लायावनी।

पहाडय् बियादीगु उपदेश

मत्ती ५:१-१२

20 येशू चेलातय्त स्वयाः धयादिल —

“छिपिं नये मखं पिं मनूत

धन्यपिं खः ।

परमेश्वरया राज्य छिमिगु हे खः ।

21 छिपिं नयेपित्याका च्वं पिं धन्यपिं खः,

छाय्धाःसा छिमिसं लुधके खनीतिनि ।

आः ख्वया च्वं पिं धन्यपिं खः,

छाय्धाःसा छिपिं लय्ताये दइतिनि ।

22 मनूया काय् नाप जुयाः

मनूतय्सं घृणा याकाजुइपिं धन्यपिं खः,

अले पितिना तःपिं, मभिका तःपिं

व दुष्ट धाय्का च्वनेमाःपिं धन्यपिं खः ।” ☆

23 छिपिं लय्ताया च्वं,

छाय्धाःसा स्वर्गय् छिमित

तःधंगु सिरपाः तयातःगु दु ।

इमि तापाःबाज्यापिन्सं नं

अगमवत्तातय् तथे हे

याना छ्वःगु खः । ☆

24 “आः तःमि जुयाच्वं पिं मनूत —

छिपिं गुलि अभागी,

छाय्धाःसा छिमिसं काये माक्व

आः हे काये दये धुंकल ।

25 आः प्वाः जायक नया च्वं पिं,

छिपिं गुलि अभागी,

लिपा छिमिसं नयेखनी मखु ।

आः न्हिलाः च्वं पिं मनूत,

छिपिं गुलि अभागी,

लिपा छिमिसं दुःख फयेमाली,

अले ख्वयेमाली ।

26 मनूतय्सं भिं धाय्का जूपिं

छिपिं गुलि अभागी,

छायधाःसा इमि तापाःबाज्यापिन्सं नं
मखुपिं अगमवत्तातयत् थथे हे भिंपिं धयाज्जू खः।”

शत्रुतयत् माया यायेगु

मन्ती ५:३८-४८, ७:१२

- 27 “जिं छिमित धाये बांलाक न्यँ, शत्रुतयत् माया या, हेला याइपिन्त भिं या।
28 थःत सराः ब्यूपिन्त सुवाः ब्यु। थःत मभिं याःपिनिगु नितिं प्रार्थना या।
29 सुनानं छिमित न्यतालय् दाल धाःसा मेगु न्यता नं फया ब्यु। सुनानं छिमिगु
गा लाका का वःसा, लं नं त्वया ब्यु।
30 पवं वःपिन्त ब्यु। सुनानं छिमिगु छुं कयाः यंकाः लितबी महःसां हजि धकाः
पवने मते।
31 मेपिन्सं छिमित छु याःसा यः, छिमिसं नं इमित अथे हे या।”☆
32 “थःत माया याइपिन्त जक माया याःसा छिमिसं छु हे तःधंगु यात? पापीतय्सं
नं ला थःत माया याइपिन्त माया याः नि।
33 थःत भिं याइपिन्त जक भिं याःसा छिमिसं छु हे तःधंगु यात? पापीतय्सं नं
ला अथे याः नि।
34 पुले हइपिन्त जक त्यासा बीगु याःसा छिमिसं छु हे तःधंगु यात? पापीतय्सं
नं ला पुले हइपि पापीतयत् त्यासा ब्यू नि।
35 “अयज्जुलि छिमिसं शत्रुतयत् माया यानाः इमित भिं या। लित कायेगु मतिइ
मतसे त्यासा ब्यु। अले छन्त तःधंगु सिरपाः दइ। अले हानं छिपिं दकलय् तःधंम्ह
परमेश्वरया कायपिं जुइ। छिमि परमेश्वर बाःनं लोभीतयत् नं, तसकं मभिपि मनुतयत्
नं, उतिकं हे दया माया यानादी।
36 अथे हे छिपिं नं, बाः थें, दया माया याइपिं जुयाच्चँ।”

कर्पिन्त दोष बीगु

मन्ती ७:१-५

- 37 “कर्पिनिगु न्याय याये मते, अले छिमिगु नं न्याय याइ मखु। कर्पिन्त दोष बी
मते, अले छिमित नं दोष बी मखु। क्षमा ब्यु, अले छिमित नं क्षमा बी।
38 कर्पिन्त ब्यु, अले परमेश्वरं नं छिमित बियादी। छिमिसं फयां फय् मफय्क
कुलि संकाः संकाः दानाः बी। गुलि छिमिसं कर्पिन्त बिल, उलि हे छिमित नं बी।”
39 अले वय्कलं इमित छगू उखान नं कनादिल – “कांम्ह मनुखं कांम्ह मनुयात
ल्हाः ज्वनाः यंकूसा इपिं निम्हं गालय् कुतुं मवनी ला?

40 गुरु स्वयाः चेला तःधं मजू। अथेसां ब्वने गाकाः व नं गुरु थें हे जुइ।☆

41 “थःगु मिखाय् सुपः दुहां वनाच्चंगु मखंम्हय्सिनं थः किजाया मिखाय् धू दुहां वनाच्चंगु खँय् छाया वास्ता याः जुइ माल?

42 थःगु हे मिखाय् च्वंगु सुपः मखंम्हय्सिनं थः किजाया मिखाय् च्वंगु धू लिकयाबी धकाः गथे धाये फइ? हे निपाः ख्वाःपाः दुपिं, न्हापां थःगु मिखाय् च्वंगु सुपः निं लिका। अले तिनि कर्पिनिगु मिखाय् च्वंगु धू खंकाः लिकाये फइ।”

सिमा व फल

मत्ती ७:१५-२०; १२:३३-३५

43 “मभिंगु सिमाय् भिंगु फल सइ मखु। अथे हे भिंगु सिमाय् मभिंगु फल सइ मखु,

44 छायाधाःसा फलं हे सिमा भिं मभिं सीके फइ। कंमाय् यःमरि सया च्वनी मखु। अथे हे कंझालय् नं दाख सया च्वनी मखु।☆

45 भिंम्ह मनूया मतिइ भिंगु हे दइगुलि वं भिंगु भिंगु हे न्ववाइ। अथे हे मभिंम्ह मनूया मतिइ मभिंगु दइगुलि वं मभिंगु हे न्ववाइ, छायाधाःसा मतिइ छु दु, व हे खँ म्हुतुं न्ववाना हइ।”☆

छें दय्कीपिं निम्ह मनूत

मत्ती ७:२४-२७

46 “छिमिसं जिं धयागु खँ न्यने मखुसा, छाया जितः प्रभु, प्रभु, धकाः धायेगु?

47 जिथाय् वयाः जिगु खँ न्यनाः अथे हे याःम्ह मनू गज्याःम्ह जुइ धकाः जिं छिमित कने।

48 व मनू छें दय्कीम्ह मनू थें खः। गुम्हय्सिनं ल्वहंया घःने बल्लाक जग म्हुयाः छें दन। खुसिबाः वलं नं व छें चुइकः यंके मफुत, छायाधाःसा व छें बल्लाक दय्कातःगु खः।

49 जिगु खँ न्यनाः नं अथे मयाइम्ह मनू जग मम्हुसे छें दंम्ह मनू थें खः। खुसिबाः वःबलय् वयागु छें चुइकः यंकल। थुकथं वयागु छें हासनास जुयाः वन।”

7

रोमी कप्तानया दासयात लाय्कादीगु

मत्ती ८:५-१३

☆ 6:40 ६:४० मत्ती १०:२४-२५; यूह १३:१६; १५:२०
मत्ती १२:३४

☆ 6:44 ६:४४ मत्ती १२:३३

☆ 6:45 ६:४५

- 1 मनूतयत् स्यनेकने यानादी धुंकाः येशू कफर्नहुमय् झाल।
 2 अन च्वंम्ह रोमी कप्तानया तसकं यःम्ह छम्ह दास दु। अबलय् वया दास सी थें च्वंक, उसौय् मदयाच्चन।
 3 येशूयागु खँ न्यनाः कप्तानं उसौय् मदया च्वंम्ह वया दासयात लाय्काबीत “वय्कःयात सःता बियादिसँ” धकाः यहूदीतय् थकालिपिन्त बिन्ति यात।
 4 अले इपि वय्कःयाथाय् वयाः थथे बिन्ति यात – “व भिंम्ह मनू खः, वं धाःथें यानादिसँ,
 5 छायाःसा वं झी इस्राएलीतय् माया याः। अले हानं वं झीत धर्मशास्त्र स्यनीगु छैनं दयकाब्यूगु दु।”
 6 अले वय्कः इपि नाप झाल। वय्कःपिं वयागु छैय् थ्यनिथें च्वंबलय् कप्तानं वया पासापिन्त वय्कःयात थथे धाय्के छवयाहल – “प्रभु, छिं जिथाय् झायाः दुःख सियादी म्वाः। प्रभुयात जिगु छैय् सःतेत जि उलि मय्गनि।
 7 अयजूगुलि नं जि छिथाय् वये मछालाः मवयागु खः। अयनं छिं न जक वानादिल धाःसां जिम्ह दास लायावनी।
 8 जिगु क्वय् सिपाइँत दुसां जिगु च्वयनं तःधंपिं मनूत दु। जिं सिपाइँतय् ‘वा’ धाःसा इपि वइ। अले ‘हुँ’ धाःसा वनी। अथे हे दासयात ‘थथे या’ धाःसा वं अथे हे याइ।”
 9 थ्व न्यनाः येशू अजू चायाः लिफः स्वयाः ल्यूल्यू वःपिं मनूतयत् थथे धयादिल – “थज्याःगु विश्वास याइम्ह मनू ला जिं इस्राएलय् छम्ह नं मखनानि।”
 10 कप्तानं छवयाहःपिं मनूत छैय् लिथ्यंबलय् उसौय् मदया च्वंम्ह दासयागु ल्वय् लाये धुंकल।

भाःत सीधुंकूम्ह मिसाया काय्यात म्वाकादीगु

- 11 कन्हय् खुन्हु वय्कः नाइन धाःगु शहरय् झाल। वय्कःया चेलात व मेपिं मनूत नं यक्व हे वय्कः नाप वन।
 12 शहरया ध्वाखाय् थ्यनी थें च्वंबलय् भाःत सीधुंकूम्ह छम्ह मिसाया याकः काय् सिथं हयाच्वंगु नापलात। शहरय् च्वंपिं यक्व मनूत सनां वःगु दु।
 13 व मिसायात खनाः प्रभुयात माया वन। अले स्वये मफयाः वय्कलं धयादिल – “ख्वये मते।”
 14 लिक्क झायाः वय्कलं कृताः थियादिल। सी क्वबिया वःपिं मनूत तक्क दित। वय्कलं धयादिल – “बाबु देँ।”

15 अले ला सीम्ह मनुखं दनाः न्ववात। अले वय्कलं वयात वया मांयात लःल्हाना बिल।

16 इपि फुक्कं छक्क जुयाः ग्यात, अले थथे धकाः परमेश्वरयात जयजय यात — “दकलय् तःधम्ह अगमवक्ता छम्ह झीथाय् झायादीगु दु। परमेश्वर हे वय्कःया मनूतय्थाय् झायादिल।”

17 थ्व खँ यहूदिया जिल्लाय् फुक्कभनं व लिक्क लिक्क लाःगु गांगामय् बयबय जुल।

बप्तिस्मा बीम्ह यूहन्नायागु खँ

मत्ती ११:२-१९

18 यूहन्नाया चेलातयसं कुनातःम्ह यूहन्नायात अथे जूगु खँ फुक्कं कनाबिल।

19 थ्व खँ न्यनाः वं निम्ह चेलातय्त प्रभुयात थथे धाय्के छवल — “झायादी माःम्ह छि हे खः ला कि जिमिसं मेम्हयसिगु लँ स्वयाच्चने मानि?”

20 इमिसं वय्कःयाथाय् वयाः थथे धाल — “बप्तिस्मा बीम्ह यूहन्ना जिमित छिथाय् छवयाहःगु खः। जिमिसं छिके न्यनेमाःगु खँ दु। झायादी माःम्ह छि हे खः ला कि जिमिसं मेम्हयसिगु लँ स्वयाच्चने मानि?”

21 अबलय् हे वय्कलं तःतामछि ल्वय् दुपि यक्व मनूतय्त लाय्कादिल। अले भूतआत्मा दुबिना च्वंपिन्त नं लाय्कादिल। अले हानं यक्व कापि मनूतय्त मिखां खंका बियादिल।

22 वय्कलं इमित लिसः बियादिल — “छिमिसं छु छु खना व न्यना, यूहन्नायात वनाः व हे धयाब्यु। कापिन्सं मिखां खन, लंग्रात न्यासि वने फत, कोहित लाया वन, ख्वाँय्तय्सं ताल, सीपि मनूत म्वानावल, अले मगाःमचाःपिन्सं भिंगु खँ न्यने खन।”

23 सुनां जिगु खँय् शंका याइ मखु व धन्यम्ह खः।”

24 यूहन्नाया चेलात वने धुंकाः येशू मनूतय्त यूहन्नायागु खँ कनादिल — “मस्मूमिइ वनाः छिमिसं छु स्वया? फसं संका च्वंगु तिकथि स्वःवनागु ला?

25 मखुसा छिपिं छु स्वयेत वनागु लय्? बाबांलाःगु वसतं पुनातःपि मनूतय्त स्वःवनागु ला? बाबांलाःगु वसतं पुना तइपिं ला लाय्कुलिइ जक दइ, छायाःसा बांलाक तियाः नयाः मोजमज्जा यानाजुइपि ला अन जक दइ।

26 धातथे छिपिं छु स्वः वनापि? अगमवक्तायात स्वःवनागु ला? खः, जिं धाये — यूहन्ना अगमवक्ता स्वयाः यक्व तःधं।

27 थ्वयागु खँ धर्मशास्त्रय् थथे च्वयातःगु दु –

“ जिं जिम्ह दूतयात छंगु न्ह्यः न्ह्यः छवयाबी।
वं हे छंगु निंति लँ दय्काबी।’☆

28 “जिं छिमित धातथें धाये – यूहन्ना स्वयाः तःधंम्ह मनू मेम्ह मदु। अथेसां परमेश्वरयागु राज्यया दक्खिसिबय् चिधंम्ह मनू नं व स्वयाः तःधं जुइ।”

29 थ्व न्यनाः फुक्क मनूतय्सं व कर काइपिं मनूतय्संनापं यूहन्नायापाखें बप्तिस्मा कयातःगुलि परमेश्वर सत्य खः धकाः सीकल।☆

30 फरिसीत व शास्त्रीतय्सं धाःसा परमेश्वरयागु खँ न्यँ हे मन्यं। इमिसं यूहन्नायागु बप्तिस्मा नं मकाः। थुकथं इमिसं परमेश्वरयागु खँयात वास्ता मयाः।

31 अले येशू हानं थथे धयादिल – “थौकन्हय्यापिं मनूतय्त छु नाप दाँजय् यायेगु? थुपि गज्याःपिं मनूत खः?”

32 थुपि ला बजारय् च्वनाः पासापिलिसे थःथवय् थथे खँ ल्हाइपिं मस्त थें च्वं

“ जिमिसं बाँसुरी पुयाः नं
छिपि प्याखं मल्ह,
जिमिसं सी बाजं थानाः नं
छिपि मख्वः।’

33 “दाखरस मत्वनीम्ह व मरि मनइम्ह बप्तिस्मा बीम्ह यूहन्ना वलं छिमिसं वयात ‘भूत दुब्ज्यूम्ह मनू’ धकाः धाल।

34 मनूया कायनं नयेत्वने याना जुल। छिमिसं वयात ‘नगुलु, अय्लाःगुलुत, कर काइपिं व पापीतय् पासा’ धकाः धयाजुल।

35 परमेश्वरयागु बुद्धि दुम्हय्सिनं हे वय्कःयागु बुद्धियात नाला काइ।”

सिमोन फरिसीयागु छँय् येशू

36 छन्हु छम्ह फरिसी थःगु छँय् येशूयात भवय् नयेत सःतल। अले वय्कः वयागु छँय् वनाः भवय् नयेत ग्वतुलाः खव ल्हातय् छयं दिका च्वनादिल।

37 वय्कः फरिसीयागु छैय् दु धकाः न्यनाः छम्ह पापी मिसा दुस्त्वहंयागु थल छगलय् नस्वाःगु चिकं ज्वनाः वय्कःयाथाय् वल।*

38 वय्कःयागु तुति ल्युने दनाः ख्वख्वं वय्कःयागु तुति थःगु ख्वबिं प्याकल। अले वं वय्कःयागु तुति थःगु सं हुयाबिल। वय्कःयागु पालिइ चुप्पा नयाः वं चिकनं थाका बिल।

39 थ्व खनाः भ्वय् सःतुम्ह फरिसीं मनं मनं थथे खँ वाय्कल – “थ्व मन् अगमवत्ता खःसा ला वयात थिया च्वंम्ह मिसा सु खः, अले गज्याःम्ह खः धकाः सीके फयेमाःगु खः, छायाःसा थ्व मिसा ला छम्ह पापीनी खः।”

40 अले वय्कलं वयात धयादिल – “सिमोन, जिं छन्त छता खँ धायेमाःगु दु।”
अले वं धाल – “गुरुजु, धयादिसँ।”

41 “छम्ह साहुनं निम्ह मनूतय्त धिबा त्याये बियातःगु दु। छम्हय्सित न्यासः, अले मेम्हय्सित न्ययतका।

42 इपिं निम्हय्सिनं नं दां पुले मफुगुलि साहुनं निम्हय्सितं फुक्क दां माफी बियाछवत। आः इपिं निम्ह मध्ये साहुयात सुनां अप्वः माया याइ थें च्वं, धा सा?”

43 वं लिसः बिल – “जिं स्वयेबलय् ला अप्वः दां त्याये कयातःम्ह मनुखं याइ।”

अले वय्कलं वयात धयादिल – “छं ठीक धाल।”

44 अले वय्कलं मिसायात क्यनाः सिमोनयात धयादिल – “छं थ्व मिसायात म्हस्य् ला? जि छंगु छैय् वयाबलय् तुति सिलेत लः तक नं मब्बु। वं ख्वबि हाय्काः जिगु पालि सिलाः थःगु सं हुयाबिल।

45 जि छिगु छैय् वयाबलय् जितः दुकायेत चुप्पा मनः। तर वं जि थन वसानिसें जिगु पालिइ चुप्पा नयाच्चन।

46 छिं जिगु छेनय् चिकनं थाका बियामदी तर वं जिगु पालिइ चिकनं थाका बिल।

47 “अय्जुगुलि जिं छितः धाये – वं याःगु यक्व पाप क्षमा जूगुलि वं यक्व माया यात। सुयागु कम जक पाप क्षमा जुइ, वं कम हे जक माया याइ।”

48 अले वय्कलं मिसायात धयादिल – “छंगु पाप क्षमा यानाबी धुन।”

49 वय्कः नाप मेपिं नं नयाच्चंगु दु। वय्कलं अथे मिसायात धयादीगु न्यनाः इपिं थःथवय् थथे खुसखुस खँ ल्हात – “थ्व सु खः, हाई? पाप हे क्षमा बी फुम्ह?”

50 वय्कलं मिसायात धयादिल — “छंगु विश्वासं याना: छंगु उद्धार जुल। आ: याउँक हूँ।”

8

येशूया ल्यूल्यू जुइपि मिसात

1 अनं लिपा वय्कलं शहर पतिकं व गांगामय् चा:हुला: परमेश्वरयागु राज्ययागु भिंगु खँ न्यंकादिल। वय्क: नाप झिनिम्ह चेलात नं दु।

2 वय्कलं ल्वय् लाय्का त:पि मिसात व भूत आत्मात पितिनाछ्व:पि मिसातय्सं नं वय्क:यात मत्व:तू। इपि ख: — मरियम मगदलिनी (थ्व मिसायागु म्हं न्हयम्ह भूतआत्मातय्त पितिनाछ्व:गु ख:)

3 अले हेरोदया छम्ह कजी खूजासया कला: योअन्ना, सुसन्ना व मेपिं यक्व मिसात नं वय्क: नाप जूगु दु। थ्व मिसातय्सं वय्क:यात माक्व धिबा बिया: ग्वाहालि या:।☆

पुसा ह्वलीम्हय्सिगु उखान

मत्ती १३:१-९; मर्क ४:१-९

4 थाय् थासय् च्वपि व गांगामय् च्वपि यक्व मनूत येशूयाथाय् मुंवल। अले वय्कलं इमित उखान छपु कनादिल।

5 “छम्ह मनू बुँइ पुसा ह्व: वन। वं पुसा ह्व:बलय् गुलि गुलि पुसा लैय् नं लात, अले अन ला:गु पुसा मनूतय्सं न्हुल। झंग:तय्सं नं वया: नयाबिल।

6 गुलि पुसा ल्वहलि दुथाय् लात। अन ला:गु पुसा बुयाव:सां बैं मप्या:गुलि याकनं हे सिनावन।

7 अले हानं गुलि पुसा कंमा दुथाय् लात। कंमा त:मा जुया व:बलय् अन ला:गु पुसा थाहां वये मफुत।

8 अले गुलि पुसा भिंगु चा दुथाय् लात। थ्व पुसा त:मा जुया: सछिदुगं अप्व: अन्न सल।” सुयाके न्हाय्पं दु वं न्यना का। थुलि धया: वय्कलं उखान क्वचाय्कादिल।

थ्व उखानयागु अर्थ

मत्ती १३:१०-१७; मर्क ४:१०-१२

9 वय्क:या चेलातय्सं थ्व उखानयागु अर्थ कनाब्यु धका: धा:गुलि

10 वयकलं थये धयादिल – “परमेश्वरयागु राज्ययागु गुप्ति खँ छिमित सीकेबी धुंकूगु दु। मेपिन्त धाःसा जिं उखान छुनाः धया, थुकथं धर्मशास्त्र पूरा जुइमा,

“ ‘इमिसं स्वयाः नं मखनेमा,
अले न्यनाः नं मथुइमा।’ ”☆

11 “उखानयागु अर्थ थ्व खः – पुसा परमेश्वरयागु वचन खः।

12 लैय् लाःगु पुसा परमेश्वरयागु वचन न्यंसां नुगल्य् तयातइमखुपि मनुत खः। शैतानं वयाः इमिसं न्यंगु वचन फुक्कं इमिगु नुगलं लिंकया यंकी, अले विश्वास याये मफयाः इपिं बचय् जुइ नं फइ मखु।

13 ल्वहं दुथाय् लाःगु पुसा परमेश्वरयागु वचन न्यनाः लयल्यतायाः विश्वास याइपिं मनुत खः। अयनं वचन इमिगु दुनुगल्य् थ्यंक दुहां मवंगुलि इमिसं छुं ई तक जक विश्वास याइ। दुःखकष्ट वयेवं इमिसं विश्वास यायेगु त्वःताछवइ।

14 कंमाय् लाःगु पुसा इपिं खः सुनां परमेश्वरयागु वचन न्यनाः नं धन सम्पत्तियागु माया कयाजुइ व संसारयागु खँय् च्यूताः तया जुइ। थुकथं इमिसं विश्वास याये फइ मखु।

15 अले भिंगु चा दुथाय् लाःगु पुसा इपिं खः – सुनां परमेश्वरयागु वचन भिंगु मति न्यनाः नुगल्य् दुने थ्यंक स्वथना तइ। अले थुमिसं क्वातुक विश्वास यानाः फल सय्की।”

त्वाःदेवाय् च्वंगु मत

मर्क ४:२१-२५

16 “मत च्याकाः सुनानं त्वपुया तइ मखु, खाता तःले नं तइ मखु। छैय् वःपिन्त जः खयेमा धकाः मतयात त्वाःदेवाय् तया तइ।☆

17 सुचुकातःगु फुक्कं सीदयावइ। त्वपुयातःगु फुक्कं खने दयावइ।☆

18 “अय्जगुलि बांलाक मन बियाः न्यनेगु या, छायाधाःसा सुयाके दु वयात अज्जं बी। अले सुयाके मदु, वयाके दुगु नं लाका काइ।”☆

येशूया मां व किजापि

मत्ती १२:४६-५०; मर्क ३:३१-३५

☆ 8:10 ८:१० यशै ६:९-१० ☆ 8:16 ८:१६ मत्ती ५:१५; लूका ११:३३ ☆ 8:17 ८:१७ मत्ती १०:२६;
१२:२ ☆ 8:18 ८:१८ मत्ती २५:२९; लूका १९:२६

19 छन्हू वय्कःया मां व किजापिन्सं वय्कःयात नापलाः वल। ग्वाः ग्वाः मनूत मुनाच्चंगुलि नापलाये मफुत।

20 छम्हयसिनं वनाः वय्कःयात धाल – “छितः नापलायेत छिकपिनि मां व किजापिं वयाच्चंगु दु। इपिं पिने पियाच्चंगु दु।”

21 वय्कलं इमित लिसः बियादिल – “परमेश्वरयागु वचन न्यंपिं व मानय् याइपिं हे जि मां व किजापिं खः।”

ग्वःफय्यात दिकादीगु

मत्ती ८:२३-२७; मार्क ४:३५-४१

22 छन्हू येशू चेलात नाप नांचाय् च्वनादिल। अले इमित धयादिल – “झीपि समुद्रया पारिइ वनेनु।” अले इमिसं नांचा न्ह्याकल।

23 वँव हे वय्कः न्ह्यः वय्कादिल। थुबलय् हे समुद्रय् तसकं ग्वःफय् वल। अले नांचाय् लः जाया वयाः इपिं दुबय् जुइन।

24 चेलातय्सं वयाः वय्कःयात थथे धयाः थन – “गुरुजु, गुरुजु, झीपि दुबय् जुइन।”

वय्कलं दनाः ग्वःफय्यात व लःद्वम्बःयात हक्काः दिल। अले ग्वःफय् नं दित, लः नं मसन।

25 वय्कलं इमित धयादिल – “छिमिगु विश्वास ग्व?”

इपिं तसकं अजू चायाः ग्या नं ग्यात। अले थःथवय् थथे खँ ल्हात – “थ्व मनू सु खः हं? थ्वं धाःगु खँ फसं व लखं नं न्यं।”

भूत दुब्यूमह मनूयात लाय्कादीगु

मत्ती ८:२८-३४; मार्क ५:१-२०

26 अले वय्कःपिं गालील समुद्रयागु पारिइ च्वंगु गेरासेनस जिल्लाय् झाल।

27 नांचां क्वहां वयेवं वय्कलं अन भूत दुब्यूमह छम्ह मनूयात नापलात। वं लं मफ्यगु ताःई दये धुंकल। व छेंय मच्चैसे दिपय् जक च्वनाच्चंम्ह खः।

28 वय्कःयात खनेवं व पिच्याना हालाः तुतिइ भवपू वल। अले तःसलं हालाः थथे धाल – “हे दक्कसिबय् तःधंम्ह परमेश्वरया काय् येशू, छिं जितः छु याये मास्ति वः? जितः दुःख बियादी मते।”

29 वय्कलं भूतआत्मायात – “वयाथासं पिहां वा” धकाः धयादीगुलि वं अथे धाःगु खः। थ्व मनूयाके तःकः मछि हे भूत दुबी धुंकल। नेवलं ल्हाःतुति चिनातःसां वं भूतयागु शक्तिं नेवः चफुनाः मरुभूमिइ बिस्युं वनीगु जुयाच्चन।

30 येशू वयाके न्यनादिल – “छंगु नां छु?”

अले वं लिसः बिल – “जिगु नां पल्टन खः।” यक्व भूत आत्मात दुबिना च्वंगुलि वं अथे धाःगु खः।

31 अले भूत आत्मातय्सं “जिमित तःजाःगु गालय् छवयादी मते” धकाः वय्कःयात बिन्ति यात।

32 अबलय् हे पाःचाय् छगू बथां फा त्वःतातःगु दु। भूत आत्मातय्सं फातय्गु म्हय् वनेब्यु धकाः वय्कःयात बिन्ति यात।

वय्कलं इमित वनेबिल।

33 अले भूत आत्मात व मनूया म्हं पिहां वयाः फातय्के दुबित। अले फात फुक्कं व्वाँय् वनाः भीरं क्वव्वां वनाः समुद्रय् दुबय् जुयाः सित।

34 थ्व खनाः फा जवाःत अनं बिस्युं वन। अले इमिसं थ्व खँ शहर व गांगामय् बयबय् याः जुल।

35 अले मनूत छु जूगु स्वयेत अन वल। इपि अन थ्यंबलय् भूत दुब्यूमह मनू जियाः लं फिनाः येशूया लिक्क च्वनाच्वंगु खन। थ्व खनाः इपि ग्यात।

36 अले खंपिन्सं इमित गुकथं भूत दुब्यूमह मनूयात लाय्कल धयागु फुक्क कनाबिल।

37 अले गेरासेनस जिल्लाय् च्वंपि मनूतय्सं ग्यानाः वय्कःयात अनं पिहां झासँ धकाः बिन्ति यात।

उकिं वय्कः नांचाय् च्वनाः लिहां झाल।

38 व लाःम्ह मनुखं वय्कः नाप वनेत स्वल, तर वय्कलं वयात थथे धयाः छैय् छवयाबिल –

39 “थःगु छैय् वनाः परमेश्वरं छन्त गुलि तःधंगु ज्या यानाबिल धकाः न्यांकि।” अले वं वनाः शहर पतिकं वयात येशू यानादीगु तःधंगु ज्या बयबय् याः जुल।

सीम्ह मचा व मफुम्ह मिसा

मन्ती ९:१८-२६; मर्क ५:२१-४३

40 येशू लिहां झाःबलय् वय्कःयात पियाच्वंपि मनूत फुक्कं लयलयताल।

41 धर्मशास्त्र स्यनीगु छैयाम्ह कजी याइरसं वयाः वय्कःया तुतिइ भवपुयाः “जिगु छैय् झासँ” धकाः बिन्ति यात,

42 छायाधाःसा वया झिनिदै दुम्ह याकः म्हाय् सी थें च्वंक उसौय् मदयाच्वन।

वयागु खँ न्यनाः वय्कः व नाप झाल। वय्कः थथे झायेत्यंगुलि मनूतय्सं वय्कःयात घ्वान्तु घ्वात।

43 हुलय झिनिदंनिसें हि क्वहां वइगु ल्वचं कयाच्चंम्ह छम्ह मिसा नं दु। वयागु ल्वय् सुनानं हे लाय्के मफु।

44 ल्यूनें वया: वं वय्कःयागु गाच्च: थिल। उघ्रिमय् हे वयागु हि क्वहां वइगु ल्वय् लन।

45 वय्कलं धयादिल – “जित: सुनां थिल हं?”

सुनानं थिया धका: मधा:। अले पन्नुसं धाल – “गुरूजु, उलिमछि मनूतय्सं छित: घ्वातु घ्वानाच्चंगु दु।”

46 अयनं वय्कलं धयादिल – “जित: सुनानं थ्यूगु हे ख:। जिगु म्हं शक्ति पिहां वंगु जिं चा:।”

47 व मिसां वय्कःयात थ्यूगु खँ वय्कलं सी धुंकल धका: ताय्का: ग्याग्यां वय्कःयागु तुतिइ भवपू वल। अले वं वय्कःयात थिया: थ:गु ल्वय् ला:गु खँ फुक्कसिगु न्ह्य:ने धयाबिल।

48 अले वय्कलं धाल – “केहँ मय्जु, छं विश्वास या:गुलि छंगु ल्वय् लन। आ: याउँक हँ।”

49 उबलय हे कजीया छँनं छम्ह मनू वया: वयात थथे धाल – “छिम्ह म्हाय् सी धुंकल, अयजूगुलि गुरूजुयात दु:ख बियादी म्वा:ल।”

50 थ्व न्यना: वय्कलं याइसयात थथे धयादिल – “ग्यानादी म्वा:, छिं विश्वास जक यानादिसँ। छिकपिनि म्हाय् म्वाइ।”

51 छँय थयंका: वय्कलं पन्नुस, यूहन्ना, याकूब व सीम्ह मचाया मां बौयात जक मचा दुथाय् दुत यंकादिल। मेपिं सुयातं दुकयामदी।

52 अन च्वंपि फुक्कं मचा सीगुलि नुग:पा दादां ख्वयाच्चन। वय्कलं इमित धयादिल – “ख्वये मते। मचा सीगु मखु, न्ह्य: वय्काच्चंगु ख:।”

53 थ्व न्यना: इमिसं वय्कःयात गिजय् यात, छाथ्धा:सा इमिसं मचा सीगु हे ख: धका: बांलाक सी धुंकल।

54 मचायागु ल्हा: ज्वना: वय्कलं थथे धका: थनादिल – “नानी, दँ।”

55 अले वयागु आत्मा लिहां वल, उघ्रिमय् व जुस्वक दन। अले वयात छुं नकेत बियादिसँ धका: वय्कलं धयादिल।

56 वया मांभौ ला तसकं अजू चाल। वय्कलं थ्व खँ सुयातं कने मते धका: इमित उजं बियादिल।

9

झिनिम्हयसित भिंगु खँ न्यंके छवयादीगु

मत्ती १०:५-१५; मर्क ६:७-१३

1 छन्हु येशू झिनिम्ह चेलातयत् थःथाय् सःताः इमित भूततयत् ख्यानाः छवयेगु व उसौय् मदुपिन्त लायकाबीगु शक्ति व अधिकार बियादिल।

2 अले वय्कलं परमेश्वरयागु राज्ययागु खँ न्यंकेत व त्वय् लायकाबीत इमित छवयादिल।

3 वय्कलं इमित धयादिल — “लँय् छिमिसं छुं हे ज्वनावने मते। तुतां, म्हिचा, नसा, धिबा व हिला वसः नं यंके मते।

4 न्ह्याम्हयसिगु छँय् बाय् च्वंसां छिपि मेथाय् वने मत्यंतले व हे छँय् च्वँ।

5 सुनानं छिमित दुमकाःसा, भिंगु खँ मन्यंसा छिमिसं इमित लज्या चाय्केत पालि च्वंगु धू तकं थाथा यानाः व थाय् त्वःता हूँ।”☆

6 अनंलि गांगामय् वनाः इमिसं भिंगु खँ न्यंकाः मनूतयगु ल्वय् लायकाबीगु यात।

जुजु हेरोद अलमलय् लाःगु

मत्ती १४:१-१२; मर्क ६:१४-२९

7 गालीलयाम्ह शासक हेरोद येशूयागु खँ न्यनाः अलमलय् लात, छायाःसा गुलि गुलिसिनं ला बप्तिस्मा बीम्ह यूहन्ना म्वानावःगु धकाः नं धयाजुल।

8 गुलिसिनं एलिया वःगु धकाः धाल। गुलिसिनं ला न्हापायापिं अगमवत्तात मध्ये सुं छम्ह म्वानावःगु जुइमाः धकाः नं धाल।☆

9 अले हेरोदं धाल — “यूहन्नायागु छयं ला जिं धयंके धुन। थ्व सु मनू जुल, गुम्हयसिगु बारे जिं थुलिमछि खँ न्यनाच्चना?” अले हेरोदं वय्कःयात तसकं स्वयेमास्ति वय्कल।

न्यादुः मनूतयत् नकादीगु

मत्ती १४:१३-२१; मर्क ६:३०-४४; यूह ६:५-१३

10 प्रेरिततयसं लिहां वयाः इमिसं यानावःगु ज्याखँ फुक्क येशूयात कन। अले इमित ब्वनाः वय्कः सुनानं मसीक बेथसेदा शहरय् झाल।

☆ 9:5 ९:३-५ लूक १०:४-११; प्रे १३:५१

☆ 9:8 ९:७-८ मत्ती १६:१४; मर्क ८:२८; लूक ९:१९

११ थ्व खँ सीकाः ग्वाः ग्वाः हे मनूत वय्कःया ल्यूल्यू वन। वय्कलं इमित लसकुस यानादिल। अले इमित परमेश्वरयागु राज्यया खँ कनादिल। ल्वय् लाय्के माःपिन्त नं लाय्कादिल।

१२ बहनी जुइत्यंगुलि झिनिम्ह चेलातय्सं वय्कःयाथाय् वयाः थथे धाल – “थन ला छुं हे मदु। आः थ्व मनूतय्त थनं छवयादिसँ। अले लिक्क लिक्क लाःगु गांगामय् वनाः नयेगु व बाय् च्वनेगु याइ।”

१३ वय्कलं धयादिल – “इमित छिमिसं हे नकि।”

अले इमिसं धाल – “जिमिके ला न्यापा मरि व निम्ह न्या जक दु। थुलिमछिसित नकेत ला न्याः हे वनेमानि का।”

१४ अन मिजंत जक हे न्याद्रः दु।

वय्कलं चेलातय्त धयादिल – “नेय्म्ह नेय्म्ह यानाः इमित इवःलाक फ्यतुकि।”

१५ इमिसं वय्कलं धयादी थें मनूतय्त फ्यतुकल।

१६ वय्कलं व न्यापा मरि व निम्ह न्या कयाः परमेश्वरयात सुभाय् बियाः कुचा थलाः मनूतय्त इनाब्यु धकाः चेलातय्त बियादिल।

१७ अले इमिसं यतले नल। इनाः ल्यं दुगु कुचाकाचा जक हे झिनिगः दाला जाय्क दु।

येशू मुक्ति बीम्ह ख्रीष्ट खः

मत्ती १६:१३-२०; मर्क ८:२७-२९

१८ छन्हु येशू याकःचा प्रार्थना यानाच्चवंबलय् चेलात वल। अले वय्कलं इमिके न्यनादिल – “मनूतय्सं जितः सु धकाः धयाजुल?”

१९ इमिसं धाल – “गुलिसिनं बप्तिस्मा बीम्ह यूहन्ना धाइगु, अले गुलिसिनं एलिया धाइगु, गुलिसिनं ला न्हापायापि अगमवक्तात मध्ये सुं छम्ह म्वानावःगु जुइ धकाः धाइगु।”☆

२० अले वय्कलं इमित धयादिल – “छिमिसं जितः सु खः धयाच्चना लय्?”

पन्हुसं लिसः बिल – “छि परमेश्वरयाम्ह मुक्ति बीम्ह ख्रीष्ट खः।”☆

२१ वय्कलं थ्व खँ सुयातं कने मते धकाः कडा आज्ञा बियादिल।

22 हानं धयादिल – “मनूया कायन् यक्व हे दुःख सी मानि। थकालिपिं, तःधंपि पुजाहारीत, व शास्त्रीतय्स् वयात मानय् याइ मखु, बरु वयात स्याइ, स्वन्हु लिपा व हानं म्वाना वइ।”

गथे याना: येशूया चेला जुइगु

मत्ती १६:२४-२८; मर्क ८:३४-३८

23 येशू फुक्कसितं धयादिल – “जि नाप वयेगु जूसा छिपिं सुनानं थःगु खँय् छुं हे च्यूता: तये मते। अले थःगु क्रूस थःम्हं हे क्वबिया सीत तकं लिमच्युसे जिगु ल्यूल्यू वा।”☆

24 थःगु प्राण बचय् यायेत जक स्वइम्ह मनू नाश जुयावनी। सुनां जिगु निति थःगु प्राण पाइ व बचय् जुइ।☆

25 सारा संसार हे ल्हातय् दया: नं व मनू सिनावन धा:सा वयात छु दइ? वं हानं थःगु प्राण छुकिं लिप्याना काइ?

26 सुनां जि खना: व जिगु खँ न्यना: ख्वा: फस्वय्की मनूया कायन् स्वर्गदूततल्लिसे झःझः धाय्क परमेश्वर बा:नं छवया हइबलय् व खना: नं ख्वा: फस्वय्की।

27 जिं छिमित धाथे धाये – परमेश्वरयागु राज्य मखंतले थन दुपिं मध्ये गुम्हं गुम्हं ला सी तकं मखुनि।”

येशूयागु रूप ह्युगु

मत्ती १७:१-८; मर्क ९:२-८

28 अथे धयादीगु च्यान्ह दय्का: पन्हुस, यूहन्ना व याकूबयात ब्वना: येशू पर्वतया च्वय् प्रार्थना या: झाल।

29 प्रार्थना यानाच्चनादीबलय् वय्कःयागु ख्वा: तसकं थिनावल, अले वय्कलं पुनातःगु वसः नं तसकं यचुसे त्वइसे च्वना वल।

30 अबलय् मोशा व एलिया, थुपिं निम्ह वय्कः नाप खँ ल्हानाच्चन।

31 इपिं नं स्वर्गयागु जलं तसकं झल झल थीक खने दयाच्चन। यरूशलेमय् येशू गथे जुया: सी माली धका: इपिं वय्कः नाप खँ ल्हानाच्चंगु खः।

32 अबलय् पन्हुस व नाप दुपिं फुक्कं मस्तं न्ह्यः वय्काच्चन। न्ह्यलं चा:बलय् इमिसं वय्कः झल्ल थिनाच्चंगु व वय्कः नाप मेपिं निम्ह मनूतय्त नं खन।

33 इपिं वयकः नाप बाया वनेत्यंबलय् लाक्क पन्नसं वयकःयात धाल – “गुरुज्जु, झीपिं थन हे च्वने दत धाःसा गुलि बांलाइ। जिमिसं स्वंगू बल्चा दय्के ला? छगू छितः, छगू मोशायत व मेगु छगू एलियायात।” पन्नसं व धाये थ्व धाये मसियाः अथे धाःगु खः।

34 वं अथे जक छु धाये लात सुपॉय् वयाः इमित त्वपुल। सुपॉचं अथे त्वपू वःगु खनाः इपिं ग्यात।

35 अले सुपॉचं थथे धकाः न्ववाना हल – “थ्व जिं ल्यया तयाम्ह जिमह काय् खः, थ्वयागु खँ न्याँ।” ☆☆

36 अनंलि इमिसं अन येशू याकःचा जक खन। इमिसं थ्व खँ सुयातं मकंसे थथःगु नुगलय् तया तल।

भूत दुब्बूम्ह मचायात लाय्कादीगु

मन्ती १७:१४-१८; मर्क ९:१४-२७

37 कन्हय् खुन्हु वयकःपिं पर्वतं क्वहां झाःबलय् मनूत वयकःयात नापलाः वल।

38 हुलं छम्ह मन् चिल्लाय्दनाः हाला हल – “गुरुज्जु, जिमि काय्यात छकः स्वयादिसँ। जि थ्व हे छम्ह जक काय् दु।

39 झाःझाः थ्वयात भूतआत्मां त्वपू वइगु, अले थ्व चिल्लाय् दनाः चत्ताः वाःवनिगु। अले म्हुतुं ई बुल्ल बुल्ल वय्काहइगु। तसकं घाःपाः मजुतले भूतं थ्वयात त्वःती हे मखु।

40 जिं छिकपिनि चेलातय् भूतआत्मायात पितिना बियादिसँ धकाः धयां इमिसं पितिनाछवये मफुत।”

41 अले वय्कलं चेलातय् धयादिल – “छिमिसं गथे जक विश्वास याये मफुगु? जि छिपिनाप ग्वःन्हु हे च्वनी धकाः? जिं छिमिगु नितिं गुलि जक दुःख सह यानाच्वनेगु?” अले वय्कलं व मनूयात धयादिल। “छिमि काय्यात थन हजि।”

42 मचायात हहं हे भूतं वयात कसाः यानाः छावात। अले वय्कलं भूतआत्मायात हक्कादिल। थुकथं मचायात लाय्काः वया अबुयात लःल्हानादिल।

43 अन च्वपिं फुक्क परमेश्वरयागु तःधंगु शक्ति खनाः अजू चाल।

येशू हानं थः सीगु खँ कनादीगु

मत्ती १७:२२-२३; मर्क ९:३०-३२

वय्कलं यानादीगु ज्या खनाः मनूत अजू चाया च्वंबलय् हे वय्कलं चेलातय्त धयादिल –

44 “जिगु थ्व खँ बांलाक न्यना ति। मनूया काय्यात ज्वनाः मनूतय्गु ल्हातय् लःल्हाइगु ई वइन।”

45 वय्कलं अथे धयादीगु इमिसं थुइके मफुत। थुइके मफयेमा धकाः हे थ्व खँ त्वपुयातःगु खः। अयनं इमिसं वय्कःयाके थ्व खँ न्यनेत ग्यात।

दकलय् तःधंम्ह सु?

मत्ती १८:१-५; मर्क ९:३३-३७

46 चेलातय् थःपि मध्ये सु दकलय् तःधं धकाः खँ जुल।☆

47 इमिगु मनय् च्वंगु खँ सीकाः येशू छम्ह मचायात हयाः थःगु लिक्क फय्तुकाः

48 इमित धयादिल – “सुनां जिगु नामय् थज्याःम्ह मचायात दुकाइ, वं जितः हे दुकाःगु ति ग्यनी। अथे हे सुनां जितः दुकाइ, जितः छवया हयादीम्हय्सित हे दुकाःगु ति ग्यनी। अयजगुलि छिपि मध्ये सु दकलय् चिधंम्ह खः, व हे दकलय् तःधंम्ह खः।”☆

सु झी शत्रु मखु व झीम्ह हे मनू खः

मर्क ९:३८-४०

49 यूहन्नां येश्यात धाल – “गुरुजु, जिमिसं छिगु नामं भूत ख्यानाः च्वंम्ह छम्ह मनूयात खना। जिमिसं वयात अथे याये मते धकाः धया, छायाःसा व झीपिलिसे जुयाच्चंम्ह मखु।”

50 थ्व खँ न्यनाः वय्कलं वयात लिसः बियादिल – “सु झी शत्रु मखु व झीम्ह हे मनू खः, उकिं वयात पने मते।”

51 स्वर्गय् वनेगु ई त्यःगुलि येशू यरूशलेमपाखे वनेगु क्वःछिनादिल।

52 वय्कलं थःपि स्वयाः न्ह्यः हे सुं मनूतय्त छवयादिल। इमिसं सामरीतय्गु गामय् वनाः वय्कःपिन्त थायबाय् माल।

53 वय्कःपि यरूशलेमय् वनेत वःपि धकाः स्यगुलि सामरीतय्सं वय्कःपिन्त बाय् मब्यू।

54 थ्व खनाः याकूब व यूहन्नां वय्कःयात धाल – “प्रभु, जिमिसं स्वर्ग मि गाय्काः थुमित भस्म यानाबी ला?”☆

☆ 9:46 १०:४६ लूक २२:२४ ☆ 9:48 १०:४८ मत्ती १०:४०; लूक १०:१६; यूह १३:२० ☆ 9:54 १:५४

55 वयक्कलं इमित ब्वःबियादिल।

56 अले वयक्कःपि मेगु हे गामय् झाल।

येशूया चेला जुइपिं मनूत

मत्ती ८:१९-२२

57 वयक्कःपि लैय् झाया च्वंबलय् छम्ह मनुखं वयाः येशूयात थथे धाल – “गुरुजु, छि गन गन झाइ, जि नं ल्यूल्यू वये।”

58 वयक्कलं धयादिल – “ध्वंतय् च्वनेत प्वाः दु, झंगःतय् च्वनेत स्वं दु, मनूया काय्या धाःसा छ्यं दिकेत नं थाय् मदु।”

59 वयक्कलं मेम्ह मनूयात धयादिल – “जि नाप वा।”

वं थथे धाल – “प्रभु, जितः जिमि अबुयागु सीम्ह निं थुने बियादिसँ।”

60 अले वयक्कलं लिसः बियादिल – “सीम्हयात सीम्हय्सिनं हे थुनी। छ वनाः परमेश्वरयागु राज्ययागु खँ न्यंकाब्यु।”

61 मेम्ह मनुखं धाल – “प्रभु, जि नं छिनाप वये। छैय् छकः वनाः छैय् च्वंपिन्त ‘वने’ धया वये।”☆

62 वयक्कलं वयात धयादिल – “हलो जोतय् यायां लिफः स्वया च्वनीम्ह मनु परमेश्वरया राज्ययागु ज्या यायेत मत्वः।”

10

न्हयेम्ह मनूतय्त ज्याय् छवयादीगु

मत्ती ९:३७-३८

1 अनंलि प्रभुं मेपि न्हयेम्ह मनूतय्त ल्ययादिल। अले इमित निम्ह निम्ह यानाः थः वनेगु शहर व गां पतिकं थः स्वयाः न्हापा छवयादिल।

2 वयक्कलं इमित धयादिल – “बाली लयेगु ला यक्व हे दु, बाली लइपिं धाःसा कम जक दु। अय्जगुलिं बाली थुवाःयात बाली लइपिं छवयाहयादिसँ धकाः प्रार्थना या।”☆

3 आः हूँ, गुँखिचाया हुलय् जिं छिमित चीधिकःम्ह भ्याःचा थें यानाः छवयाच्वनागु दु।”☆

4 छिमिसं म्हेचा, धिबा, लाकां छुं हे ज्वनावने मते। लैय् सुयातं ज्वजलपा तकं धाये मते।

5 “न्ह्याम्हयसिगु छैय् दुहां वंसां छिमिसं न्हापालाक थथे धा — ‘थ्व छैय् च्वंपिन्त शान्ति जुइमा।’

6 व छैय् च्वंपिं शान्ति यःपिं जूसा छिमिसं ब्यूगु शान्ति इमित लाइ। मयःपिं जूसा छिमिसं ब्यूगु शान्ति छिमिके तुं लिहां वइ।

7 गुगु छैय् दुहां वन, व हे छैय् च्वनेगु या। इमिसं छु बिल व हे नयेत्वने याना च्वँ, छायाःसा ज्या याःपिन्सं ज्याला काये हे माः। छैखा पतिकं चाचाः हुला जुइ मते।☆

8 “अथे हे शहरय् वनेबलय् नं छिमित सुनानं सःताः नकूसा इमिसं ब्यूगु न।

9 अन च्वंपिं उसौय् मदया च्वंपिन्त लायकाब्यु। अले इमित थथे धा — ‘परमेश्वरयागु राज्य छिमिगु न्ह्यःने वये धुंकल।’

10 गुगुं नं शहरय् अन च्वंपिन्सं छिमित दुमकाल धाःसा छिमिसं लैय् वनाः थथे धा —☆

11 ‘जिमिगु लाकामय् थाःगु छिमिगु शहरयागु धू तकं जिमिसं छिमिगु विरोधय् थाथा यानाच्चना। अथेसां छिमिसं थ्व खँ बांलाक सीकाति — परमेश्वरयागु राज्य न्ह्यःने थ्यने धुंकल।’☆

12 जिं छिमित धाये — परमेश्वरं न्याय यानादीबलय् सदोमय् च्वंपिन्सं स्वयाः नं थ्व शहरय् च्वंपिन्सं यक्व हे अप्वः दुःखकष्ट सी माली।”☆

विश्वास मयाःपिं मनूत

मत्ती ११:२०-२४

13 “हे खोराजीन व बेथसेदाय् च्वंपिं मनूत, छिमित धिक्कार दु, छायाःसा छिमिथाय् याःगु अजू चायापुगु ज्याखँ टुरोस व सीदोनय् याःगु जूसा अन च्वंपिन्सं उबलय् हे भांगा हिनाः नौनं बुयाः पश्चाताप याये धुंकल जुइ।☆

14 जिं धात्थे धाये — परमेश्वरं न्याय यानादीबलय् टुरोस व सीदोनय् च्वंपिन्त स्वयाः अप्वः छिमित सास्ती बियादी।

15 ‘हे कफर्नहुमय् च्वंपिं मनूत, छिमित छु स्वर्गय् थत यनी धयाच्चनागु ला? छिमित ला नरकय् क्वफाइ।’ ”☆

☆ 10:7 १०:७ १ कोर ९:१४; १ तिमो ५:१८ ☆ 10:10 १०:१० प्रे १३:५१ ☆ 10:11 १०:४-११ मत्ती १०:७-१४; मार्क ६:८-११; लूक १:३-५ ☆ 10:12 १०:१२ उत १९:२४-२८; मत्ती ११:२४; १०:१५ ☆ 10:13 १०:१३ यशै २३:१-१८; इज २३:१-१८; योए ३:४-८; आमो १:९-१०; जक ९:२-४ ☆ 10:15 १०:१५ यशै १४:१३-१५

16 थुलि धयादी धुंका: वय्कलं चेलातय्त धयादिल – “छिमिगु खँ न्यंपिन्सं जिगु हे खँ न्यंगुति ग्यनी। अले छिमित मयःगु जितः मयःगुति हे ग्यनी। अले जितः मयःगु ला जितः छवया हःमहयसित मयःगुति हे ग्यनी।”☆

ज्या याना: लिहांवःपि न्हयेम्ह चेलात

17 ज्या याना: लिहांवःपि न्हयेम्ह चेलातय्सं लयत्तातां प्रभुयाथाय् वया: थथे धाल – “प्रभु, छिगु नामं ला भूततय्सं नं जिमिगु खँ न्यना: जिमिसं धया थें या:।”

18 अले वय्कलं इमित धयादिल – “जिं शैतानयात स्वर्ग हाबलासा थें च्याना: कुतुं वःगु खना।

19 न्यँ, जिं छिमित सर्प, बिच्छी व शत्रुतय्गु न्ह्यार्थे ज्या:गु शक्तियात नं न्हइ फइगु अधिकार बियातयागु दु। अयजुगुलि छिमित छुकिं नं स्यंके फइ मखु।☆

20 अथे भूत आत्मातय्सं नं छिमिगु खँ न्यं धका: लयत्तायेगु बांला:गु खँ मखु, बरु छिमिगु नां स्वर्गय् च्वयातःगु दु धका: लयत्ता।”

येशू लयत्तायादीगु

मत्ती ११:२५-२७; १३:१६-१७

21 अबलय् हे पवित्र आत्मां जाया: वय्कलं लयत्ताया: धयादिल – “हे परमेश्वर बा:, स्वर्ग व पृथ्वीया प्रभु, जिं छितः सुभाय् बी, छायाधा:सा छिं थ्व खँ सःस्य व थु धाइपिन्त न्यंका मदिसे छुं मस्यूपि मस्तय्त न्यंकादिल। धात्थें हे खः बा:, छितः थ्व हे भिं ताल।”

22 “बा:नं हे फुक्क जिगु लहातय् तयादीगु खः। काय्यात सुनानं म्हमस्यु। बा:नं जक काय्यात म्हस्यु। अले बा:यात नं सुनानं म्हमस्यु, काय्यं जक स्यु। काय्यं म्हसीका बीपिन्सं जक बा:यात म्हसी।”☆

23 अले वय्कलं चेलातय्त जक थथे धयादिल – “छिमिसं खंगु थ्व खँ स्वयेखंपि धन्यपि खः,

24 छायाधा:सा जिं छिमित धाये – छिमिसं खंगु थ्व खँ यक्व अगमवत्तातय्सं व जुजुपिन्सं स्वयेमास्ति वय्काच्चंगु दु, अय्यं इमिसं स्वये मखं। छिमिसं न्यंगु खँ नं इमिसं न्यने मास्ति वय्काच्चंगु खः, अय्यं न्यने मखं।”

भिंम्ह सामरियागु उखान

☆ 10:16 १०:१६ मत्ती १०:४०; मार्क ९:३७; लूक ९:४८; यूह १३:२०

☆ 10:19 १०:१९ भज ९१:१३

☆ 10:22 १०:२२ यूह ३:३५; १०:१५

25 छन्हु छम्ह शास्त्री वया: वय्कलं छु धाइ थें धका: स्वयेत येशूयात थथे न्ह्यस: यात – “गुरुजु, भिंगु छु ज्या या:सा जित: अनन्त जीवन दइ?”

26 वय्कलं वयात लिस: बियादिल – “व्यवस्थाय् छु च्वयात:गु दु? छिं गथे याना: ब्वनादिया?”

27 वं धाल – “परमप्रभु झी परमेश्वरयात दुनुगलंनिसें माया या, थ:गु प्राण बिया तकं माया या, थ:गु बलं फत्तले माया या, अले थ:गु मनंनिसें माया या। अले हानं थ: ज:लाख:लातयत थ:त थें माया या।”☆

28 अले वय्कलं वयात धयादिल – “छिं ख:गु खँ धयादिल। छिं अथे हे यानादिसँ, अले छित: अनन्त जीवन दइ।”☆☆

29 अयनं वं थ:त भिं धाय्केत वय्क:यात थथे धाल – “जिमि ज:लाख:ला धा:म्ह सु ख: लय सा?”

30 वय्कलं लिस: बियादिल – “छम्ह यहूदी यस्शलेमं यरीहोपाखे क्वहां वनाचवंबलय् लँय् दाखुँत नापलात। अले इमिसं वयात नांगा याना: बाम्ह सिक दाया: त्व:ताथकल।

31 “उबलय् हे छम्ह पुजाहारी उखेपाखे हे स्वया: वयाच्वन। वं व मनूयात खना: नं मखंछु याना: वन।

32 अथे हे लेवी कुलयाम्ह छम्ह मनू नं व हे लं वल। वं नं व मनूयात खना: नं मखंछु याना: वन।

33 “अले व हे लं छम्ह सामरी मनू नं वल। व मनूयात खना: वयात माया वन।

34 अले वयाथाय् लिक्क वना: घा: सिला: वास: तया: कापतं चिनाबिल। अले थ:गु गधाया म्हय् तया: छगू धर्मशालाय् यंका: चच्छि वयागु सुसा:कुसा: यानाच्वन।☆

35 कन्हय् खुन्हु वं धर्मशालाया थुवा:यात निगू दिनार बिया: धाल – “वयात सुसा:कुसा: यानातयादिसँ। लिहां वया: जिं छित: मगा:गु धिबा पुलाबी।”

36 अले वय्कलं शास्त्रीयात धयादिल – “छिं स्वयेबलय् थुपिं स्वम्ह मध्ये गुम्ह मनू दाखुँतय्सं दाया थकूम्ह मनूया ज:लाख:ला जुल?”

37 वं धाल – “वयात माया या:म्ह मनू हे वया ज:लाख:ला थें जुल।”

अले वय्कलं धयादिल – “छिं नं वं थें तुं या: झासँ।”

मार्था व मरियमयाथाय् येशू

☆ 10:27 १०:२७ लेवी ११:१८; व्य ६:५

☆ 10:28 १०:२५-२८ मत्ती २२:३५-४०; मार्क १२:२८-३४

☆ 10:28 १०:२८ लेवी १८:५

☆ 10:34 १०:३३-३४ २ इति २८:१५

38 वयक्:पि वँवँ लँय् ला:गु छगू गामय् थ्यन। व गामय् च्वंम्ह मार्या धा:म्ह छम्ह मिसां वयक्:पिन्त थ:गु छँय् यंकल।

39 वया मरियम धा:म्ह छम्ह केहँ दु। मरियम वचन न्यनेत प्रभुयागु तुति क्वय् च्वंवल।☆

40 मार्या धा:सा याक:चा पाहां व:पिन्त नके त्वंके यायेगुलिइ हे अलमल जुयाच्चन। वं वया: वयक्:यात धाल – “प्रभु, स्वयादिसँ, फुक्क ज्या जि याक:चां हे यायेमा:। केहँ मय्जुं धा:सा छुं हे मया। छिं थुलि नं बिचा: याना मदिया ला? वयात ज्या यायेत छवयादिसँ लय्, अले जित: ग्वाहालि दइ।”

41 वय्कलं लिस: बियादिल – “मार्या, मार्या, छं न्ह्यागु खँय् नं छाय् धन्दा कयाच्चनागु?”

42 मा:गु खँ छता हे जक दु। मरियमं व ल्यये धुंकल। थ्व वयागु ल्हातं लाकाकाये फइ मखु।”

11

प्रार्थना यायेगु खँ

मत्ती ६:५-१३; ७:७-११

1 छन्हू येशू छथाय् प्रार्थना यानाच्चनादिल। छम्ह चेलां वयक्:यात थथे धाल – “यूहन्नां नं वया चेलातय्त प्रार्थना यायेगु स्यं थें हे जिमित नं प्रार्थना यायेगु स्यनाबियादिसँ।”

2 अले वय्कलं इमित धयादिल – “छिमिसं थुकथं प्रार्थना या –

“ परमेश्वर बा:

छिगु नां त:धना च्वनेमा।

छिगु राज्य वयेमा।

3 न्हियान्हिथं थें थौं नं जिमित नसा बियादिसँ।

4 जिमिगु पाप क्षमा यानादिसँ,

गथे जिमिसं नं जिमित स्यंकूपिन्त क्षमा याना बियाच्चनागु दु।

प्रभु,

जिमित सह याये मफय्क जाँचय् लाकादी मते।’ ”

5 वय्कलं इमित धयादिल — “धाय्की, निम्ह पासा दु। बाचा इलय् छम्हसिनं थः पासायाथाय् वनाः थथे धाल — ‘पासा, जितः स्वपा मरि त्याय् ब्यु लय्,

6 छायाःसा जिमि पासा छम्ह तापाकनिसें थयंकः वल। वयात नकेत जिके छुं हे मदु।’

7 पासाम्हय्सिनं दुने थासं थथे धयाहल धाये — ‘जितः दुःख बी मते। खापा ति धुन। जि मस्त नं जिनापं घनाच्चंगु दु। आः इलय् दनाः जिं छन्त छुं नं बी मफु।’

8 जिं छिमित धाये — वं थः पासा जूगुलि वयात छुं नं मब्यूसां तिवां तिवां हालाच्चंगुलि वं दनाः वयात माक्व बियाछवइ।

9 “अय्जगुलि जिं छिमित धाये — फ्वँ, अले छिमित दइ, माला स्व, अले छिमिसं लुइके फइ, सः ब्यु, अले लुखा चाय्काबी।

10 छायाःसा फ्वंपिन्त बी, माला स्वःपिन्सं लुइकी, अले सः ब्यूम्हयसित चाय्काबी।

11 “अज्याःम्ह सु अबु दइ? गुम्हय्सिनं काय् नं न्या फ्वनीबिलय् सर्प बी?

12 अथे हे खँय् फ्वंम्हयसित बिच्छी बी?

13 अय्जगुलि मभिं पिं जुयाः नं ला छिमिसं थः मस्तयत् भिंगु भिंगु बी सः धाःसा स्वर्गय् च्वनादीम्ह बाःनं जक थःके फ्वंपिन्त पवित्र आत्मा बियामदी ला?”

येशू व बालजिबुल

मत्ती १२:२२-३०; मार्क ३:२२-२७

14 छन्हु येशू छम्ह लाताम्ह भूतयात पितिना छवयादीगुलि व मनुखं न्ववाये फत। थ्व खनाः फुकक मनुत् अजू चाल।

15 गुम्हं गुम्हय्सिनं थथे धाल — “भूतयत् जुजु बालजिबुलं शक्ति बियातःगुलि थ्वं भूतयात पितिनाछवये फुगु खः।”

16 गुलिसिनं ला वय्कलं याये फइ ला धकाः स्वयेत स्वर्ग छगू चिं क्यँ धकाः धाल।*

17 इमिगु मतिइ च्वंगु खँ थुइकाः वय्कलं इमित धयादिल — “गुगुं नं राज्य निक्कू दलाः थःथवय् ल्वाना जुल धाःसा थः हे नाश जुइ। अथे हे छँय् नं थःथवय् हे ल्वापु जुल धाःसा व छँ स्यनावनी।

18 अथे हे शैतानतय् दथुइ नं थःथवय् ल्वापु जुल धाःसा इमिगु राज्य नं याकनं हे नाश जुइ। बालजिबुलं शक्ति बियातःगुलि जिं भूतयात पितिनाछवये फुगु खः धकाः छिकपिन्सं धाल।

* 11:16 ११:१६ मत्ती १२:३८; १६:१; मार्क ८:११

19 थथे हे खः धयागु जूसा छिकपिनि मनूतयसं जक सुयागु शक्तिं भूत पितिना जुइगु लय? इमिसं छिकपिन्त हे दोषी ठहरय याइ।

20 अथे मखु, जिं परमेश्वरयागु शक्तिं भूतयात पितिनाछवयागु खः धयागु जूसा परमेश्वरयागु राज्य छिकपिन्थाय् वये धुंकल धकाः सीकादिसँ।

21 तसकं बल्लाःम्ह मनू हतियार ज्वनाः छँ पिवाः च्वनाच्वन धाःसा अन च्वंगु मालताल खुया यके फइ मखु।

22 तर व स्वयाः बल्लाःम्ह मनू वल धाःसा वयात बुकी। अले वं भरोसा कयाच्वंगु हतियार नं लाका काइ, नापं अन च्वंगु मालताल नं खुयायंकी।

23 “जिगु पँ मलीपि फुककं जिमि शत्रु खः। जितः मुकेत ग्वाहालि मयाइम्हय्सिनं जिं मुना तयागु नं हलाबी।”✧

पूमवंक याःगु ज्या इन ग्यानापु

मत्ती १२:४३-४५

24 “मनूयागु म्हं पिहां वनाः भूतआत्मां बाय् च्वनेत मरूमिइ माः जुइ। अले वं बाय् लुइके मफुत धायेवं थथे धाइ – ‘जि पिहां वयागु थःगु हे छँय् वने।’

25 अले वं लिहां वइबलय् न्हापायागु छँ यचुकाः झःझः धायकातःगु लुइकी।

26 अले वं वनाः थः स्वयाः मभिपिं न्हय्म्ह भूततयत सःता हइ। इपि वयाः बासं च्वनी। अले व मनू न्हापा स्वयाः गति मलाना वनी। आःयापि मभिपिं मनूतयगु गति नं थथे हे जुइ।”

27 वय्कलं अथे धयाच्वनादीबलय् हे मनूतयगु हुलं छम्ह मिसा थथे धकाः हाला हल – “छितः बुइकूम्ह व दुरु त्वंकूम्ह मां धन्यम्ह खः।”

28 अले वय्कलं लिसः बियादिल – “अथे मखु, परमेश्वरयागु वचन न्यनाः व थें याइम्ह हे धन्यम्ह खः।”

योना अगमवत्ताया चिं

मत्ती १२:३८-४२

29 मनूतयगु हुल अप्वःया वःगुलि येशू इमित थथे धयादिल – “थौकन्हय्यापिं मनूत गुलि जक मभिं। थुमिसं अजू चायापुगु चिं स्वयेत धयाच्वन। अहं, थुमित अगमवत्ता योनां क्यना वंगु चिं सिबय् मेगु छुं हे चिं क्यनी मखु।✧

30 गथे निनवेय् च्वपिं मनूतयगु नितिं योना चिं जुल, अथे हे थौकन्हय्यापिनिगु नितिं मनूया काय् चिं जुइ।✧

31 “न्याय याइबलय् दच्छिनय् च्वंम्ह रानीं नं आःयापि मनूतयूत सजॉय बीमाः धकाः नवाइ, छायाःसा व तापाकंनिसें सोलोमनयागु ज्ञानयागु खँ न्यनेत वल। स्व, थन ला सोलोमन स्वयाः नं तःधंम्ह छम्ह दु।”☆

32 निनवेय् च्वंपिन्सं नं न्याय याइबलय् आःयापि मनूतयूत सजॉय बी हे माः धकाः नवाइ, छायाःसा इमिसं ला योनां जक न्यंकूबलय् हे पश्चाताप यात। स्व, थन ला योना स्वयाः नं तःधंम्ह छम्ह दु।”☆

मिखा म्हायागु जः खः

मन्ती ५:१५; ६:२२-२३

33 “मत च्याकाः सुनानं सुचुका तइ मखु, फं त्वपुया नं तइ मखु, बरु छँय् वःपिन्त जः खयेमा धकाः तज्जाःगु थासय् तया तइ।”☆

34 “मिखा हे म्हायागु जः खः। मिखा थीसा जक छिमिगु म्ह छम्हं थी। छिमिगु मिखा स्यंसा छिमिगु म्ह छम्हं खिउँसे च्वनी।

35 अयजूगुलि बांलाक होश या, मखुसा छिमिके च्वंगु जः खिउँया वनी।

36 खिउँगु धयागु मदय्क छिमिगु म्ह छम्हं जलं थिना च्वंसा जक छिमिगु म्ह छम्हं मत जलं खःगु थें च्वनी।”

येशू धिक्कार धयादीगु

मन्ती २३:१-३६; मर्क १२:३८-४०

37 येशू थथे धयाच्चनादीबलय् हे छम्ह फरिसीं वयाः वय्कःयात भव्य नयेत सःतः वल। अले वय्कः झायाः नयेत फ्यतुनादिल।

38 वय्कलं ल्हाः मस्युसे नयादीगु खनाः वय्कःयात सःतूम्ह फरिसी अजू चाल।

39 अले प्रभुं वयात धयादिल – “छिपिं फरिसीत पिनें पिनें जक भु व ख्वल्चा सिले थें यचुका जुइ। दुनें दुनें धाःसा छिमिसं मभिंगु यायेगु, कर्पिन्त लुतय् यायेगु याना जुइ।

40 छिपिं ला तसकं हे मूर्खत खनीसा। पिने च्वंगु दय्कूम्हय्सिनं हे दुने च्वंगु नं दय्कूगु मखु ला?

41 भु व ख्वलाय् च्वंगु नये मखंपिन्त ब्यु, अले छिपिं दुनेनिसें यचुइ।”

42 “फरिसीत, छिमित धिक्कार दु, छायाःसा छिमिसं थःथाय् सःगु नवःघाँय्, जी व मेमेगु मसला ला झिब्वय् छब्व परमेश्वरयात छाये हइ। तर छिमिसं न्याय

☆ 11:31 ११:३१ १ राज १०:१-१०; २ इति १:१-१२
मन्ती ५:१५; मर्क ४:२१; लूक ८:१६

☆ 11:32 ११:३२ योना ३:५

☆ 11:33 ११:३३

यायेगु व परमेश्वरयात माया यायेगु खँय् धाःसा च्यूताः मतः। छिमिसं थ्व नं मत्वःते माःगु खः।✧

43 “फरिसीत, छिमित धिक्कार दु, छायाःसा धर्मशास्त्र स्यनीगु छँय् नं छिपि न्हःने च्वनेगु स्वइ, अले बजारय् वनीबलय् नं मेपिन्सं ज्वजलपा याका जुइत स्वइ।

44 फरिसीत, छिमित धिक्कार दु, छायाःसा छिपिं खने मदुगु सी थुनिगु गाः थें च्वं। थुकी न्हया वनाः मनूतय्सं थ्व सी थुनिगु गाः धकाः सी मखु।”

45 छम्ह शास्त्रीं वय्कःयात धाल – “गुरुजु छिं धयादीगु ला जिमित नं लात नि।”

46 अले वय्कलं धयादिल – “अय्सा शास्त्रीत, छिमित नं धिक्कार दु, छायाःसा छिमिसं मेपिन्त इयातुगु इयातुगु कु क्वबिकी, थःपिन्सं धाःसा थी तक नं मखु।

47 शास्त्रीत, छिमित धिक्कार दु, छायाःसा छिमि तापाःबाज्यापिन्सं स्याःपि अगमवत्तातय्गु नामं छिमिसं लुमन्तिया चिं दय्का जुइ।

48 थुकथं छिमि तापाःबाज्यापिन्सं इमित स्याना छ्वःगु छिमित तसकं यः धकाः सीदत, छायाःसा तापाःबाज्यापिन्सं इमित स्यायेगु ज्या यात, अले छिमिसं इमिगु नामं लुमन्तिया चिं दय्का जुइगु ज्या यात।

49 अय्जगुलि ला परमेश्वरं नुगलं वाःचाय्काः धयादिल – ‘जिं इमिथाय् अगमवत्तात व प्रेरिततय् छ्वयाबी। अले इमिसं थुमित गुम्हय्सितं स्याइ, गुम्हय्सितं दुःखकष्ट बी।’

50 “अय्जगुलि पृथ्वी सृष्टि जूसांनिसें थौं तक स्याःपिं अगमवत्तातय्गु हियागु सजॉय थौकन्हय्यापिं मनूतय्सं फये मालीतिनि।

51 हाबिलयात स्याबलय् निसें होम याइगु थाय् व देगःया दथुइ जकरियायात स्याःगु तकयागु पलेसा थुमिके काइतिनि।✧

52 “शास्त्रीत, छिमित धिक्कार दु, छायाःसा छिमिसं ज्ञानयागु ताःचा कयाः सुचुका तल। छिपिं थःपिं नं दुहां मवं, दुहां वने धाःपिन्त नं दुमछ्वः।”

53 वय्कः अनं झाःबलय् शास्त्रीत व फरिसीतय्सं तंचायाः वय्कःयाके अनेतनेगु खँ न्यं जुल।

54 वय्कलं लिसः बियादीबलय् छुं द्रुबिद्रं लुइकाः ज्वने दइ ला धकाः दाउ स्वयाच्चन।

12

निपाः ख्वाःपाः दुपिं खनाः होश या

मत्ती १०:२६-२७

1 अबलय् अन द्रुलंदः मनूत कातुकाक्क मुं वयाच्चन। वय्क्कलं चेलातयत्त धयादिल – “बांलाक होश या। निपाः ख्वाःपाः दुपिं फरिसीतय्गु सोडापाखें बचय् जुयाच्वै।”☆

2 त्वपुयातःगु खने दइतिनि। सुचुकातःगु सी दइतिनि।

3 अय्जूगुलि छिमिसं चान्हय् धाःगु खें न्हिनय् फुक्कसिनं सी। क्वथाय् दुने च्वनाः न्हाय्पनय् स्वांपूगु खें कःसिं बय्बय् जुइ।”☆

सु खनाः ग्याये माःगु?

मत्ती १०:२६-३१

4 “यःपिं पासापिं, जिं छिमित धाये – म्हयात जक स्याइपिं खनाः ग्याये माःगु मदु। थुलि अप्वः इमिसं मेगु छुं नं याये फइ मखु।

5 अयनं सु नाप ग्यायेमाः व खें जिं छिमित धाये – छिमिगु म्ह व आत्मा नितांयात नरकय् छवयादी फुम्ह परमेश्वरलिसे जक ग्याना च्वै। खः, जिं धाये – वय्क्कःलिसे हे जक ग्याना च्वै।

6 “धिबा निगलं न्याम्ह चखुंचात न्याये मफु ला? थपाय्सकं दंसां परमेश्वरं छम्ह चखुंचायात नं ल्वःमंकादी मखु।

7 छिमिगु छेनय् च्वंगु सँ छपु छपु दतले परमेश्वरं ल्याः खाना तयादीगु दु। अय्जूगुलि ग्याये माःगु मदु। चखुंचा स्वयाः ला छिपिं यक्व हे मू वं।”

8 “सुनां मनूतय्गु न्ह्यःने ‘जि ख्रीष्टयाम्ह मनू खः’ धकाः धाइ, मनूया कायनं नं परमेश्वरयापिं स्वर्गदूततय्गु न्ह्यःने वयात ‘जिम्ह मनू खः’ धकाः धाइ।

9 अले सुनां मनूतय्गु न्ह्यःने ‘जि ख्रीष्टयाम्ह मखु’ धकाः धाइ वयात वं नं परमेश्वरयापिं स्वर्गदूततय्गु न्ह्यःने ‘जिम्ह मनू मखु’ धकाः धाइ।

10 मनूया काय्यात मभिंकाः खें ल्हाःम्हय्सित क्षमा यानाबी, अयनं पवित्र आत्मायात मभिंकाः खें ल्हाःम्हय्सित क्षमा बी मखु।”☆

11 “छिमित ज्वनाः धर्मशास्त्र स्यनीगु छें, तःधंम्ह हाकिमयाथाय्, अले अदालतय् न्ह्याथाय् यंकूसां छिमिसं इमित छु लिसः बीगु धकाः धन्दा काये म्वाः।

☆ 12:1 १२:१ मत्ती १६:६; मार्क ८:१५

☆ 12:3 १२:३ मत्ती ४:२२; लूक ८:१७

☆ 12:10 १२:१०

मत्ती १२:३२; मार्क ३:२९

12 छायाधाःसा पवित्र आत्मां उबलय् हे छिमित छु धायेमाःगु खः स्यनादी।”☆

तःमिम्ह मूर्खम्ह मनूयागु उखान

13 मनूतयगु हुलं छम्ह मनुखं येशूयात थथे धाल – “गुरूजु, जिमि दाजुयात अबुया सम्पत्ति इनाब्यु धकाः धयादिसै रे।”

14 वय्कलं वयात लिसः बियादिल – “जि छिकपिनिगु सम्पत्ति इनाबीम्ह मनू अथवा न्यायाधीश धकाः छितः सुनां धाल?”

15 अले वय्कलं फुक्कसित धयादिल – “होश या, छुं नं लोभ लालच यायेगु बानी याये मते, छायाधाःसा यक्व धनसम्पत्ति दयेवं जक धात्थेगु जीवन दइगु मखु।”

16 वय्कलं इमित छगू उखान कनादिल। “छम्ह तःमिम्ह मनूयागु बुँइ तयां तयेथाय् मदय्क अन्न सल।

17 अले वं मनं मनं बिचाः यात – ‘अन्न ला तयां तयेथाय् हे मन्त, आः जिं छु यायेगु?’

18 वं बिचाः यानाः धाल – ‘छगू जुक्ति मयासैं मजिल। थ्व दक्व भखारि स्यंकाः ततःग्वः जुइक दय्केमाल, अले जक जिगु अन्न व सामान फुक्कं थ्व भखारिइ तये दइ।

19 अले ला जि थथे धकाः हुक्क जुयाच्चने – “आः ला जितः दैंदं तकयात नयेत माक्व दत। उर्कि मोजमज्जा यानाः नयाःत्वनाः जुइदत।” ’

20 “अले परमेश्वरं वयात थथे धयादिल – ‘अय् मूर्ख, छ ला थौं चान्हय् हे सी। छं मुंकातःगु धन, अन्न फुक्कं आः सुयागु जुइ?’

21 “परमेश्वरं धयादी थें मयासैं थःगु निंति जक सम्पत्ति मुंका जुइपि फुक्कं अथे हे जुइ।”

परमेश्वरयाके भरोसा ति

मत्ती ६:२५-३४

22 अले हानं येशू चेलातय्त धयादिल – “नयेत्वनेगु व पुनेगुलिइ छिमिसं च्यूताः तये मते।

23 नयेगु स्वयाः प्राण तःधं, मजू ला? पुनेगु स्वयाः शरीर तःधं, मजू ला?

24 क्वःतय्त छकः बिचाः यानाः स्व। क्वःतय्सं बुँइ पुसा हः जुइ नं मखु, अले बाली लः वनी नं मखु। इमि अन्न स्वथना तयेत धुकू नं मदु, भखारि नं मदु। अयनं इमित माक्व परमेश्वरं नका तःगु दु। झंगःपंक्षीत स्वयाः ला छिपिं यक्व मू वं।

25 छिपि मध्ये सुनानं धन्धा कयाः थःगु आयु पलख जक नं अप्वः तने फु ला?

26 थपायूसकं चिधंगु ज्या छगू ला याना नये मफु धाःसा छिमिसं मेमेगु खँय् छाया धन्धा कयाः जुइगु?

27 “ह्याचवंगु स्वांयात छकः स्व, इपि गुकथं तःमा जुल? इमिसं ज्या नं याःगु मदु, कापः नं थाःगु मदु। जिं छिमित धाये – उलिमछि धनसम्पत्ति दुम्ह सोलोमन जुजु छप्वः स्वां ति हे झःझः मधाः।☆

28 थौं बुयाः कन्हय् हे इवाः जुया वनीगु घाँय्यात ला परमेश्वरं थुलि समाः यानातयादी धाःसा वय्कलं छिमित पुनेत वसः बियामदी ला? अय् विश्वास मगाःपिं, छिमिसं गथे क्वातुक विश्वास याये मफुगु?

29 “अय्जगुलि छिमिसं नयेत्वनेगुलिइ जक मन तया जुइ मते, अले धन्धा कयाजुइ नं मते।

30 संसारयापि मनूतय्सं जक नयेत्वनेगुलिइ च्यूताः तया जुइ। तर छिमित छु छु माः धकाः ला छिमि बाःनं सि हे स्यूनि।

31 न्हापां परमेश्वरयागु राज्य माः जु, अले छिमित माःगु फुक्क बियादी।

32 “परमेश्वर लयतायादीगुलि छिमित वय्कलं थःगु राज्य बियादी। उकिं छिमिगु पुचः चिधं धकाः छिपि ग्याये माःगु मदु।

33 “अयनं दुपिन्सं थःपिन्के दुगु फुक्कं मियाः नये मखंपिन्त इनाब्यु। अले खर्च यानाः नं फुना मवनीगु सम्पत्ति दय्केत स्व। स्वर्गय् मुंकातःगु सम्पत्ति न्हाक्व हे खर्च याःसां गुबलें हे फुनावनी मखु, खुं नं खू वइ मखु, अले किलं नं नइ मखु।

34 छिमिगु सम्पत्ति गन दु छिमिगु मन नं अन हे दइ।”

पिवाः च्वंम्ह च्यः

35 “वसः फिनाः सेवाया निंति मत च्याकाः तयार जुयाच्वँ।☆

36 छिपि ब्याहा भव्य वंम्ह मालिकयागु लँ स्वया च्वंम्ह च्यः थें जुयाच्वँ। गुम्हय्सिनं थः मालिक वयेवं खापा चाय्काबी।

37 मालिक लिहां वइबलय् वं थः च्यःतय्त मघंसे च्वनाच्वंगु खन कि गुलि स्याबास बी। जिं छिमित धातथें धाये – व मालिकं थः च्यःयात पाहांयात थें फ्यतुकाः नके त्वंके याइ।

38 लिबाक्क बाचा जाय्का वा खा हाली धुंकाः लिहां वयाः नं थः च्यःतय्त मघंसे पिवाच्वंगु खन कि ला मालिकं झन अप्वः लयतायाः स्याबास बी।

39 “थ्व नं सीकाति – थःगु छैय् खू वइगु खँ सिल कि छँ थुवाः चच्छिं मधंसे पियाच्चनी। वं खुँयात दुहां वये तकं बी मखु।

40 छिमिसं नं अथे हे होशयानाच्चै, छायाःसा छिमिसं मतिइ हे मतःबलय् मनूया काय् वइ।”

भिंम्ह व मभिंम्ह च्यः

मन्ती २४:४५-५१

41 पन्हुसं धाल – “प्रभु, थ्व खँ छिं जिमित जक धयादियागु ला कि मेपिन्त नं धयादियागु?”

42 अले वय्कलं धयादिल – “भिंम्ह व विश्वास याये बहःम्ह च्यः सु जुइ? गुम्हयसित वया मालिकं मेपिं च्यःतय्त ठीक ठीक इलय् नके त्वंकेगु ज्या बियाः इमि नायः याना तइ, व हे जुइ।

43 वं अथे ज्या यानाच्चंगु वया मालिकं खन धाःसा वयात गुलि स्याबास बी।

44 जिं छिमित धात्थें धाये – वया मालिकं वयात थःगु सर्बय तकं लःल्हाना तइ।

45 तर वं ‘जिमि मालिक तःन्हु लिपा जक वइ’ धकाः मतिइ तयाः मेपिं च्यः व भ्वातितय्त दायाः ख्यानाः मंदु थें नयाःत्वनाः सनाः जुल धाःसा

46 वं मतिइ हे मतःबलय् वया मालिकं आकाझाकां थ्यंकः वयाः वयात स्या हे स्यानाछवइ। अले परमेश्वरयात विश्वास मयाइपिन्त बीगु सजॉय वयात नं बी।

47 “मालिकं या धकाः धयाथकूगु खँ स्यूसां हेपय् यानाः मयाइम्ह च्यःयात तसकं तःधंगु सजॉय बी।

48 मसीकं मचाय्कं स्यंकूम्ह च्यःयात भचा जक सजॉय बी। यक्व बिया तःम्हय्सिके यक्व हे काइ, यक्व कयातःम्हय्सिनं यक्व हे बी माली।”

ख्रीष्ट येशूयागु निंतिं बाय् माली

मन्ती १०:३४-३९

49 येशुं हानं धयादिल – “जि थ्व संसारय् मि तःवयाम्ह खः। थ्व मि च्याये धुंकूगु जूसा बां हे लाइगु खः।

50 जिं छगू बप्तिस्मा काये मानि। व मकातले जिं यक्व दुःखकष्ट फये मानि।✽

51 छिमिसं स्वयेबलय् जि संसारय् शान्ति बीत वःम्ह धकाः च्वन जुइ? मखु, जिं छिमित धाये – बरु जि ल्वाकेत वयाम्ह खः।

52 आवंलि न्याम्हय्सिगु परिवारय् कचिंगः पिहां वइ, अले स्वम्हय्सिगु छपुचः व निम्हय्सिगु छपुचः जुयाः थःथवय् ल्वापु जुइ।

53 “ थुकथं अबूया विरोधय् काय,
 कायया विरोधय् अबु,
 मांया विरोधय् म्हाय,
 म्हायया विरोधय् मां,
 माजुया विरोधय् भौमचा,
 व भौमचाया विरोधय् माजु जुया:
 ल्वापु जुइ। ” ☆

ईयात थुइकि

मत्ती १६:२-३

54 अले येशू मन्तूयत धयादिल — “पच्छिमं हाकुगु सुपॉय वःगु खनेवं छिमिसं
 ‘आः वा वइन’ धकाः धाइ, अले अथे हे जुइ।

55 हानं दच्छिनं फय् वयेवं छिमिसं ‘आः तसकं तान्वइ’ धकाः धाइ, अले अथे
 हे जुइ।

56 धात्थें हे, छिपि निपाः ख्वाःपाः दुपि खः। आकाशय् व पृथ्वीइ जुइगु खँ ला
 छिमिसं सीके फु धासेलि थ्व ईयात जक गय् म्हसीके मफुगु?

57 “छिपि थःपिन्सं हे छाय् भिं मभिं सीके मफुगु?

58 सुनानं छिमित मुद्दा तल धाःसा अदालतय् थ्यने न्ह्यः हे वलिसे मिलय् जुइगु
 स्व। मखुसा वं छिमित न्यायाधीशया न्ह्यःने यंकी। न्यायाधीशं छिमित सिपाईतय्गु
 ल्हातय् लःल्हानाबी। अले इमिसं छिमित कुनी।

59 अले छु जुइ थ्व जिं छिमित धाये — पुले माक्व धिबा मपुइकं छिमित
 इयालखानां त्वःता हइ मखु।”

13

पापं लिचिलेगु ला कि सीगु?

1 अबलय् हे छथ्वः मन्तूयसं वयाः येशूयात थथे धाल — “परमेश्वरयात बलि
 बियाच्चंबलय् पितातसं गालीलीतय् स्याकल। अले इमिगु हि व बांयागु हि नाप
 ल्वाकछ्याना बिल।”

2 वय्कलं इमित लिसः बियादिल — “थुपिं मेपिं गालीलीत स्वयाः तसकं पापी
 जूगुलि अथे यानाः स्याःगु धकाः मतिइ तया ला कि छु छिकपिन्सं?

3 जिं छिकपिन्त धाये – अथे मखु, छिकपिन्सं पश्चाताप मया:सा छिकपिं नं इपिं थें सी माली।

4 सिलोआमय् च्वंगु धरहरा क्व:दला: ल्हाना: सीपिं झिंच्याम्ह मनूत यस्शलेमय् च्वंपिं मनूत स्वया: पापीत धका: मतिइ तया ला कि छु छिकपिन्सं?

5 जिं छिकपिन्त धाये – अथे मखु, छिकपिन्सं पश्चाताप मया:सा छिकपिं नं इपिं थें सी माली।”

य:मरि मस:गु सिमायागु उखान

6 अले येशू इमित उखान छगू छुनादिल – “छम्ह मनुखं थ:गु दाखया क्यबय् य:मरिमा पिनात:गु दु। छन्हु वं सिमाय् य:मरि सयाच्चंगु दु ला धका: मा: वन, तर य:मरि छग: हे सयाच्चंगु मखन।

7 अले वं क्यबय् ज्या याइम्हय्सित धाल – ‘स्वदैँ मछि दये धुंकल थ्व य:मरि सइ ला धका: पियाच्चनागु, स:गु हे मखुनि। आ: ला सिमायात पाला छव:सां जिल। थाय् जक पंक, छाय् तया तयेगु?’

8 “अले क्यबय् ज्या याइम्हय्सिनं धाल – ‘आ: हानं दच्छि तक स्वये का हजुर। जिं हानं छक: ज:ख: बांलाक म्हुया: गाक्क सा: तया: स्वये।

9 थथे याना: य:मरि सल धा:सा बां हे लात, मखुसा पाला छवयाबी।’ ”

धुसि लूम्ह मिसायात लायकादीगु

10 छन्हु विश्रामबार खुन्हु येशू धर्मशास्त्र स्यनीगु छेंय झाया: स्यनेकने यानादिल।

11 अबलय् भूत दुब्यूम्ह छम्ह धुसि लूम्ह मिसा नं अन वयाच्चन। थ्व मिसा धस्वाये मफु। वयात थथे जुयाच्चंगु झिंच्यादैँ मछि दये धुंकल।

12 वयात खना: वय्कलं स:ता: थथे धयादिल – “छिगु ल्वय् लन।”

13 अले वय्कलं थ:गु ल्हा: वयागु छेनय् तयादिल। उघ्रिमय् हे व धस्वाये फत। अले वं परमेश्वरयात जयजय यात।

14 अथे वय्कलं विश्रामबार खुन्हु हे ल्वय् लायकादिल धका: धर्मशास्त्र स्यनीगु छेंयाम्ह कजी तसकं तंम्वय्कल। अले वं मनूतयत धाल – “ज्या याये ज्यगु दि ला खुन्हु मछि द हे दु नि। सुयां ल्वय् लाय्के मा:सा उबलय् व:सां ज्यूनि। विश्रामबार खुन्हु हे लाय्केमा: धयागु छु दु?”☆

15 अले प्रभुं वयात लिस: बियादिल – “छिकपिं गज्या:पि निपा: ख्वा:पा: दुपिं? छिकपिन्सं द्रुहंतयत्, गधातयत् विश्रामबार खुन्हु गलं त्व:ता: ल: त्वंके मयंका ला?

16 अले छु, अब्राहामया म्हाय् थ्व मिसायात झिंच्यादैँ तक शैतानं चिनातल। छु थ्वयात विश्रामबार जुल धायेवं त्वःताबी म्वाः ला?”

17 थथे धयादीगुलि वय्कःया विरोधीत मछालाः सुम्क च्वन। अले अजू चायापुगु ततःधंगु ज्या यानादीगुलि ग्वाः ग्वाः मनूत वय्कः खनाः लयल्यताल।

दक्वसिबय् चिग्वःगु पुसा व सोडायागु उखान

मन्ती १३:३१-३३; मर्क ४:३०-३२

18 येशू धयादिल – “परमेश्वरयागु राज्य गथे च्वं धकाः गय् यानाः धायेगु? छु नाप दाँजय् यानाः क्यनेगु?

19 परमेश्वरयागु राज्य थथे च्वं। छम्ह मनुखं तुग्वःया पुसा थःगु बुँइ हल। थ्व बुया वयाः तःमागु सिमा जुइ, अले झंगःपंक्षीतय्सं थुकियागु कचामचाय् थःगु स्वं दय्की।”

20 वय्कलं हानं धयादिल – “परमेश्वरयागु राज्ययात छु नाप दाँजय् यानाः क्यनेगु?

21 परमेश्वरयागु राज्य थथे च्वं। छम्ह मिसां सोडा कयाः सोफा छवचुंलय् ल्वाकछ्यानाः फुक्क थासय् मथ्यंतले न्हायाच्चन। अले छवचुं फुक्कं पवंगाना वल।”

चिब्यागु लुखा

22 येशू शहर शहर व गां गां जुयाः स्यनेकने यायां यस्शलेमपाखे झाया च्वंबलय्

23 वय्कःयात छम्ह मनुखं न्ह्यसः यात – “प्रभु, कम मनूतय्त जक मुक्ति दइ ला?”

अले वय्कलं वयात धयादिल –

24 “चिब्यागु लुखां दुहां वनेगु कुतः या, छायाःसा यक्व मनूतय्सं अनं दुहां वनेत ला स्वइ, अयनं फइ मखु।

25 छें थुवालं खापा ति धुंकाः हानं चाय्काबी मखु। अले छिपिं पिने च्वनाः थथे धयाः खापा संका च्वनेमाली – ‘प्रभु, खापा चाय्कादिसँ।’ वय्कलं थथे लिसः बिया हइ – ‘छिपिं गनं वयापि खः? जिं छिमित म्हमस्यू।’

26 अले छिमिसं थथे धाइ – ‘जिपिं छिनाप हे नयेत्वने याये धुपिं खः। अले जिमिगु हे त्वालय् झायाः छिं जिमित स्यनादीगु खः।’

27 छिमिसं वयक्:यात अथे धा:सां वयक्लं छिमित थथे धया हइ – ‘धात्थें हे छिपिं गनं व:पिं ख: धका: जिं मस्यू। अले गज्या:पिं ख: धका: नं जिं मस्यू। मभिं गु जक ज्या यानाजुइपिं, हालाच्चने मते, हूँ।’☆

28 “अले छिमिसं अब्राहाम, इसहाक, याकूब व फुक्क अगमवक्तात स्वर्गय् परमेश्वरया राज्यय् च्वनाच्चंगु, छिमित जक दुमका:गु खना: नुग: हीसे च्वंका: ख्व जक ख्वया:, वा न्ह्यायाच्चनी।☆

29 यहदीमखुपिं मनूत पुर्व, पच्छिम, उत्तर, दच्छिन फुक्क थासं वया: स्वर्गय् परमेश्वरया राज्यय् भवय् नयेत फ्यतुइ खनी।☆

30 थुइकि, आ: न्हापा ला:पिं लिपालाइ, अले लिपा ला:पिं न्हापा लाइ।”☆

यस्शलेम खना: नुग: मछिंकादीगु

मत्ती २३:३७-३९

31 अबलय् हे सुं फरिसीतय्सं वया: येशूयात थथे धाल – “हेरोदं छित: स्यायेत स्वयाच्चंगु दु, याकनं हे थनं बिस्युं झासँ।”

32 वयक्लं इमित लिस: बियादिल – “झासँ व ध्वंयात थथे धयादिसँ – जिं थौं व कन्हय् तक भूततय् पितिनाछवयेगु, ल्वगितय् लाय्काबीगु याये मानि, कंस ला जिं थ:गु ज्या सिधय्के।

33 न्ह्यागु हे जूसां थौं, कन्हय् व कंस जि थ:गु लैय् वना हे च्वनेमा: छायाधा:सा यस्शलेमं पिने ला अगमवक्ता सी जि हे मज्यू।”

34 “हे यस्शलेमय् च्वपिं मनूत, छिमिसं अगमवक्तातय् स्याना छवत, अले परमेश्वरं छवयाहयादीपिं दूततय् ल्वहँतं कय्का: स्याना छवत। जिं छिमित माखां थ: खाचातय् त्वपुया त: थें गुलि बचय् यायेत स्वये धुन। अयनं छिपिं मानय् मजू।

35 आवनिसें छिमिगु छैनं छिमित हे त्व:ताथके। जिं छिमित धाये – आवलिं छिमिसं प्रभुया नामं झायादीमहय्सित त:मधंकुतले जित: खनी मखु।”☆

14

म्हंमफुमह मनूयात लाय्कादीगु

1 छक: विश्रामबार खुन्हु येशू छम्ह त:धंमह फरिसीयागु छैय् भवय् स:तात:गुलि झाल। मनूतय्सं वयक्:यात अन नं चिवा यानाच्चन।

☆ 13:27 १३:२७ भज ६:८ ☆ 13:28 १३:२८ मत्ती २२:१३; २५:३० ☆ 13:29 १३:२८-२९ मत्ती ८:११-१२ ☆ 13:30 १३:३० मत्ती १९:३०; २०:१६; मार्क १०:३१ ☆ 13:35 १३:३५ भज ११:८२६; यर २२:५

2 वयक्कःया न्ह्यःने ल्हाःतुति मनावःम्ह छम्ह मनू च्वनाच्चवंगु दु।

3 वयक्कलं शास्त्रीत व फरिसीतयत्त थथे धयादिल – “विश्रामबार खुन्हु सुयातं लाय्काबीगु ज्या याये ज्यू ला?”

4 इपिं छम्हय्सिनं हे नवाय् मछाल। अले वयक्कलं व ल्हाःतुति मनावःम्ह मनूयात थियाः लाय्का छवयादिल।

5 अले इमित धयादिल – “छिकपिनि सुयां काय् अथवा द्वहं तुथिइ कुतुंव न धाःसा विश्रामबार खुन्हु जूसां काचाकाचां सालाः थमकाइ ला?”✧

6 इमिसं थुकियागु लिसः बी मफुत।

भवय् सःतूम्ह व भवय् वइपि

7 अन भवय् वःपिं मनूतयसं च्वय् फ्यतुइत स्वः जूगु खनाः वयक्कलं इमित थथे धकाः छगू उखान कनादिल –

8 “सुनानं छिकपिन्त ब्याहा भवजय् सःतातःगु दःसा छिकपिं च्वय् च्वनादी मते, छायाधाःसा छिकपिं स्वयाः नं तःधंपिन्त भवय् सःतातःगु दये फु।

9 भवय् सःतूम्हय्सिनं छिकपिन्त थथे धाइ – ‘अनयात थाय् त्वःतादिसँ।’ अले छिकपिं मछालाः क्वय् च्वंवने माली।

10 “छिकपिन्त सुनानं भवय् सःतल धाःसा छिकपिं वनाः दकलय् क्वय् लाःगु थासय् च्वं झासँ। अले भवय् सःतूम्हय्सिनं वयाः छिकपिन्त थथे धाइ – ‘पासा, भवा च्वय् झासँ।’ अले च्वय् च्वं झायेबलय् फुक्कसिगु न्ह्यःने छिकपिन्त बांलाइ।✧

11 सुनां थःत थःम्हं तःधंकी व चिधनी। अले सुनां थःत थःम्हं चिधं ताय्की व तःधनी।”✧

12 अले हानं वयक्कलं भवय् सःतूम्हय्सित नं धयादिल – “भवय् न्याय्केबलय् छिं थः पासापिं, दाजुकिजापिं, फुकीत, जःखः च्वंपिं व तःमिपिन्त भवय् सःतादी मते, छायाधाःसा पलेसा पुलेत इमिसं छितः नं भवय् सःती।

13 भवय् न्याय्केबलय् छिं नये मखंपिं, ल्हाःतुति खूपिं, अले कांपिन्त भवय् सःतादिसँ।

14 अले छितः आशिष दइ, छायाधाःसा अज्याःपिन्सं छितः पलेसा पुले फइ मखु। बरु धर्मीपिं सिनाः हानं म्वाना वइबलय् परमेश्वरं छितः थुकियागु पलेसा पुलादी।”

तःधंगु भवय्यागु उखान

मत्ती २२:१-१०

✧ 14:5 १४:५ मत्ती १२:११

✧ 14:10 १४:८-१० हितो २५:६-७

✧ 14:11 १४:११ मत्ती २३:१२;

15 थ्व न्यनाः वय्क्ःयागु लिक्कसं च्वनाच्चंम्ह छम्ह मनुखं थथे धाल — “स्वर्गय् परमेश्वरयागु राज्यय् च्वनाः नयेत्वने याये खनीम्ह मनु ला तसकं धन्यम्ह जुइ।”

16 वय्क्लं धयादिल — “छन्हु छम्ह मनुखं तसकं तःधंक भ्वय् न्याय्क्ल, अले यक्व मनुतय्त भ्वय् सःतल।

17 भ्वय् नयेगु ई जुइकाः वं थः च्यःयात भ्वय् सःता तःपिन्त हानं छकः ‘फुक्कं ठीक जुइ धुंक्ल, भ्वय् झासँ धकाः धायके छवत।

18 तर भ्वय् सःतातःपि मनुतय्सं वये मलाः धकाः धयाहल। छम्हय्सिनं थथे धाल — ‘जिं बुँ छक् न्याना तयागु दु। बुँइ छकः स्वः वनेमानि। अय्जगुलि वये लाइ मखु, तंचायादी मते।’

19 अले मेम्हय्सिनं धाल — ‘जिं न्याज्वः द्रुहं न्याना तयागु दु, छकः ज्या याकाः स्वये मानि। अय्जगुलि वये लाइ मखु, तंचायादी मते।’

20 अले हानं मेम्ह मनुखं धाल — ‘नकतिनि नकतिनि कलाः हयागुलि जि वये मलाः।’

21 “च्यलं लिहां वनाः मालिकयात फुक्क खँ धयाबिल। तसकं तंम्बयकाः वं च्यःयात थथे धाल — ‘हुँ, शहरया लँय् लँय् व गल्लिइ गल्लिइ वनाः नये मखंपिं, ल्हाःतुति खूपि व कांपिन्त ब्वना हजि।’

22 अले मालिकं धाःथें याये धुंकाः च्यलं वयाः वयात थथे धाल — ‘हजुर, छिं धयादी थें याये धुन, अज्ज नं थाय् दनि।’

23 वं हानं वयात थथे धाल — ‘शहरं पिनेयागु लँय् लँय् व गल्लिइ गल्लिइ वनाः मनुतय्त कर याना जूसां ब्वना हजि। जिगु छँ जायक मनुत दये हे माः।

24 जिं छिमित धात्थें धाये — न्हापा भ्वय् ब्वना तयापि मनुत छम्हय्सिनं हे भ्वय् नयेखनी मखु।”

चेला जुइत त्याग यायेमाः

मत्ती १०:३७-३८

25 ग्वाः ग्वाः हे मनुत येशूया ल्यूल्यु वयाच्चन। वय्क्लं इमित लिफः स्वयाः थथे धयादिल —

26 “सुं मनु जि नाप वये मास्ति वःसा वं थः मांभौ, कलाः, भाःत, मस्त, दाजुकिजा, तताकेहें, अले थःत नं जितः स्वयाः अप्वः माया याये मज्यू। अथे याये मफुम्ह मनु जिम्ह चेला जुइ फइ मखु।”

- 27 थःगु कूस क्वबिया जिगु ल्यूल्यू मवइम्ह मनु जिम्ह चेला जुइ फइ मखु।”☆
- 28 “सुनान धरहरा दय्केत्यन धाःसा न्हापालाक गुलि खर्च जुइ, अले धिबा गाः मगाः निं स्वइ।
- 29 जग तये धुंकाः सिधय्के मफुत कि वयात फुक्कसिनं थथे धकाः गिजय् याइ
-
- 30 ‘थ्व मनूखं दय्केत ला दय्कल, अयनं सिधय्के भाः मखन का।’
- 31 “अथे हे छम्ह जुजुं मेम्ह जुजुलिसे ल्वाःवनेत न्हापालाक थःपिनि झिद्रः सिपाइँत शत्रुतय् निइद्रः सिपाइँतलिसे ल्वाये फइ ला कि फइ मखु धकाः बिचाः याना स्वइ।
- 32 शत्रुपाखे च्वंपि सिपाइँत नाप ल्वाये मफु धयागु जूसा, इमिसं हय्काः वये न्ह्यः हे मनूत छवयाः मिलय् जुइत स्वइ।
- 33 अथे हे छिमिसं नं थःके दुगु फुक्कं त्वःते मफुसा छिपिं जिम्ह चेला जुइ फइ मखु।
- 34 “चि ला भिं जू। चिया सवाः हे तन धाःसा थ्वयात हानं छुकिं चि सवाः वय्केगु?
- 35 थथे सवाः तने धुंक्गु चि ला बुँइ तयेत नं मज्यू, साःद्रँय् तयेत नं मज्यू। अज्याःगु चियात ला मनूतय्सं वांछवइ। सुयाके न्हाय्पं दु वं न्यना का।”

15

स्वंगू उखान

- 1 कर काइपिं मनूत व पापीत हुल हुल मुनाः येशूयाथाय् लिक्क लिक्क वयाः वय्कःयागु खँ न्यं वल।
- 2 अले फरिसीत व शास्त्रीतय् थथे धकाः खँ जुल — “थ्व मनू ला पापीत नाप बुला जुयाः नया जुइम्ह खनिसा।”☆
- 3 अय्जुगुलि वय्कलं छगू उखान कनादिल।

तंम्ह फैचा

मत्ती १८:१२-१४

- 4 “छिकपिं मध्ये सुयां छम्हय्सिया सछिम्ह फैचा दु धाय्का। उकी छम्ह फैचा तन धाःसा वं छु याइ? वं गुइगुम्ह फैचायात खयलय् हे त्वःताः तंम्ह फैचायात माः मजुइ ला?

5 अले लुल कि वं लयल्यतातां फैचायात ब्वहलय् तया: हइ।

6 वं छैं थ्यंका: थ: पासापिन्त व ज:ख: च्वंपिन्त स:ता: थथे धाइ – ‘जिं तंम्ह फैचायात लुइका हये धुन, उकि छिपि नं जिनापं लयता।’

7 जिं छिकपिन्त धाये – थुकथं हे पश्चाताप या:म्ह छम्ह पापी मनू खना: परमेश्वर लयतायादी। तर छिकपिं थें ज्या:पिं गुइगुम्ह ‘जिपिं धर्मीपिं ख:’ धका: धाइपिं मनूत खना: परमेश्वर लयतायादी मखु।”

तंगु पाँय् म्वह:

8 “सुं छम्ह मिसायाके झिगू पाँय् म्वह: दु। अले वया छगू पाँय् म्वह: तन धा:सा वं मत च्याका: बै पुना: माला: मस्वइ ला?

9 लुइके धुंका: वं थ: पासापिन्त व ज:ख: च्वंपिन्त स:ता: थथे धाइ – ‘जिं तंगु पाँय् म्वह: लुइके धुन, उकि छिपि नं जिनापं लयता।’

10 जिं छिकपिन्त धाये – अथे हे परमेश्वरयापि स्वर्गदूतत नं पश्चाताप या:म्ह छम्ह पापी खना: लयल्यताइ।”

तंम्ह काय्

11 अले वय्कलं हानं उखान छुनादिल – “छम्ह मनूया निम्ह काय्पि दु।

12 छन्हु कान्छाम्ह काय् नं थ: अबुयात थथे धाल – ‘बा:, जित: जिगु अंश बियादिसँ।’ अले अबुम्हय्सिनं निम्ह काय्पिन्त अंश इनाबिल।

13 “अथे अंश इनाब्यूगु गुलिचां मदुनिबलय् कान्छाम्ह काय् नं थ:गु दक्क सम्पत्ति मिया: परदेशय् वन। अन वना: वं थ:गु धिबा मोजमज्जा याना: फुक्का छवत।

14 अबलय् अन देशय् अनिकाल जूगुलि वयात तसकं हे दु:ख जुल।

15 व अन देशय् च्वंम्ह छम्ह मनूयागु छैय् ज्या या: वन। वं वयात फातय् नके त्वंके यायेगु ज्या बिल।

16 तसकं नयेपित्याना: च्वंगुलि फातय्सं नइगु नसा हे वं नये मास्ति वय्कल, अय् नं वयात व हे नं सुनानं मब्यू।

17 “छन्हु वयात होश वल, वं थथे बिचा: यात – ‘जिमि बा:याथाय् ज्या याइपिं मनूतय्सं प्वा: जाय्क नया: नं थयेत दु, जि धा:सा थन नये हे मखना: सिनावनिन।

18 आ: मजिल, जि वना: बा:यात थथे धायेमाल – “बा:, परमेश्वरयागु विरोधय् व छिगु विरोधय् जिं पाप याये लात।

19 आः ला जितः छिकपिनि काय् धकाः धाये हे मत्वय् धुंकल। अय्जूगुलि जितः छिथाय् ज्या याइम्ह छम्ह च्यः थें भाःपिया तयादिसँ।” ’

20 “अले व दनाः थःगु छैय् लिहां वल। व लैय् वयाच्चंगु वया अबुं तापाकनिसें हे खन। वयात खनाः तसकं माया वन। अले ब्वौय् वनाः थःकाय्यात घयपुयाः चुप्पा नल।

21 अले वं अबुम्हयसित धाल — ‘बाः, जिं परमेश्वरयागु विरोधय् व छिगु विरोधय् पाप याये लात। आः ला जितः छिकपिनि काय् धकाः धाये हे मत्वय् धुंकल।’

22 “तर अबुम्हयसिनं च्यःतय्त सःताः थथे धाल — ‘याकनं हे दकलय् बांलाःगु वसः हयाः वयात पुंकि। वयागु पतिनय् अंगू नं न्ह्याकाः ब्यु। अले तुतिइ लाकां नं न्ह्याकाः ब्यु।

23 भव्य ज्वरय् या। थौं झीसं लय्ताः भव्य न्याय्केमाः,

24 छायाःसा थ्व जिमि काय् सी धुकूम्ह हानं म्वानावल, तने धुकूम्ह हानं लुल।’ अले भव्य नयाः न्ह्यइपुकल।”

25 “अबलय् वया तःधिकःम्ह काय् बुँइ वनाच्चंगु जुयाच्चन। बुं लिहां वयाः छें लिक्क थयंबलय् वं छैय् म्ये हालाच्चंगु व प्याखं ल्हुयाच्चंगु सः ताल।

26 अले वं छम्ह च्यःयात सःताः छैय् छु जुयाच्चन धकाः न्यन।

27 च्यलं धाल — ‘छिकपिनि किजा छुं मजुइक छैय् लिहां वःगुलि छिकपिनि बाःनं भव्य न्याय्कूगु खः।’

28 “अले व तसकं तंम्वय्काः छैय् नं वने मास्ति मवय्कल। अय्जूगुलि अबुम्हं हे पिने वयाः वयात ह्ययकल।

29 तर अबुम्हयसित थथे लिसः बिल — ‘स्वयादिसँ, थुलिमछि दये धुंकल जिं दास थें छिगु सेवा यानाच्चनागु। जिं छिगु छुं नं खँ मानय् मयानागु मदु। अय् नं छिं जितः पासापिलिसे न्ह्यइपुकेत दुगुचा छम्ह हे गुब्बं बियादीगु मदु।

30 वेश्यायाथाय् जुयाः छिगु सम्पत्ति दक्वं फुक्का वःम्ह काय् वयेवं धाःसा थपायसकं तःधंक भव्य न्याय्कादिल।’

31 “अले अबुम्हयसिनं वयात धाल — ‘स्व बाबु, छ ला जि नाप हे च्वनाच्चंगु दु नि। अले जिगु धयागु हे छंगु मखु ला?

32 थौं ला भव्य न्याय्काः लय्ताय् माःगु दिं खः, छायाःसा छं किजा सी धुकूम्ह हानं म्वानावल, तने धुकूम्ह हानं लुल।’ ”

16

चलाखम्ह दांभरियागु उखान

1 येशू चेलातयत् नं थथे धयादिल – “छम्ह तःमिम्ह मनूया छम्ह दांभरि तयातःगु दु। छन्हु व दांभरिनं लाः लाः थे धिबा खर्च यानाच्चन धकाः मालिकं न्यन।

2 अले वं वयात सःताः धाल – ‘छं मखु थें यानाच्चन धकाः धाःगु खँ खः ला कि मखु? आवनिसें छं जिथाय् ज्या याये म्वाःल। जितः हिसाब बुझय् याये हजि।’

3 “अले वं बिचाः यात – ‘आः जिं छु यायेगु? मालिकं जितः ज्यां लिकयाबी न। बुँ पाः जुइ जिं मफु, अले प्वं जुइत मछाः।

4 गथे याःसा जितः ज्यां लिकाये धुंकाः नं मनूतय्सं थःगु छँय् दुकाइ, व जिं लुइके धुन।’

5 “थुलि बिचाः यानाः वं थः मालिकयात धिबा पुलेमाःपिन्त छम्ह छम्ह यानाः सःतल। दकलय् न्हापा वःम्हयसित वं धाल – ‘जिमि मालिकयात छिं गुलि धिबा पुले मानि?’

6 वं धाल – ‘स्वदुः लिटर जैतूनया चिकं पुले मानि।’ अले वं धाल – ‘छंगु भ्वंतय् याकनं झिंन्यासः लिटर जक च्व।’

7 “अले हानं वं मेम्हयसित धाल – ‘छिं जिमि मालिकयात गुलि पुले मानि?’ वं धाल – ‘दुःछि बोरा छव पुले मानि।’ अले वं वयात धाल – ‘छंगु भ्वंतय् याकनं च्यासः बोरा जक च्व।’

8 “व मभिम्ह दांभरिनं अथे चलाखि ज्या याःगुलि वया मालिकं वयागु तारिफ यात। थुकिं सीदत, थ्व संसारयापि मनूत थःत माल धायेवं चलाख जुइ सः, तर परमेश्वरया मनूत धाःसा अथे मखुगुलिइ चलाख जुयाः सना जुइ मसः।

9 जिं छिमित धाये – थ्व संसारयागु हे धिबां जूसां छिमिसं थःगु निंतिं पासापि दय्का ति। अले थ्व धिबा फुइ धुंकाः छिमित स्वर्गय् दुकाइ।”

10 “चिधंगु खँय् विश्वास याये बहःम्ह मनू तःधंगु खँय् नं विश्वास याये बहःम्ह जुइ। अथे हे चिधंगु खँय् बेइमान जुइम्ह मनू तःधंगु खँय् नं बेइमान जुइ।

11 संसारयागु धिबाया ज्याखँय् हे ला विश्वास यायेबहः मजूम्ह मनूयात स्वर्गयागु धन सुनां लःल्हानाबी।

12 मेपिनिगु धनसम्पत्तिइ हे ला छिपिं विश्वासी जुइ मफु धाःसा छिमित दयेमाःगु धनसम्पत्ति सुनां बी?”

13 “सुं च्यलं निम्ह मालिकयागु सेवा याये फइ मखु, छायाःसा वं छम्ह मालिकयात अप्वः यय्कूसा, मेम्ह मालिकयात यय्की मखु। वं छम्हय्सिनं धाःथें

या:सा, मेम्हयसिनं धा:गु खँ न्यनी मखु। अथे हे छिमिसं परमेश्वर व धन निगूयां सेवा याये फइ मखु।”☆

धिबा जक दुसा गा:पिं फरिसीत

14 धिबा जक दुसा गा:पिं फरिसीतय्सं वय्कलं धयादीगु खँ न्यना: वय्क:यात गिजय् यात।

15 वय्कलं इमित धयादिल – “मनूतयगु न्ह्य:ने भिं जुया जुइपिं छिकपिं हे ला ख: नि। अय्त्तं परमेश्वरं छिकपिनिगु नुगलय् च्वंगु खँ स्यु, थथे मनूतयगु न्ह्य:ने त:धंछुया जुइगु हे परमेश्वरयात दकलय् मय:गु खँ ख:।

16 “यूहन्ना मवतले ला व्यवस्था व अगमवक्तातयगु सफू हे चले जुयाच्वंगु ख:। उबलय् निसें हे परमेश्वरयागु राज्ययागु भिंगु खँ न्यंकाच्वंगु दु। अय्जूगुलि न्ह्याथे याना जूसां मनूतय्सं अन दुहां वनेत कुत: यानाच्वन।☆

17 पृथ्वी व आकाश फुक्क फुना वंसां व्यवस्थाय् च्वयात:गु वचन छगू नं फुनावनी मखु।☆

18 “सुनानं थ: कला:यात त्व:ता: मेम्ह कला: ह:सा वं व्यभिचार या:गु जुइ। अले हानं अथे हे भा:तं त्व:तात:म्ह मिसायात ह:म्ह मिजंनं नं व्यभिचार या:गु जुइ।”☆

त:मिम्ह मनू व लाजरस

19 “छम्ह तसकं त:मिम्ह मनू दु। वं न्ह्याबले तसकं थिकेगु मलमलयागु वस: फिना जुइ। अले मोजं जुया जुइ।

20 वयागु ध्वाखाय् कै जक दुम्ह लाजरस धा:म्ह छम्ह फ्वर्गियात तयेहया त:गु दु।

21 खिचातय्सं वया: वयागु कैलय् फ्यया बीगु जुयाच्वन। वं त:मिम्ह मनुखं नया: कुतुं वंगु जक नये दुसां ज्यु धका: मतिइ तइगु ख:।

22 “छन्हु व फ्वर्गिं सित, अले स्वर्गदूततय्सं वयात व्वना यंका: अब्राहाम दुथाय् तये यंकल। छन्हु व त:मिम्ह मनू नं सित, अले वयात थुनाबिल।

23 नरकय् लानाच्वंम्ह थ्व त:मिम्ह मनुखं तसकं कष्ट जूगुलि च्वय् थस्व:बलय् तापाकं वं लाजरसयात अब्राहामनाप च्वनाच्वंगु खन।

☆ 16:13 १६:१३ मत्ती ६:२४ ☆ 16:16 १६:१६ मत्ती ११:१२-१३ ☆ 16:17 १६:१७ मत्ती ५:१८

☆ 16:18 १६:१८ मत्ती ५:३२; १ कोर ७:१०-११

24 “अले वं तस्सलं थथे धाल — ‘बा: अब्राहाम, जित: दया यानादिसँ। लाजरसयात वयागु पतिनं जित: छफुति जक जूसां ल: त्वंकेत छवयाहयादिसँ, छाया:सा जित: थ्व मिइ तसकं कष्ट जुयाच्वन।’

25 “अब्राहामं वयात धाल — ‘काय, म्वाना च्वंतले छं भिंगु भिंगु व बाबांला:गु काये खन, लाजरसयाके धा:सा अबलय् छुं हे मदु, वं यक्व दु:खसिया वल। आ: लाजरसयात सुख जुल, अले छं सास्ती नया च्वनेमाली।

26 थ्व खँ ला छखे हे ति रे, जिमिगु व छिमिगु दथुइ तसकं त:धंगु गा: दु, अय्जूगुलि जिपिं छिमिथाय् वये फइ मखु, अले छिपिं जिमिथाय् वये फइ मखु।’

27 “अले वं धाल — ‘अय्जूसा बा:, जिगु छगू बिन्ति थ्व दु — वयात छक: जिमि बा:यागु छैय् छवयादिसँ।

28 जिमि न्याम्ह किजापिं अज्जं दनि, वयात छक: अन छवया: इमित थनयागु खँ कना: ख्याच्व: बीके माल, मखुसा इपिं नं थन हे सास्ती न: वइ।’

29 “अले अब्राहामं धाल — ‘इमिके मोशायागु व्यवस्था व अगमवत्तातयगु सफू द हे दु नि, इमिसं व हे जक न्यंसां गा हे गानि।’

30 अले हानं वं धाल — ‘मखु, बा: अब्राहाम, उलि जक इमित मगा:। सीम्ह मनु हे छक: वना: इमित धया ब्यूसा इमिसं पश्चाताप याइ।’

31 अले अब्राहामं हानं धाल — ‘मोशायागु व्यवस्था व अगमवत्तातयगु सफूयात हे इमिसं वास्ता मया:सा सीम्ह मनुखं म्वाना वना: धा:गु खँ नं इमिसं विश्वास याइ मखु।’ ”

17

पापय् लाकीगु खँ

मत्ती १८:६-९; मार्क ९:४२-४७

1 येशू चेलातयत् धयादिल — “छतां न छतां ला मनूतयत् पाप या हे याकी, तर अथे पाप याकूम्ह मनूयात धिक्कार दु।

2 सुनां थथे चिधम्ह छम्ह मनूयात जक नं पापय् लाकी, वयात ग:पतय् ल्वहंघ: घाका: समुद्रय् वांछवयेगु हे बांलाइ।

3 अय्जूगुलि होश या।

“छिमि दाजुकिजापिन्सं पाप याना च्वंसा इमित अथे याये मते धका: हक्कि। अले इमिसं पश्चाताप या:सा इमित क्षमा या।☆

4 इमिसं न्हिच्छिइ न्हयकः छिमिगु विरोधय् पाप यानाः न्हयकः तकं छिमिथाय् वयाः ‘जिं पश्चाताप याये’ धकाः धाः वःसा छिमिसं क्षमा ब्यु।”

विश्वास

5 अले प्रेरिततयसं प्रभुयात धाल – “जिमिगु विश्वास अप्वः दय्का बियादिसँ।”

6 अले वय्कलं धयादिल – “छिमिके तू छग्वःति जक विश्वास दुसां छिमिसं थ्व हाकुगु किम्बु मायात – ‘ल्यहँ दनाः समुद्रय् ला हूँ’ धाःसा छिमिगु खँ वं न्यनी।”

च्यलं यायेमाःगु ज्या

7 “छिपि मध्ये सुनां थः च्यःयात बूँइ ज्या यानाः लिहां वइबलय् वा फैजवाः लिहां वइबलय् ‘याकनं न नि न’ धकाः धाइ ला?

8 छिमिसं वयात थथे ला धाइ – ‘वनाः याकनं नयेगु ज्वरय् या, अले जि नये मधुंतले पियाचवँ। जिं नये धुंकाः तिनि छं न।’

9 थथे धाःथें यात धकाः छिमिसं च्यःयात गुबलें स्याबास बिया ला?

10 अथे हे छिमिसं नं छिमित या धकाः धाःगु ज्या याये सिधय्का थथे धा – ‘जिपिं ला च्यःत जक खः। जिमिसं ला जिमित ब्वःगु ज्या जक याना।’ ”

झिम्ह कोह्मितय्त लाय्कादीगु

11 येशू यरूशलेमपाखे झाःबलय् सामरिया व गालीलयागु दथुं दथुं झाल।

12 छगू गामय् थ्यनी थें च्वंकाः वय्कलं झिम्ह कोह्मितय्त नापलात। इमिसं तापाकं हे दनाः

13 तःसलं थथे धयाहल – “प्रभु येशू, जिमित दया यानादिसँ।”

14 वय्कलं इमित धयादिल – “छिमिसं पुजाहारीयाथाय् वनाः थःगु म्ह क्यनाब्यु।” लैय् वें हे इमिगु कोहि ल्वय् लाया वन।☆

15 कोहि ल्वय् लाःगु सीकाः छम्ह मनू तसकं लयल्यतातां तःसलं परमेश्वरयात जयजय यानाः लिहां वल।

16 वं वय्कःयागु तुतिइ भ्वपुयाः सुभाय् बिल। व लिहां वःम्ह सामरी खः।

17 वय्कलं धयादिल – “जिं झिम्ह कोह्मितय्त लाय्का बियागु मखु ला? मेपि गुम्ह गन वन?

18 थ्व यह्दीमखुम्ह छम्हय्सिं जक वयाः परमेश्वरयात सुभाय् बिल, मेपिन्सं छाय् परमेश्वरयात सुभाय् ब्यू मवल?”

19 अले वयात धयादिल – “दँ, छैय् हँ। छं विश्वास या:गुलि हे छंगु कोहि ल्वय् लात।”

परमेश्वरयागु राज्य वयाच्चंगु दु

मत्ती २४:२३-२८, ३७-४४

20 सुं फरिसीतय्सं परमेश्वरयागु राज्य गुबलय् वइ धका: येशूयाके न्यन।

अले वयकलं लिस: बियादिल – “परमेश्वरयागु राज्य खनेदयक: वइ मखु।

21 सुनानं परमेश्वरयागु राज्य ‘थन दु’, ‘अन दु’ धका: धाये फइ मखु, छायाधा:सा परमेश्वरयागु राज्य छिकपिनिगु हे दथुइ दु।”

22 अले वयकलं चेलातयत्त धयादिल – “छन्हु अज्या:गु नं दि वइतिनि गुखुन्हु छिमिसं मनूया काय्यात छक: जक स्वये द:सां ज्यु, धका: धाइ। तर छिमिसं स्वये खनी मखु।

23 मनूतय्सं छिमित – ‘स्व, अन दु’, ‘स्व, थन दु’ धका: धाइ। तर छिमिसं इमिसं धा:गु खँ न्यने मते, अले इमिसं धा:थाय् नं वने मते।

24 गथे आकाशय् हावलासा त्वइबलय् छगू कुनं मेगु कुनय् थ्यंक ज: खइ। मनूया काय् वइगु दिनय् नं अथे हे खने दइ।

25 न्हापालाक ला वं त:तामछि दु:खकष्ट सी मानि। अले हानं थौकन्हय्यापि मनूतय्सं वयात मयय्की।

26 “गथे नोआयागु पालय् जूगु ख: मनूया काय्यागु पालय् नं अथे जुइ।☆

27 नोआ ल:जहाजय् दुहां मवंतले मनूतय्सं नयेत्वने याना हे च्वन, ब्याहा याना हे च्वन, अले बिया छवयेगु नं याना हे च्वन, अले ला छक्कलं हे इमित लखं त्वपू वल, थुकथं इपि फुक्कं सिनावन।☆

28 “लोतयागु पालय् नं अथे हे जुल। मनूतय्सं नयेत्वनेगु, न्यायेगु मीगु, पीगु व दय्केगु याना हे च्वन।

29 उबलय् हे लोतं सदोम त्व:तेवं आकाशं मि व गन्धक गाया: इपि फुक्कं सिनावन।☆

30 मनूया काय् वइबलय् नं अथे हे जुइ।

31 अबलय् क:सिइ च्वनाच्चंम्ह मनू थ:गु सम्पत्ति कायेत तकं छैय् दुने वने लाइ मखु। अथे हे बुँइ ज्या यानाच्चंम्ह छैय् तकं वये लाइ मखु।☆

☆ 17:26 १७:२६ उत ६:५-८

☆ 17:27 १७:२७ उत ७:६-२४

☆ 17:29 १७:२८-२९ उत

१८:२०-१९:२५

☆ 17:31 १७:३१ मत्ती २४:१७-१८; मार्क १३:१५-१६

32 लोटया कलाःयात लुमंकी।☆

33 थःगु प्राण बचय् यायेत जक स्वइम्ह मनू नाश जुयावनी। सुनां थःगु प्राण पाइ व बचय् जुइ।☆

34 जिं छिमित धाये – उखुन्हु चान्हय् छपाः लासाय् घनाच्चंपि निम्ह मध्ये छम्हय्सित यंकी, मेम्हय्सित त्वःताथकी।

35 नापं घः क्यला च्वंपि निम्ह मिस्त मध्ये छम्हय्सित यंकी, मेम्हय्सित त्वःताथकी।

36 अथे हे बुँइ च्वंपि निम्ह मनूत मध्ये छम्हय्सित यंकी, मेम्हय्सित त्वःताथकी।”

37 अले इमिसं वय्कःयात धाल – “गन प्रभु?”

वय्कलं धयादिल – “गन सीम्ह दु अन गिद्ध नं मुं वइ।”

18

छम्ह भाःत सीधुंकूम्ह मिसा व न्यायाधीशयागु उखान

1 अले येशू चेलातय्सं न्ह्याबलें प्रार्थना यानाच्चनेमा, अले प्रार्थना यायेगु मत्वःतेमा धकाः ध्वाथुइकेत छगू उखान कनादिल।

2 वय्कलं धयादिल – “छगू शहरय् परमेश्वर खनाः मग्याःम्ह, अले मनूतय्त वास्ता तर्क मयाइम्ह छम्ह न्यायाधीश दु।

3 व हे शहरय् छम्ह भाःत सीधुंकूम्ह मिसा नं दु। व मिसां न्ह्याबलें वयाः वयात थथे धाइगु जुयाच्चन – ‘जितः क्वत्यलातःपिनिगु न्ह्यःने न्याय यानादिसँ।’

4 स्वन्हु प्यन्हु तक ला वं वयात आलताल यानाः वास्ता हे मयाः। लिपा वं मनं मनं थथे धाल – ‘परमेश्वर खनाः जि मग्याः, अले मनूतय्त नं जिं वास्ता मतया।

5 अयनं थ्व मिसा जिथाय् यक्व हाः वयाच्चंगुलि जिं वयागु मुद्दा नि छिने यानाबी। अथे मयाःसा वं न्हियान्हिथं वयाः जितः दिक्क यानाबी।’ ”

6 अले प्रभुं धयादिल – “व अधर्मी न्यायाधीशं धाःगु खँ ताल ला?

7 अले छु, परमेश्वरं जक चान्हि थःके ग्वाहालि प्वनाच्चंपि थःम्हं हे ल्ययातःपि मनूतय्त स्वयामदी ला? छु वय्कलं थः मनूतय्त ग्वाहालि यायेत लिबाकादी ला?

8 जिं छिमित धाये – वय्कलं इमित याकनं हे ग्वाहालि यानादी। अयनं मनूया काय् वइबलय् संसारय् च्वंपि मनूतय्के थज्याःगु विश्वास खने दइ ला?”

फरिसी व कर काइम्हय्सिगु उखान

9 अले येशू — “जिपि हे जक धर्मीपि” धका: धया जुया: कर्पिन्त क्वह्वांका जुइपिन्त थ्व उखान कनादिल —

10 “छन्हु छम्ह फरिसी व कर काइम्ह मनू प्रार्थना यायेत देगलय् वन।

11 फरिसी दना: थथे प्रार्थना यात — ‘परमेश्वर, जिं छित: सुभाय् बी, छाया:सा जि मेपि थें ज्या:म्ह मनू मखु। जि खुँ लुच्चा मजुया, मभिं मजुया, व्यभिचार मयाना, अले थ्व कर काइम्ह मनू थें नं मजुया।

12 जि हप्ताय् निक: अपसं च्वना, अले जिं कमय् यानागु धिबां झिब्वय् छव्व छायेहया च्वनागु दु।’

13 “कर काइम्ह मनुखं धा:सा तापाकं हे दना: स्वर्गय् तकं थस्वये मफया: नुग: मछिंका: थथे धाल — ‘परमेश्वर, जि पापीयात दया यानादिसैं।’ ”

14 वय्कलं धयादिल — “जिं छिकपिन्त धाये — व फरिसी स्वया: थ्व मनू हे परमेश्वरया न्ह्या:ने धर्मी ठहरय् जुया: लिहां वन। सुनां थ:त थ:म्हं त:धंकी व चिधनी। अले सुनां थ:त थ:म्हं चिधं ताय्की व त:धनी।”*

मस्तयत् आशिष बियादीगु

मत्ती १९:१३-१५; मर्क १०:१३-१६

15 येशू आशिष बियादीमा धका: मनूतय्सं थ: मस्तयत् वय्क:याथाय् हल। थ्व खना: चेलातय्सं इमित हक्का: छवल।

16 अयनं वय्कलं मस्तयत् स:ता: धयादिल — “मस्तयत् पने मते, इमित जिथाय् छवया हजि, छाया:सा परमेश्वरयागु राज्य थज्या:पिनिगु हे ख:।

17 जिं छिमित धात्थें धाये — मस्तयगु नुग: थें दय्का मव:पिन्त परमेश्वरयागु राज्यय् दुकाइ मखु।”

त:मिम्ह मनू

मत्ती १९:१६-३०; मर्क १०:१७-३१

18 छन्हु छम्ह त:धंम्ह मनुखं येशूयाके न्यन — “भिंम्ह गुरु, छु या:सा जित: अनन्त जीवन दइ?”

19 अले वय्कलं धयादिल — “छिं जित: छाय् भिंम्ह धका: धयादियागु? भिंम्ह ला परमेश्वर छम्ह जक हे दु।

* 18:14 १८:१४ मत्ती २३:१२; लूक १४:११

20 छिं व्यवस्थाय् थथे च्वयातःगु सि हे स्यू जुइ – ‘व्यभिचार याये मते, स्याये मते, खुइ मते, मखुगु साक्षी बी मते, थः मां बौयात हनाबना ति।’ ”☆

21 अले वं लिसः बिल – “थ्व ला छगू छगू दतले हे जिं मचाबलय् निसें मानय् याना वयाच्चनागु दु।”

22 थ्व न्यनाः वय्कलं वयात धयादिल – “अझ हे नं छिं छता याये मानि। छिके दुगु फुक्कं मियाः नये मखं पिन्त इनाबियादिसँ, अले छितः स्वर्गय् धन-सम्पत्ति दइ। थुलि याये धुंकाः छि जि नाप झासँ।”

23 तसकं तःमिम्ह जूगुलि थ्व न्यनाः वं ख्वाः खिउँसे च्वंकल।

24 वय्कलं वयात स्वयाः धयादिल – “धन-सम्पत्ति यक्व दुपिन्त परमेश्वरयागु राज्यय् दुहां वनेत गपाय्सकं थाकु।

25 तःमिपि मनूत परमेश्वरयागु राज्यय् दुहां वनेगु स्वयाः मुलुयागु कँय् प्वालय् छम्ह ऊँट दुहां वनेत अःपुइ।”

26 थ्व खँ न्यना च्वंपिन्सं वय्कःयात धाल – “अय्सा सुयागु उद्गार जुइ फइ लय्?”

27 वय्कलं धयादिल – “मनूतय्सं याये मफुगु परमेश्वरं यानादी फु।”

28 अले पत्रुसं धाल – “स्वयादिसँ, जिमिसं थःगु छँछँ हे त्वःताः छिगु ल्यूल्यू वयाच्चना।”

29 वय्कलं इमित धयादिल – “जिं छिमित धात्थें धाये – परमेश्वरयागु राज्यया नितिं छँ, कलाः, दाजुकिजा, मांबौ, मस्त सकसित त्वःतावःपिन्त

30 आः हे थ्व स्वयाः यक्वं अप्वः दइ, अले लिपा वइगु संसारय् अनन्त जीवन नं कायेखनी।”

येशू थः सीगु खँ स्वकः खुसि कनादीगु

मन्ती २०:१७-१९; मर्क १०:३२-३४

31 अले येशू झिनिमहय्सित छखे ब्वना यंकाः धयादिल – “न्यूँ, झीपि यस्शलेमपाखे वनाच्चना। अन मनूया काय्यागु खँय् अगमवत्तातय्सं च्वया थकूगु फुक्क खँ पूवनी।

32 अन थ्यनेवं वयात ज्वनाः यहूदीमखुपिन्त लःल्हानाबी, अले वयात गिजय् याइ, बेइज्जत याइ, थुकलं बी।

33 इमिसं वयात कोरी दाइ, अले स्याइ। स्वन्हु दय्काः सीम्हं हानं म्वाना वइ।”

34 वय्कलं धयादीगु खँ इमिसं छुं हे थुइके मफुत। इमिगु नुगलय् छुं हे खँ दुहां वने मफुत। उकिं इमिसं वय्कःयागु खँ थुइके मफुत।

कांम्ह फ्वर्गियात लाय्कादीगु
मन्ती २०:२९-३४; मर्क १०:४६-५२

35 वय्कःपि यरीहोया लिक्क थ्यंबलय् छम्ह कांम्ह फ्वर्गि लैय् च्वनाः फ्वनाच्चन।

36 वं ग्वाः ग्वाः मनूत वःगु सः ताल। अले वं अन छु जुयाच्चन धकाः न्यना स्वल।

37 इमिसं वयात धाल – “नासरतयाम्ह येशू थनं झायाच्चंगु दु।”

38 अले ला वं चित्लाया दनाः थथे धाल – “अय् दाऊदया काय् येशू, जितः दया यानादिसँ।”

39 अले वयाथाय् लिक्क लिक्क च्वपिन्सं वयात “हाले मते, सुम्क च्वँ” धकाः ब्वःबिल।

अयनं व झन जक ततःसलं हाला हल – “अय् दाऊदया काय्, जितः दया यानादिसँ।”

40 अले वय्कलं दिनाः वयात “थन हजि” धकाः धयादिल। व न्ह्यःने वये धुंकाः वय्कलं न्यनादिल –

41 “जिं छन्त छु याये माल?”

वं धाल – “प्रभु, जितः मिखां खंका बियादिसँ।”

42 वय्कलं धयादिल – “छंगु विश्वासं यानाः छंगु ल्वय् लन, छं मिखां खनेमा।”

43 उघ्रिमय् वं मिखां खन। अले परमेश्वरयात जयजय यानाः वय्कःया ल्यूल्यू वन। थ्व खनाः फुक्कसिनं परमेश्वरयात तःधंकल।

19

येशू व जखायस

1 येशू यरीहो शहर थ्यंकः झाल।

2 अन जखायस धाःम्ह छम्ह मनू दु। व कर काइपिनि हाकिम खः। व तसकं तःमि।

3 वं येशू गज्याःम्ह जुइ धकाः स्वयेत सनाच्चन। बागःचाम्ह जूगुलि ग्वाः ग्वाः मनूतय्सं यानाः वं वय्कःयात खंके मफुत।

4 अयज्जुगुलि व हथाय् पथासं वयक्कः स्वयाः न्ह्यः ब्वाय् वनाः छमा यः मरिमाय् गयाच्चन। वयक्कः व हे यः मरिमाया क्वसं जुयाः झायाच्चंगु खः।

5 वयक्कलं अन थ्यंकाः च्वय् थस्वयाः वयात धयादिल – “हे जखायस, याकनं क्वहां झासँ, छायाधाःसा थौं जि छिगु छैय् बाय् च्वनेमाःगु दु।”

6 अले वं काचाकाचां सिमां क्वहां वयाः लयल्यतातां वयक्कःयात छैय् ब्वनार्यंकल।

7 थ्व खनाः मनूतय् दथुइ थथे खँ जुल – “व ला पापीम्ह मनूयागु छैय् धकाः बाय् च्वंवन।”

8 जखायसं प्रभुयात धाल – “स्वयादिसँ प्रभु, जिं जिगु बच्छि सम्पत्ति नये मखंपिन्त इनाबी। अले जिं सुयागुं थगय् यानाः कयातयागु दुसा, वयात प्यदुगं अप्वः तनाबी।”

9 वयक्कलं वयात धयादिल – “थौं थ्व छैयागु उद्धार जुल, छायाधाःसा छि नं ला अब्राहामया सन्तान खः नि।

10 मनूया काय् तनाच्चंपिन्त मालेत व उद्धार यायेत वःगु खः।”☆

झिगू असर्फियागु उखान

मत्ती २५:१४-३०

11 येशू यरूशलेम न्ह्यःनेसं थ्यंकाः झाल। वयक्कःयागु खँ न्यना च्वंपिन्सं परमेश्वरयागु राज्य याकनं वइ धकाः मतिइ तया च्वंगुलि वयक्कलं इमित थ्व उखान कनादिल।

12 “छम्ह तःधंम्ह मनू तापाःगु देशय् वनाः थःगु देशयाम्ह जुजु जुयाः लिहां वयेगु धकाः वन।

13 वने न्ह्यः थः झिम्ह च्यःतय् सःताः झिगू असर्फि बियाः धाल – “जि मवतले थ्व धिबां व्यापार याना च्वौं।”

14 अन च्वंपि मनूतय्सं धाःसा वयात मिखां हे स्वयेमास्ति मवः। व वने धुंकाः इमिसं मनूत छवयाः ‘थ्व मनू जिमि जुजु जुइगु जिमित मयः’ धकाः धाय्के छवल।

15 “जुजु जुयाः लिहां वये धुनेवं वं थः च्यःतय् सःताः इमिसं व धिबां गुलि कमय् यानाः तया धकाः न्यन।

16 न्हापांम्ह च्यलं धाल – ‘मालिक, छिं बिया थकादीगु छगू असर्फि जिं मेगु झिगू असर्फि कमय् यानागु दु।’

17 “अले वं वयात धाल – ‘स्याबास, छ तसकं भिम्ह च्यः खः। थज्याःगु चिधंगु ज्याय् हे छ विश्वास याये बहःम्ह जूगुलि छन्त झिगू शहरयाम्ह हाकिम यानाबी।’

18 “हानं निम्हम्हयस्सिनं वया: थथे धाल – ‘मालिक, छिगु छगू असर्फि जिं न्यागू असर्फि कमय् यानागु दु।’

19 “वं वयात धाल – ‘छन्त नं न्यागू शहरयाम्ह हाकिम यानाबी।’

20 “मेम्ह च्यलं वया: थथे धाल – ‘मालिक, छिं बिया थकादीगु असर्फि जिके हे दनि। छि खना: ग्या:गुलि जिं थ्व असर्फियात स्मालय् प्व:चिना: स्वथना तया।

21 छि तसकं हाराम्ह मनू ख: धका: जिं स्यु, अले हानं छिं थ:गु मखुसां यंकादी य:। छिं थ:म्हं म्ह:गु बाली नं लया: यंकादी य:।’

22 “अले वं वयात धाल – ‘छंगु हे म्हुतुं पिहां व:गु खं जिं छन्त ज्वने, छ ला तसकं मभिंम्ह च्य: जुयाच्चन खनी। जि तसकं हाराम्ह मनू, अले हानं जि थ:गु मखुसां काइम्ह, अले थ:म्हं म्ह:गु नं लया: यंकीम्ह धका: स्युसेलि छं

23 छाया जिगु धिबा त्याय् बिया मतया? त्याय् बियात:गु जूसा जिं ब्याजनापं काये दइगु मखु ला?’

24 “अले वं अन दनाच्चपिन्त धाल – ‘वयाके च्वंगु असर्फि कया: झिगू असर्फि दुम्ह मनूयात ब्यु।’

25 “इमिसं धाल – ‘मालिक, वयाके ला झिगू मछि असर्फि द हे दु नि।’

26 “अले जुजुं थथे धाल – जिं छिमित धाये – ‘दुम्हयसित अज्जं तनाबी, अले यक्व दइ। मदुम्हयसिके दुगु नं लाका काइ।☆

27 जित: जुजु मयायेत संपि जिमि शत्रुतय्त हया: जिगु न्ह्य:ने हे स्या।’ ”

येशू यस्सलेमय् झा:गु

मत्ती २१:१-११; मर्क ११:१-११; यूह १२:१२-१९

28 थुलि धयादी धुंका: येशू चेलातय्गु न्ह्य: न्ह्य: यस्सलेमपाखे झाल।

29 बेथफागे व बेथानिया न्ह्य:ने ला:गु जैतून डाँडाय् थ्यंबलय् वय्कलं निम्ह चेलातय्त थथे धया: छवयादिल –

30 “छिपि न्ह्य:ने च्वंगु गामय् हूँ। अन सुनानं मग:निम्ह छम्ह गधाया मचायात चिनात:गु दइ। वयात फ्यना: थन हजि।

31 सुनानं छिमित ‘छाय् फ्यनागु?’ धका: न्यंसा छिमिसं ‘प्रभुयात मा:गु दु’ धका: धा।”

32 गधा का:वंपिन्सं वय्कलं धया छव:थें तुं गधाया मचायात लुइकल।

33 इमिसं वयात फ्यना च्वंबलय् गधा थुवा:तय्सं वया: थथे धाल – “छिमिसं छाया गधा फ्यनाच्चनागु?”

34 इमिसं धाल — “प्रभुयात थ्व माःगु दु।”

35 इमिसं गधायात हयाः थःगु गा वयागु म्हय् लायाः वय्कःयात फ्यतुकल।

36 वय्कः झाःबलय् नं मनूतय्सं थथःगु गागि लैय् लायाबिल।

37 वय्कः यरूशलेमया सत्तीक लाःगु जैतून डाँडां क्वहां झाःबलय् चेलात फुक्कं लयल्यतायाः इमिसं खंगु ततःधंगु अजू चायापुगु ज्या व चिंया लागि परमेश्वरयात जयजय यानाः थथे धकाः ततःसलं हाल —

38 “परमप्रभुया नामं झाःम्ह जुजु
धन्यम्ह खः।
स्वर्गय् शान्ति जुइमा,
अले परमेश्वरया
जयजय जुइमा।”✧

39 मनूतयगु हल्य च्वपिं सुं फरिसीतय्सं वय्कःयात धाल — “गुरुज्जु, छिकपिनि चेलातय्त हाले मते धकाः ब्वःबियादिसँरे।”

40 वय्कलं लिसः बियादिल — “जिं छिकपिन्त धात्थें धाये — थुपिं सुम्क च्वन धाःसा ल्वहं हे हाला हइ।”

यरूशलेम खनाः येशू नुगः मछिकादीगु

41 यरूशलेमया न्ह्यःने थ्यंकः झाःबलय् शहरयात खनाः वय्कलं ख्वयाः धयादिल —

42 “थौ छिमिसं शान्तियागु लैपु स्यूगु जूसा गुलि ज्यूगु। आः थ्व छिमिगु मिखां तापाय् धुंकल।

43 थज्याःगु ई वइतिनि गुबलय् छिमि शत्रुतय्सं छिमिगु शहरयात प्यखेरं घेरय् यानाः गनं वने मजीक कुना तइ।

44 अले मस्तनापं छिमित व छिमिगु शहरयात भज्यंक नाश यानाबी। छगः ल्वहंया घःने मेगु ल्वहं नं ल्यंका तइ मखु, छायाधाःसा परमेश्वरं छिमित बचय् याः वःगु ईयात छिमिसं सीके मफुत।”

बंजाःतय्त देगलं ख्यानाः छवःगु

मत्ती २१:१२-१७; मर्क ११:१५-१९; यूह २:१३-२२

45 येशू देगलय् झाया: अन च्वना: न्यायेगु व मीगु ज्या यानाच्चपिं फुक्कसितं थथे धका: ख्याना: छवयादिल –

46 “थथे च्वयात:गु दु – ‘जिगु छँ प्रार्थना यायेगु छँ ख:।’ छिमिसं ला थुकियात खँ दाखुँतयगु छँ धका: यानाच्चन।”☆

47 वय्कलं न्हिन्हें झाया: अन देगलय् स्यनादीगु ख:। उकिं त:धपिं पुजाहारीत, शास्त्रीत व तत:धपिं मनूत मिलय् जुया: वय्क:यात स्यायेत स्वयाच्चन।☆

48 अयनं इमिसं छुं हे याये मफया च्वन, छायाधा:सा मनूत फुक्कसिनं वय्क:यागु खँ लय्लय्तातां न्यं।

20

येशूया अधिकारया खँय् न्ह्यस:

मत्ती २१:२३-२७; मर्क ११:२७-३३

1 छन्हू येशू देगलय् मनूतय् स्यनेकने याना व भिंगु खँ कनाच्चबलय् त:धपिं पुजाहारीत, शास्त्रीत व थकालिपिन्सं वया:

2 वय्क:यात थथे धाल – “छिं थथे याना दित गनं अधिकार कयादिया? अले छित: थव अधिकार सुनां बिल?”

3 वय्कलं इमित लिस: बियादिल – “जिं नं छिकपिन्के छगू खँ न्यने –

4 बप्तिस्मा बीगु अधिकार यूहन्नां सुयापाखें काल? स्वर्गपाखें ला कि मनूतय्पाखें?”

5 थव न्यना: इमि थ:थवय् थथे खँ जुल – “स्वर्गपाखें का:गु धाल कि झन झीत वं ‘अयसा, छिमिसं वयात छाया विश्वास मयानागु लय्?’ धका: धाइ।

6 मनूतय्पाखें का:गु धाल कि मनूतय्सं झीत ल्वहँत कय्का स्याइ, छायाधा:सा फुक्कसिनं यूहन्नायात अगमवक्ता धका: मानय् यानात:गु दु।”

7 अयजूगुलि इमिसं वय्क:यात थथे लिस: बिल – “जिमिसं मस्यु।”

8 अले वय्कलं इमित धयादिल – “अयसा, जिं नं छिकपिन्त थव ज्या यायेत जित: सुनां अधिकार बियाह:गु ख: धका: धाये मखु।”

मभिंपिं म्हय्तयगु उखान

मत्ती २१:३३-४६; मर्क १२:१-१२

9 अले येशू मनूतयूत छगू उखान कनादिल – “छम्ह मनुखं क्यबय् दाखमा पिना: म्हयतयूत त्व:ता: थ: त:न्हुया लागि तापालय् वन।”☆

10 बाली काय् त्यय्का: वं थ: च्य:यात म्हयतयूथाय् दाख बाली काय्के छवल। म्हयतयूसं वयात दाया: छुं हे मब्यूसे लित छवयाहल।

11 वं हानं मेम्ह च्य:यात छवल। वयात नं इमिसं दाया: इज्जत हे कया: छुं हे मब्यूसे लित छवयाहल।

12 वं हानं मेम्ह च्य:यात छवल। थ्वयात ला इमिसं घा:पा: याना: क्यबं पितिना हल।

13 “अय्जगुलि क्यब थुवालं थथे मतिइ तल – ‘आ: जिं छु यायेगु? हानं छक: जि य:म्ह काय् यात हे इमिथाय् छवया स्वये, जिम्ह काय् यात ला इमिसं हनाबना तइ।’

14 “अयूनं काय् म्हयसित वयाच्चंगु खनेवं म्हयतयूसं – ‘थ्व ला त:सिया काय् ख:, थ्वयात स्याना: फुक्क धनसम्पत्ति झीगु याना काये धका: ग्वसा: ग्वल।’

15 अले इमिसं वयात ज्वना: दाखक्यबं पिने यंका: स्यानाबिल।

“आ: त:सिनं वया: व म्हयतयूत छु याइ?

16 वं इमित स्यानाछवइ, अले व क्यब मेपिन्त हे ज्याके बी।”

थ्व न्यना: अन च्वंपिन्सं धाल – “थथे गुबलें मजुइमा।”

17 इमिसं अथे धा:गुलि वय्कलं इमित स्वया: धयादिल – “अयूसा धर्मशास्त्रय् थथे च्वया त:गुया छु अर्थ जुल लय?

“ ‘दक:मितयूसं ज्यालगय मजूगु धका:

धा:गु ल्वहं हे

मू ल्वहं जूवल।”☆

18 “व ल्वहँतय् द:पि फुक्कं कुचा कुचा दली। अले व ल्वहं कुतुं वया: सुयात लाइ व धू जुइ।”

19 वय्कलं अथे धयादीगुलि शास्त्रीत व त:धंपिं पुजाहारीतयूसं वय्क:यात अन हे ज्वनेत स्वल, छाया:धा:सा व उखान इमित हे किका: न्यंकादीगु ख: धका: इमिसं सीकल। अयूनं मनूत खना: ग्याना: इमिसं वय्क:यात ज्वने मफुत।

कर पुलेगु खँ

मन्ती २२:१५-२२; मर्क १२:१३-१७

20 अयजूगुलि इमिसं येशूयात ज्वनेत मौका स्वयाच्चन। इमिसं थः मनूतय्त भिपिं थें चवंक वय्कःयाथाय् छवल। इमिसं वय्कःयात खँ ल्हकाः ज्वनाः रोमी हाकिमयात लःल्हाना बीगु ग्वसाः ग्वःगु खः।

21 व मनूतय्सं वय्कःयात थथे धकाः न्ह्यसः यात – “गुरूजु, छिं खः खःगु जक नवानादी, अले भिभिं गु जक स्यनादी धकाः जिमिसं स्यू। अले हानं छिं ख्वाः स्वयाः ज्या यानादी मखु, बरु परमेश्वरयागु सत्य लँ क्यनादी।

22 छता खँ धयादिसँ, कैसरयात झीसं कर पुले ज्यू ला कि मज्यू?”

23 वय्कलं इमिगु मभिं गु बिचाः थुइकाः धयादिल –

24 “धिबा छगः हयाः जितः क्यनादिसँ। थुकी सुयागु ख्वाः व नां क्रियातःगु दु?”

इमिसं धाल – “कैसरयागु।”

25 वय्कलं धयादिल – “अय्सा कैसरयागु कैसरयात हे बीमाः, परमेश्वरयागु परमेश्वरयात हे बीमाः।”

26 इमिसं वय्कःयात मनूतयगु न्ह्यःने खँय् बुकाः ज्वने मफुत। वय्कःयागु लिसः न्यनाः इपिं छक्क जुल, अले सुम्क च्वन।

सीपिं म्वाना वइ ला कि वइ मखु?

मन्ती २२:२३-३३; मर्क १२:१८-२७

27 हानं सिनाः म्वाना वइगु खँय् विश्वास मयाइपिं सदुकीतय्सं वयाः येशूयात थथे धकाः न्ह्यसः यात –☆

28 “गुरूजु, सुं मनू मस्त मदय्कं सिनावन धाःसा वया हे किजां थः तताःजुयात कलाः तयाः दाजुम्हय्सिगु निती मस्त दय्केमाः धकाः मोशां च्वया थकूगु दु।☆

29 धाये – न्हय्म्ह दाजुकिजापि दु। तःधिकःम्ह दाजुम्ह ब्याहा यानाः मस्त मदय्कं सिनावन।

30 अले दातिम्ह किजां तताःजुम्हय्सित कलाः तल।

31 थुकथं हे साहिंलाम्ह किजां नं यात। थुकथं हे मेमेपिन्सं नं यात। फुक्कं मस्त मदय्कं हे सिनावन।

32 दकलय् लिपा व मिसा नं सित।

33 आः धयादिसँ, सीपिं म्वाना वइबलय् व मिसा सुया कलाः जुइ? इपिं न्हय्म्हय्सिनं नं वयात कलाः तःगु दु।”

34 वय्कलं इमित धयादिल — “थ्व संसारय् च्वंपि मनूतय्सं जक ब्याहा याइ, अले बियाछवइ।

35 सिना: म्वाना वया: स्वर्गय् वनीपि मनूतय् सुयां ब्याहा नं जुइ मखु। अले सुयातं बिया नं छवइ मखु।

36 इपि ला स्वर्गदूत थें जुइ, उकिं इपि हानं सी मखुत। सीपिन्त म्वाका तःगुलि इपि परमेश्वरया मस्त जुइ।

37 “मोशां नं सीपि मनूत म्वाना वइ धका: कयना वंगु दु नि। झालय् मि च्या:बलय् परमेश्वरं धयादीगु खँ मोशां थथे च्वया थकूगु दु — ‘जि अब्राहाम, इसहाक व याकूबया परमेश्वर ख:।’☆

38 थुकियागु अर्थ परमेश्वर सीपिनि परमेश्वर मखु, बरु म्वाना च्वंपिनि परमेश्वर ख:, छायेधा:सा फुक्कं वय्क:या नितिं हे म्वानाच्वंपि ख:।”

39 अले गुलि शास्त्रीतय्सं लिस: बिल — “गुरुजु, छिं धात्थें हे ख:गु खँ धयादिल।”

40 अबलय् निसें सुनानं हे वय्क:याके छुं हे न्यनेगु आँट याये मफुत।

मुक्ति बीम्ह ख्रीष्ट सु ख:?

मत्ती २२:४१-४६; मर्क १२:३५-३७

41 वय्कलं इमित धयादिल — “मुक्ति बीम्ह ख्रीष्ट दाऊदया काय् ख: धका: इमिसं गथे याना: धायेफत?

42-43 दाऊद थःम्हय्सिनं हे भजन सफुलिइ थथे च्वया थकूगु दु —

“छं शत्रुतय् छंगु पालि तःले मततले

छ जिगु जव ल्हा:पाखे च्वनाच्वँ धका:

परमप्रभुं जिमि प्रभुयात धयादिल।”☆

44 “दाऊदं हे वयात ‘प्रभु’ धका: धाल धा:सा गथे याना: दाऊदया काय् जुइ फइ?”

शास्त्रीत खना: होश या

मत्ती २३:१-३६; मर्क १२:३८-३९

45 अले फुक्क मनूतय्सं ताय्क वय्कलं चेलातय् धयादिल —

46 “ततःपाःगु लं फिना जुइ मास्ति वःपि, बजारय् मनूतयसं मानय् याका जुइ मास्ति वःपि, धर्मशास्त्र स्यनीगु छँय् दकलय् न्ह्यःने फय्तू वने मास्ति वःपि, भव्यबलय् ततःधःपि नाप च्वने मास्ति वःपि शास्त्रीत खनाः होश या।

47 थज्याःपिन्सं भाःत मदुपि मिसातयगु छँ लुतय् यानाच्चंगु दु, प्रार्थना धाःसा कर्पिन्त क्यनेत ततःहाकय्क यानाक्यनी। थज्याःपिन्सं हे दकलय् तःधंगु सजाँय फये मालीतिनि।”

21

भाःत सीधुंकूम्ह मिसां छाःगु धिबा

मर्क १२:४१-४४

1 अले येशू धनी मनूतयसं देगलय् च्वंगु धुकुतिइ धिबा तयाच्चंगु स्वया च्वनादिल।

2 वयकलं छम्ह तसकं चीमिम्ह भाःत सीधुंकूम्ह मिसां नं वयाः सिजःयागु धिबा तयाचंगु खन।

3 अले वयकलं धयादिल – “जिं छिमित धात्थें धाये – धुकुतिइ धिबा छाःवःपि मध्ये दकलय् अप्वः धिबा छाःम्ह ला थ्व चीमिम्ह भाःत सीधुंकूम्ह मिसा खः।

4 छायाःसा मेपिन्सं ला इमिके यक्व दुगुलि अःपुक बियावन। थ्व मिसां ला थःके दुगु फुककं नयेत मदय्क हे बियावन।”

देगः नाश जुया वनीतिनि

मत्ती २४:१-२; मर्क १३:१-२

5 चेलातय् थःथवय् देगःया खँय् देगः ला गुलि बाबांलाःगु ल्वहँत व छायेहयातःगु बसजालं छायापिया तःगु दु धकाः खँ ल्हानाच्चन।

6 अले येशू धयादिल – “छिमिसं खनाच्चंगु थ्व फुककं छन्हू नाश जुइतिनि, अबलय् थ्व फुककं दुना वनाः ल्वहं छगः नं दइ मखुनि।”

दुःखकष्ट जुइतिनिगु खँ

मत्ती २४:३-१४; मर्क १३:३-१३

7 अले इमिसं वयकःयाके न्यन – “गुरुजु, थथे गुबलय् जुइ? अले थथे जुइ धकाः गथे याना सीकेगु?”

8 वय्कलं धयादिल — “होश यानाच्चँ, सुनानं छिमिगु मिखाय् धुलं छावाके मफयेमा, छाय्धाःसा यक्व हे मनूतय्सं जिगु नामय् वयाः — ‘जि व हे खः’ अले ‘ई न्ह्यःने थ्यंकः वये धुंकल’ धकाः धाइ। अयनं छिपिं इपिं नाप वने मते।

9 अले छिमिसं जवंखवं तसकं ल्वापु जूगु व ल्वापु जुइत्यंगु खँ न्यनी। अय्सां छिपिं ग्याये मते, छाय्धाःसा थ्व संसार नाश जुयावने न्ह्यः थथे जुइ हे माः। अथेसां उघ्रिमय् हे संसारयागु नाश जुइ मखु।”

10 वय्कलं हानं धयादिल — “देश देशतय्गु दथुइ ल्वापु जुइ। राज्य राज्यया दथुइ ल्वापु जुइ।

11 थाय् थासय् ततःधंक भवखाय् ब्वइ, थाय् थासय् अनिकाल जुइ, यक्व ल्वचं थी, अबलय् आकाशय् तसकं ततःधंगु व ग्यानापुगु चिं खने दइ।

12 “थथे जुइ न्ह्यः जिगु नांयागु निति छिमित ज्वनाः कसाः याइ, धर्मशास्त्र स्यनीगु छँया थकालिपिन्त लःल्हानाबी, इयालखानाय् कुनी, अले जुजुपिन्थाय् व हाकिमतय्थाय् यंकी।

13 थुकथं छिमिसं इमिगु न्ह्यःने जिगु साक्षी बी खनी।

14 अयनं छिमिसं गुकथं लिसः बी माली धकाः धन्दा काये मते,

15 छाय्धाःसा जिं छिमित थज्याःगु खँ व बुद्धि बी, गुकियात छिमि शत्रुतय्सं लिसः बी नं फइ मखु, त्वाःल्हाय् नं फइ मखु।☆

16 थः हे मांबी, दाजुकिजा, थःथिति व पासापिन्सं तकं छिमित ज्वंका छवइ, अले छिपिं मध्ये गुलिसित ला स्यानाछवइ।

17 जिगु नामं यानाः छिमित फुक्कसिनं हेला याइ।

18 अयनं इमिसं छिमिगु छेनय् च्वंगु सँ छपु नं स्यंके फइ मखु।

19 छिमिसं सह यानाच्चन धाःसा छिमित अनन्त जीवन दइ।”

यस्शलेम नाश जुइतिनि

मन्ती २४:१५-२१; मर्क १३:१४-१९

20 “गुबलय् छिमिसं यस्शलेमयात सिपाइँतय्सं घेरय् याःगु खनी, उबलय् आः याकनं हे यस्शलेमयागु नाश जुइ धकाः छिमिसं सीकि।

21 उबलय् यहूदियाय् च्वनाच्चपिं फुक्कं पहाडय् बिस्सुं हुँ, शहरय् च्वपिं फुक्कं बिस्सुं हुँ, गामय् च्वनाच्चपिं शहरय् दुने वने मते।

22 छाय्धाःसा थ्व धर्मशास्त्रय् च्वयातःगु फुक्कं पूर्वकेत पलेसा काइगु दि खः।☆

23 प्वाथय् दुपिं व दुस्त्वंम्ह मचा दुपिं मिसातयत् तसकं सास्ती जुइ। छायाधाःसा अबलय् थ्व देशय् तसकं दुःखकष्ट जू वइ, अले थन च्वंपिन्सं परमेश्वरयागु तं फयेमाली।

24 गुलिसित तरवारं पालाः स्याइ, गुलिसित ज्वनाः देश देशय् यंकी, अले यहदीमखुपिनिगु ई पूमवंतले इमिसं यस्शलेमयात न्हुत्तुन्हुया तइ।”

मनूया काय् वइबलय् थथे जुइ

मती २४:२९-३१; मर्क १३:२४-२७

25 “अले सूर्यलय्, तिमिलाय् व नगुलय् चिं खने दइ। समुद्रयागु सलं व लःटुम्बलं यानाः पृथ्वीइ च्वंपिं फुक्क जातयापिं मनूत ग्यानाः आछु-आछु कनी।☆

26 पृथ्वीइ आः छु जुइन धकाः ग्यानाः मनूत मुच्छीं कइ, छायाधाःसा आकाशय् च्वंगु फुक्क शक्ति खाइ।

27 अले इमिसं मनूया काय्यात तःधंगु शक्ति ज्वनाः झःझः धाय्क सुपाँचय् वयाच्वंगु खनी।☆

28 थथे जुइवं छिमिसं दनाः च्वय् पाखे स्व, छायाधाःसा याकनं हे छिमिगु उद्धार जुइत्यंगु दु।”

यःमरिमायागु उखान

मती २४:३२-३५; मर्क १३:२८-३१

29 अले वय्कलं इमित छपु उखान कनादिल – “यःमरिमायात स्व, अथे हे मेमेगु सिमायात नं छकः स्व।

30 थुमिके चुलि जायावल कि, छिमिसं ‘तांन्वःगु ई वल’ धकाः सीकी।

31 अथे हे गुबलय् छिमिसं जिं धया थें जुया वयाच्वंगु खनी, परमेश्वरयागु राज्य न्ह्यःने वये धुंकल धकाः सीकि।

32 जिं छिमित धात्थें धाये – गुबलय् तक थ्व फुक्कं जुइ मखु, उबलय् तक आःयापिं मनूत सिनावनी मखु।

33 आकाश व पृथ्वी मदयावनी, अयनं जिगु वचन मदयावनी मखु।”

34 “अयजूगुलि छिमिसं होश यानाच्वेँ। भ्वय् जक नया जुइगु, अय्लाः थ्वेँ जक त्वना जुइगु, अले थ्व जीवनयागु धन्दा कयाः जुइगु याना जुल धाःसा छिमिसं मसीक जिं धयागु दिं वइ।

☆ 21:25 २१:२५ यशै १३:१०; इज ३२:७; योए २:३१; प्रका ६:१२-१३ ☆ 21:27 २१:२७ दान ७:१३; प्रका १:७

35 छायाधाःसा व दि पृथ्वीइ च्वंपि फुक्क मनूतयगु निंति तक्कंकीगु जाल थें जुयाः वइ।

36 अयजूगुलि होश यानाच्चँ। व दिनय जू वइगु फुक्क खं बचय जुइत व मनूया काय्या न्ह्यःने दने फय्केत छिमिसं न्ह्याबलें प्रार्थना याना च्वँ।”

37 न्हियान्हिथं येशू देगलय् स्यनेकने यानाः बहनी जुइवं जैतून डाँडाय् बाय् च्वं झायादीगु खः।☆

38 मनूत सुथय् न्हापांनिसें हे वय्कलं स्यनादीगु खँ न्यनेत देगलय् मुं वयाच्चनी।

22

यहदां येशूयात ज्वंकेत्यंगु

मन्ती २६:१-५; मर्क १४:१-२; यूह ११:४५-५३

1 सोडा मतःगु मरि नयेगु नखः न्ह्यःने थ्यंकः वल। थ्व नखःया न्हापांगु दि छुत्काराया नखः खः।☆

2 तःधंपि पुजाहारी व शास्त्रीतय् येशूयात स्यायेगु ग्वःसा ग्वःगु खः। अयूनं मनूत खनाः ग्यानाः इमिसं वय्कःयात सुलाः स्यायेगु ग्वःसा ग्वयाच्चन।

3 उबलय् हे झिनिम्ह चेलात मध्ये छम्ह यहदा इस्करियोतयाके शैतान दुबित।

4 वं तःधंपि पुजाहारीत व देगःया सिपाईतय् कप्तानयाथाय् वनाः येशूयात ज्वंका बी फु धकाः धाल।

5 इमिसं लयल्लय्तायाः वयात धिबा बी धकाः धयाहल।

6 यहदा मानय् जुल। अबलय् निसें वं मनू मदुथाय् लाकाः वय्कःयात इमिगु ल्हातय् ज्वंका छवयेत स्वयाच्चन।

छुत्कारायागु नखः हनादीगु

मन्ती २६:१७-२५; मर्क १४:१२-२१; यूह १३:२१-३०

7 सोडा मतःगु मरि नयेगु छुत्कारायागु नखःबलय् चीधिकःम्ह भ्याःचा स्यायेगु दि थ्यंकः वल।

8 अयजूगुलि येशू थथे धयाः पन्हुस व यूहन्नायात छवयादिल – “हुँ, छुत्काराया नखःया भवय् नयेत छिमिसं वनाः भवय् ज्वरय् या।”

9 इमिसं धाल – “गन वनाः ज्वरय् यायेगु?”

10 वय्कलं धयादिल — “न्यँ, शहरय् दुहां वनेवं छिमिसं घलय् लः कया वयाच्वंम्ह छम्ह मनूयात नापलाइ। छिपिं व हे मनूया ल्यूल्य् हूँ। व गन दुहां वनी, अन हे वनाः

11 छिमिसं छें थुवाःयात धा — “छितः गुरूजुं थथे धयाहःगु दु — “जिमि चेलात नाप छुत्काराया नखःया भव्य नयेत क्वथा क्यनादिसँ हं।” ’

12 अले वं छिमित बांलाकातःगु तःकूगु च्वतय् क्यने यंकी, छिमिसं अन हे ज्वरय् या।”

13 अले इपिं वन। वय्कलं इमित गथे धया छवयादीगु खः, इमिसं अथे हे लुइकल, अले अन हे छुत्काराया नखःया भव्य ज्वरय् यात।

प्रभु भव्य

मत्ती २६:२६-३०; मार्क १४:२२-२६; १ कोर ११:२३-२५

14 भव्य नयेत्यय्काः येशू व प्रेरितत इवःलाक फ्यतुनादिल।

15 वय्कलं धयादिल — “दुःख सी न्हः जि छिपिनाप च्वनाः छुत्काराया नखःया भव्य नयेगु तसकं इच्छा जुयाच्वंगु खः।

16 जिं छिमित धाये — परमेश्वरयागु राज्यय् भव्ययागु अर्थ पूमवंतले जिं हानं थ्व भव्य नये मखु।”

17 अले वय्कलं ख्वला कयाः परमेश्वरयात सुभाय् बियाः धयादिल — “थ्व का, छिपिं सकसिनं इनाः त्वँ।

18 जिं छिमित धाये — परमेश्वरयागु राज्य मवतले थ्व दाखमघ त्वने मखुत।”

19 वय्कलं हानं मरि कयाः परमेश्वरयात सुभाय् बियाः कुचा कुचा थलाः इमित थथे धयाः बियादिल — “थ्व मरि न। थ्व छिमित बियागु जिगु म्ह खः। आवंनिसें जितः लुमंकेत थथे यायेगु या।”

20 नये धुंकाः अथे हे ख्वला कयाः वय्कलं धयादिल — “थ्व ख्वला छिमिगु नितीं जिगु हि हायकागु परमेश्वरयागु न्हगु बाचा खः।☆

21 “तर न्यँ, जितः ज्वंका छवइम्ह मनू जि नाप हे फ्यतुनाच्वंगु दु।☆

22 च्वया तः थें मनूया काय् ला सिनावने हे माः। अयनं वयात ज्वंका छवइम्ह मनूयात तसकं धिक्कार दु।”

23 अले इपिं थःथवय् थथे धकाः खँ ल्हात — “झीगु पुचलय् अथे याइम्ह मनू सु जुइ?”

सु तःधं?

मत्ती २०:२५-२८; मर्क १०:४२-४५

24 इपि मध्ये दकलय् तःधंम्ह सु जुइ धकाः चेलात कचकच हालाच्चन।☆

25 अले येशू इमित धयादिल – “थ्व संसारय् शासन याइपिन्सं मनूतय्त लहातय् काइ। इमि हाकिमतय्त भिंपिं मनूत धकाः धाइ।

26 छिमिसं धाःसा अथे यायेदइ मखु, बरु छिपिं मध्ये सु दकलय् तःधंम्ह खः वं दकलय् चिधंम्ह जुयाः क्यनेमाः। अले छिमि नायः सु खः वं ला झन फुक्कसियां च्यः जुयाः ज्या यायेमाः।☆☆

27 नयाच्चंम्ह तःधं ला कि वयात नयेगु तये हया च्वंम्ह च्यः तःधं? नयाच्चंम्ह मखु ला, तःधंम्ह? अयनं जिं छिमित सेवा यानाच्चनागु दु।☆

28 “जिगु दुःखकष्टय् छिपिं जि नाप च्वनाच्चंगु दु।

29 अयज्जुगुलि गथे जिमि बाःनं जितः जुजु यानादिल, जिं नं छिमित अथे हे यानाबी।

30 अले छिमिसं जिगु राज्यय् जि नाप च्वनाः नयेत्वने याये खनी। अले हानं सिंहासनय् च्वनाः छिमिसं इम्राएलया झिनिगू कुलयापिं मनूतय्त न्याय याइ।”☆

पन्हुसं येशूयात म्हमस्यू धकाः धाइ

मत्ती २६:३१-३५; मर्क १४:२७-३१, यूह १३:३६-३८

31 “सिमोन, सिमोन न्यँ, शैतानं छिमित छव हाये थें हायेत उजं काये धुंकल।

32 अयनं छंगु विश्वास बमलाना मवनेमा धकाः जिं प्रार्थना यानागु दु। जिथाय् हानं लिहां वये धुंकाः छं थः दाजुकिजापिन्त बल्लाकि।”

33 अले वं येशूयात धाल – “प्रभु, इयालखानाय् वनेमाःसां, सी हे माःसां जिं छितः त्वःते मखु।”

34 वय्कलं धयादिल – “पन्हुस, जिं छन्त धाये – थौं खा हाले न्ह्यः छं जितः स्वकः तक म्हमस्यू धकाः धाइ।”

तरवार, धिबा व म्हिचा

35 येशू चेलातय्त धयादिल – “जिं छिमित धिबा, म्हिचा व लाकां मब्यूसे छवयाबलय् छिमित माःगु तरय् जू ला कि मजू?”

☆ 22:24 २२:२४ मत्ती १८:१; मर्क ९:३४; लूक ९:४६ ☆ 22:26 २२:२५-२६ मत्ती २०:२५-२७;

मर्क १०:४२-४४ ☆ 22:26 २२:२६ मत्ती २३:११; मर्क ९:३५

☆ 22:27 २२:२७ यूह १३:१२-१५

☆ 22:30 २२:३० मत्ती १९:२८

इमिसं धाल – “जू।”☆

36 वय्कलं हानं धयादिल – “आ: धा:सा सुयाके धिबा दु, वं व धिबा तयाति, अथे हे म्हिचा नं कया: ति। अले सुयाके तरवार मदु वं थ:गु कोट मिया जूसां तरवार न्या।

37 ‘वय्क:यात दाखुंतय् ल्याखय् तइ’ धका: जिगु बारे धर्मशास्त्रय् च्वयात:गु खँ पूवने हे मा:। छाया:सा जिगु बारे च्वयात:गु खँ पूवनाच्वंगु दु।”☆

38 इमिसं धाल – “स्वयादिसँ प्रभु, जिमिके निपु तरवार दु।”

वय्कलं धयादिल – “थुलि दुसा गा:।”

येशू प्रार्थना यानादीगु

मत्ती २६:३६-४६; मार्क १४:३२-४२

39 येशू अनं पिहां झाया: वय्क:यागु बानी दु थें जैतून डाँडाय् थाहां झायादिल। चेलात नं वय्क: नाप ल्यूल्यू वन।

40 अन थ्यने धुंका: वय्कलं इमित धयादिल – “प्रार्थना याना च्वँ, मखुसा छिपि जाँचय् लाइ।”

41 अले वय्क: इमिथासं भचा उज्यां वना: पुलि चुया: प्रार्थना यानादिल।

42 “बा:, ज्यूसा थ्व ख्वला जिथासं चीकादिसँ। अयनं जित: य:थें यानादी मते, छित: य:थें हे यानादिसँ।”

43 उबलय् स्वर्ग छम्ह स्वर्गदूतं वया: वय्क:यात लिधंसा बियाच्वन।

44 अले नुगलय् तसकं हीसे च्वना: नुग: हे ह्गनि थें च्वंगुलि वय्कलं झन तसकं मन बिया: प्रार्थना यानादिल। वय्क:यागु च:ति हि थें तत:फुति जुया: बैय् तिकि ननाच्वन।

45 प्रार्थना यानादी धुंका: वय्क: दना: चेलात दुथाय् झा:बलय् इपि नुग: मछिंका: मस्तं घनाच्वंगु खनादिल।

46 अले वय्कलं धयादिल – “छिपि छाया घनाच्वनागु? दना: प्रार्थना या। अले जक दु:खकष्ट जू व:सां छिपि बल्लाना च्वने फइ।”

येशूयात ज्वंगु

मत्ती २६:४७-५६; मार्क १४:४३-५०; यूह १८:३-११

47 वय्कलं नवाना च्वनादीबलय् हे अन छगू हुल मनूत वल। झिनिम्ह चेलात मध्ये यह्दा धा:म्ह चेला इमिगु न्ह्य: न्ह्य: दु। यह्दा वया: वय्क:यात चुप्पा नल।

48 अले वय्कलं वयात धयादिल – “हे यहूदा, मनूया काय्यात छु छं चुप्पा नया: ज्वंकेगु ला?”

49 चेलातय्सं अन छु जुइत्यंगु खः धका: सीका: थथे धाल – “प्रभु, जिमिसं तरवारं पालाबी ला?”

50 छम्ह चेलां दकलय् तःधंम्ह पुजाहारीया दासयागु जव न्हाय्पं ध्यनाबिल।

51 तर वय्कलं धयादिल – “गात, त्वःताब्यु।” अले वय्कलं वयागु न्हाय्पं थिया: लाय्कादिल।

52 अले ज्वं:पि तःधंपि पुजाहारीतय्त, देगःया सिपाईतय् कप्तानतय्त व थकालिपिन्त धयादिल – “जि छम्हय्सित ज्वनेत थथे तरवार व कथि ज्वनावये मा:गु छाया? छु जि दाखुं खः ला?

53 न्हियान्हिथं छिकपि नाप देगलय् दुबलय् धा:सा छिकपिन्सं जितः मज्जं। तर थ्व छिकपिनिगु ई खः, अले खिउँया शक्तियागु राज्य खः।”*

पन्नुसं येशूयात म्हमस्यू धा:गु

मत्ती २६:५७-५८, ६९-७५; मार्क १४:५३-५४, ६६-७२; यूह १८:१२-१८, २५-२७

54 अले इमिसं येशूयात ज्वना: दकलय् तःधंम्ह पुजाहारीयागु छैय् हल। पन्नुस धा:सा तापाकं ल्यूल्यू वनाच्चन।

55 अबलय् अन मनूत चुकय् दथुइ मि छवय्का: पनाच्चन। पन्नुस नं वना: इपि नाप च्वन।

56 छम्ह भ्वाति नं मियागु जलय् वयात खना: क्वथीक स्वया: धाल – “थ्व मनू नं व नाप जुइम्ह खः।”

57 वं मखु धका: थथे धाल – “वय्कःयात जिं म्हमस्यू।”

58 भचा जाय्का: मेम्ह मनुखं खना: वयात धाल – “छ नं इपि नाप जुयाच्चंम्ह खः।”

वं हानं धाल – “जि मखु।”

59 अले घौछिति जाय्का: मेम्हयसिनं थथे धाल – “थ्व मनू येशू नाप जुइम्ह खः, छायाधा:सा थ्व नं छम्ह गालीली खः।”

60 वं हानं धाल – “छिं धयादीगु खँ जिं मस्यू।” वं अथे धयाच्चंबलय् हे खा हाला हाल।

61 अले प्रभुं लिफः स्वया: पन्नुसयात स्वयादिल। वं प्रभुं धयादीगु खँ लुमंकल – “थौं खा हाले न्ह्यः छं जितः स्वकः तक म्हमस्यू धका: धाइ।”

62 अले व अन चुकं पिने वना: ह्यँय्ह्यँय् ख्वल।

येशूयात गिजय् याना: दा:गु

मत्ती २६:६७-६८; मार्क १४:६५

63 पा: च्वनाच्च्वपिं मनूतय्सं येशूयात गिजय् याना: दाल।

64 इमिसं वयक्:यागु मिखाय् चिना: “का धा सा, छन्त दा:म्ह सु ख:?” धका: धाल।

65 उकथं हे वयक्:यात बेइज्जत याना: य:य:थें धाल।

सभाया न्ह्य:ने येशू

मत्ती २६:५७-६६; मार्क १४:५५-६५; यूह १८:१९-२४

66 सुथय् थकालिपिं, त:धंपिं पुजाहारीत व शास्त्रीत फुक्कं मुन। अले इमिसं येशूयात सभाय् थना: थथे धाल –

67 “छ मुक्ति बीम्ह ख्रीष्ट ख: धयागु जूसा जिमित धा।”

वयक्कलं धयादिल – “जिं धा:सां छिकपिन्सं विश्वास यानादी मखु।

68 अले जिं छुं न्यंसां छिकपिन्सं लिस: बियादी मखु।

69 आवंनिसें मनूया काय् शक्ति दुम्ह परमेश्वरयागु जव ल्हा:पाखे च्वनी।”

70 अले इपिं फुक्कसिनं धाल – “अय्सा छ परमेश्वरया काय् ख: ला?”

वयक्कलं धयादिल – “ख: धका: ला छिकपिन्सं हे धयादिल नि।”

71 अले इमिसं धाल – “थुलि अप्व: मेगु साक्षी हे म्वा:ल। वयागु हे म्हुतुं झीसं न्यनेधुन।”

23

1 अनंलि अन च्वपिं फुक्क मनूत दना: येशूयात पिलातसयाथाय् यंकल।

2 अले इमिसं वयक्:यात थथे धका: पा: यात – “थ्व मनुखं जिमिगु जातियापिं मनूतय्त मखुगु खँ स्यना जूगु, कैसरयात कर पुले मते धका: धयाजूगु व थ:त ख्रीष्ट जुजु ख: धका: धयाजूगु जिमिसं न्यनागु ख:।”

3 अले पिलातसं वयक्:याके न्यन – “छ यहदीतय् जुजु ख: ला?”

वयक्कलं लिस: बियादिल – “छिं हे ख: धका: धयादिल।”

4 अले पिलातसं त:धंपिं पुजाहारीतय्त व मनूतय्गु हुलयात धाल – “जिं ला थ्व मनूयाके छुं हे दोष लुइके मफुत।”

5 अय्न् इपिं थथे धका: झन हाला हल – “गालीलनिसें यहदिया थ्यंक व थननापं थ्व मनुखं स्यनेकने याना: मनूतय्त स्यंकाच्च्वंगु दु।”

येशूयात हेरोदयाथाय् यंकूगु

6 थ्व खँ न्यनाः पिलातसं येशू गालीलयाम्ह खः ला कि मखु धकाः न्यना स्वल।

7 वय्कः हेरोदयागु इलाकाय् लाःम्ह मनू खः धकाः सीकाः वं वय्कःयात हेरोदयाथाय् छवयाबिल। अबलय् हेरोद यरूशलेमय् हे च्वनाच्चंगु दु।

8 वय्कःयात खनाः हेरोद तसकं लय्ताल, छायाधाःसा वं वय्कःयागु बारे न्यनातःगुलि वय्कःयात स्वयेमास्ति वय्काच्चंगु यक्व हे दत। नापं वं वय्कलं अजू चायापुगु चिं यानादीगु स्वयेगु आशा यानाच्चंगु खः।

9 अय्जगुलि वं यक्व खँ न्यना स्वल, तर वय्कलं छुं हे लिसः बियामदी।

10 तःधंपिं पुजाहारीत व शास्त्रीतय्सं वय्कःयात तःधंगु दोष बियाः पाः यात।

11 अले हेरोद व वया सिपाईतय्सं वय्कःयात गिजय् याये फक्व यानाः जुजुयागु थें ज्याःगु लं फिकाः पिलातसयाथाय् तुं लित छवयाहल।

12 उखुन्हुनिसें हेरोद व पिलातस हानं मिलय् जुल। न्हापा इपिं निम्ह मिलय् मजुपिं खः।

येशूयात स्यायेगु फैसला याःगु

मन्ती २७:१५-२६; मर्क १५:६-१५; यूह १८:३९-१९:१६

13 पिलातसं हानं तःधंपिं पुजाहारीत, शासकत व मनूतय्त सःताः

14 धाल – “छिमिसं मनूतय्त स्यंका जुल धकाः थ्व मनूयात ज्वनाः जिथाय् हल, अयनं छिमिगु हे न्ह्यःने जिं केरकार याना स्वयां नं छिमिसं पाः याःगु छुं नं दोष जिं लुइके मफुत।

15 हेरोदं नं वयाके छुं हे दोष लुइके मफयाः जिथाय् लिछवयाहल। स्याये हे माय्क ला वं छुं नं याःगु मदु।

16 अय्जगुलि जिं वयात कोरं दायाः त्वःता छवयाबी।”

17 पिलातसं छुत्कारायागु नखःबलय् छम्ह कैदीयात त्वःताछवयेगु चलन यानातःगु दु।

18 इपिं फुक्कं छस्सलं थथे धकाः चिल्लाय् दना हाला हल – “थ्व मनूयात स्यानाछ्व, जिमित बारब्बायात त्वःता बियादिस्।”

19 शहरय् ग्वलमाल याकूगुलि व मनू स्याःगुलि बारब्बायात कुना तःगु खः।

20 येशूयात त्वःताछवयेगु मनं तुनाः पिलातसं हानं छकः इमित ध्वाथुइकल।

21 अयनं इपिं थथे धकाः हाला हल – “वयात कूसय् यख्खानाः स्यानाछ्व, वयात कूसय् यख्खानाः स्यानाछ्व।”

22 अयजूसां स्वकः खुसि नं पिलातसं इमित थथे धाल — “वयात छाया स्यायेगु? वं छुं हे अपराध या:गु मदु। वं स्याये माय्क छुं नं अपराध या:गु जिं लुइके मफुत। अयजूगुलि जिं ला वयात कोरीं दाया: त्व:ता छवयाबी।”

23 इमिसं जिद्दी याना: झन जक तत:सलं “वयात कूसय् यख्खाना: स्यानाछव” धका: हाला हल। थुकथं हाला: हे इमिसं त्याकल।

24 अयजूगुलि पिलातसं इमिसं धा:थें येशूयात स्याके छवयेगु फैसला यात।

25 वं ग्वलमाल याकूमह व ज्यानमारा जूगुलि झ्यालखानाय् कुनात:म्ह बारब्बायात इमिसं प्वंथें त्व:ता छवल। येशूयात धा:सा इमिसं धा:थें स्याकेत ल:ल्हाना बिल।

येशूयात कूसय् यख्खा:गु

मत्ती २७:३२-४४; मार्क १५:२१-३२; यूह १९:१७-२७

26 रोमी सिपाईतय्सं येशूयात यंकाच्चंबलय् छम्ह कुरेनी व:म्ह सिमोनयात ज्वन। थ्व मन् शहरय् वनेत वयाच्चंम्ह ख:। इमिसं वयात कूस क्वबिका: वय्क:यागु ल्यूल्यू ब्वनायंकल।

27 वय्क:या ल्यूल्यू ग्वा: ग्वा: मनूत वयाच्चंगु दु। नुग:पा दादां ह्यँय्ह्यँय् ख्वया वयाच्चंपिं मिसात नं दु।

28 वय्कलं इमिथाय् लिफ: स्वया: धयादिल — “यस्शलेमय् च्वंपिं मिसात, जिगु नितिं ख्वये मते, बरु थ:गु नितिं व थ: मस्तय्गु नितिं ख्व।

29 छायाधा:सा अज्या:गु दिं नं वइतिनि, गुबलय् मनूतय्सं मचा मदुपि, मचा बुइके मलंपिं व मचायात दुरु त्वंके मलंपिं धन्यपिं ख: धका: धाइ।

30 अबलय्

“ ‘मनूतय्सं पहाडयात वना:

“जिमित ल्हा: वा।”

अले डाँडयात —

“जिमित ल्हाना छव”

धका: धाइ।”☆

31 “प्या:गु सिमायात ला मनूतय्सं छवय्कल धा:सा गंगु सिमायागु झन छु जक गति जुइ?”

32 मेपि निम्ह अपराधीतयत् नं वय्कः नाप स्याना छवयेत इमिसं यंकूगु दु।

33 “खप्परे” धाःगु थासय् थ्यंकाः इमिसं वय्कःयात कूसय् नकिं तानाः यख्खायाबिल। अले अपराधीतयत् नं अथे हे यानाः वय्कःया जवय् व खवय् यख्खायाबिल।

34 वय्कलं धयादिल – “बाः, थुमित क्षमा यानादिसँ। थुमिसं छु यानाच्चना धकाः मस्यु।” सिपाईतय्सं चिष्टा तयाः वय्कःयागु वसः इना काल।☆

35 अन लिक्कसं दनाः मनूत स्वयाच्चंगु दु। शासकतय्सं धाःसा वय्कःयात थथे धकाः गिजय् यात – “थ्वं कर्पिन्त ला बचय् यात, थ्व मनू परमेश्वरं हे ल्ययातःम्ह मुक्ति बीम्ह ख्रीष्ट खः धयागु जूसा थःत नं बचय् याये फयेमाःगु खः।”☆

36 सिपाईतय्सं नं वय्कःयात पाउँति त्वंकाः थथे धकाः गिजय् यात –☆

37 “यह्दीतय् जुजु खःसा छं थःत बचय् या।”

38 वय्कःयागु च्वसं – “थ्व यह्दीतय् जुजु खः” धकाः द्रुपं पौ यख्खानातःगु दु।

39 वय्कः नाप यख्खानातःम्ह छम्ह अपराधी नं वय्कःयात थथे धकाः गिजय् यात – “ख्रीष्ट धाःम्ह छ हे मखु ला? छ थः नं बचय् जु जिमित नं बचय् या।”

40 मेम्ह अपराधी धाःसा वयात ब्वःबियाः थथे धाल – “वं थे हे सजौय फयाच्चने मालं नं छ परमेश्वर खनाः मग्याः ला?

41 झीत ला झीसं यानागु ज्या हे अपराध जूगुलि थथे याना तल, अयनं थ्व मनूखं ला छुं मभिंगु ज्या याःगु मदु।”

42 अले वं धाल – “येशू, छि जुजु जुयाः झायादीबलय् जितः नं लुमंकादिसँ।”

43 अले वय्कलं लिसः बियादिल – “जिं छन्त धात्थें धाये – थौं हे छ जि नाप स्वर्गय् वने खनी।”

येशू सीगु

मत्ती २७:४५-५६; मार्क १५:३३-४१; यूह १९:२८-३०

44 अबलय् न्हिनय् बाह्र बजेनिसैं तीन बजे तक देशय् फुक्कभनं खिउँसे च्वना वन।

45 सूर्य खिउँसे च्वना वन। अले देगलय् च्वंगु पर्दा च्वनिसैं क्वथयंक निकू दलाः गुना वन।☆

☆ 23:34 २३:३४ भज २२:१८

☆ 23:35 २३:३५ भज २२:७

☆ 23:36 २३:३६ भज ६९:२१

☆ 23:45 २३:४५ प्रस २६:३१-३३

46 येशू तःसलं थथे धकाः हालादिल – “बाः, जिगु आत्मायात छिगु हे लहातय् लःल्हानाबी।” थथे धयाः वय्कलं प्राण त्वःतादिल।☆

47 रोमी कप्तानं थथे जूगु खनाः परमेश्वरयात तःधंकाः थथे धाल – “धात्थें हे, थ्व मनू ला भिम्ह खः।”

48 अन स्वः वयाच्चपिं मनूतय्सं थ्व खनाः तसकं नुगः मछिकाः छैय् छैय् लिहां वन।

49 वय्कःयात म्हस्यूपिं मनूत व गालीलनिसें वय्कः नाप वःपिं मिसात नं भचा तापाक च्वनाः अन जुयाच्चंगु फुक्क स्वयाच्चंगु दु।☆

येशूयात चिहानय् तःगु

मत्ती २७:५७-६१; मार्क १५:४२-४७; यूह १९:३८-४२

50 योसेफ धाःम्ह छम्ह भिम्ह व धर्मीम्ह मनू खः। व सभाया छम्ह दुजः नं खः।

51 अथे जूसां वं इमिसं येशूयात स्यायेगु ग्वसाः ग्वःबलय् विरोध याःगु खः। व यहूदियाया अरिमाथिया धयाथाय् च्वंम्ह खः। अले व परमेश्वरं राज्य यानादी तिनि धकाः पियाच्चंम्ह खः।

52 आः वं पिलातसयाथाय् वनाः येशूयागु सीम्ह पवन।

53 अले वं सीम्हयात कूसं क्वकयाः भिगु सुति कापतं हिनाः ल्वहँतय् प्वाः खना दय्कातःगु न्हगु चिहानय् यंकाः तल।

54 उखुन्हु तयारीया दिं खः, अले विश्रामबार शुरु जुइत्यंगु खः।

55 गालीलनिसें वय्कः नाप वःपिं मिसात नं योसेफनापं वनाः वय्कःयात तःगु चिहान स्वल। अले सीम्हयात गथे यानाः तल, व नं स्वल।

56 अले इमिसं लिहां वनाः सीम्हय् तयेत माःगु अत्तर व मलम दय्काः थिक्क याना तल। अयनं व्यवस्थाय् च्वया तः थें शबाथ खुन्हु आराम यात।☆

24

सीम्ह येशू म्वानाझाःगु

मत्ती २८:१-१०; मार्क १६:१-८; यूह २०:१-१०

1 आइतबार खुन्हु सुथ न्हापां इपिं मिसात थःपिन्सं दय्कूगु मलम ज्वनाः चिहानय् वन।

2 अन थयंबलय् इमिसं चिहानयागु लुखा प्वाः तिनातःगु ल्वहं चीकातःगु खन।

3 दुने वनाः स्वःवंबलय् इमिसं प्रभु येशूयागु सीम्ह लुइके मफुत।

☆ 23:46 २३:४६ भज ३१:५

☆ 23:49 २३:४९ लूक ८:२-३

☆ 23:56 २३:५६ प्रस २०:१०; व्य

4 अय्जूगुलि इपिं वातां च्वनाच्चंबलय् तसकं थीगु वसतं फिनातःपिं निम्ह मनूत इमिगु लिक्क दं वल।

5 इमिसं ग्यानाः थस्वये तकं मफुत। व मनूतय्सं इमित धाल – “म्वाःम्हय्सित चिहानय् छाया माः वयाच्चनागु?

6 वय्कः थन मदी। वय्कः ला सीम्हं म्वाना वये धुंकल। गालीलिय् दीबलय् वय्कलं छिमित धयादीगु खँ लुमंकी –

7 मनूया काययात पापी मनूतय्गु ल्हातय् लःल्हानाबी, अले वयात क्रूसय् यख्खानाः स्याइ, अय्जूसं स्वन्हु दुखुन्हु हानं सीम्हं म्वाना वइ।”☆

8 अले तिनि इमिसं वय्कलं धयादीगु खँ लुमन।

9 अले चिहानं लिहां वयाः इमिसं अन जूगु फुक्क खँ झिंछम्हय्सित व मेपि फुक्कसितं कनाबिल।

10 थ्व खँ प्रेरिततय्त धाः वःपिं मरियम मग्दलिनी, योअन्ना व याकूबया मां मरियम व इपिं नाप वंपि मेपि मिसात खः।

11 अयनं थ्व खँ प्रेरिततय्त बाखं थें जक जुल, इमिसं थ्व खँय् विश्वास मयाः।

12 पन्हुस धाःसा काचाकाचां दनाः चिहानय् ब्वाँय् वन। अन थय्काः क्वछुनाः दुने स्वःबलय् वं कापः जक अर्थे छखे तयातःगु खन। थ्व खनाः व अजू चायाः लिहां वल।

येशू इम्माउस वनेगु लँय् खनेदय्कः झाःगु

मर्क १६:१२-१३

13 उखुन्हु हे इपिं मध्ये निम्ह मनूत इम्माउस धाःगु गामय् वनाच्चन। थ्व गां यरूशलेमं ११ किलोमिटर ति तापाः।

14 इपिं लँय् अन जूगु खँ ल्हाल्हां वनाच्चन।

15 उबलय् हे येशू लिक्क झायाः इपिं नाप नाप झाल।

16 अयनं इमिसं वय्कःयात खंसां म्हसीके मफुत।

17 वय्कलं इमित धयादिल – “छिपिं लँय् व वं छु खँ ल्हाना च्वनागु?”

अले इपिं तक्क दित। इमिगु ख्वाः खिउँसे च्वं।

18 अले क्लेओपास धाःम्ह मनुखं वय्कःयात लिसः बिल – “थौकन्हय् जुयाच्चंगु अपाय्मछि धंगु खँ मस्यूह ला यरूशलेमय् छि हे जक थें च्वं?”

19 अले वय्कलं धयादिल – “छु खँ?”

☆ 24:7 २४:६-७ मती १६:२१; १७:२२-२३; २०:१८-१९; मर्क ८:३१; ९:३१; १०:३३-३४; लूक ९:२२; १८:३१-३३

इमिसं धाल — “थ्व खँ नासरतयाम्ह येशूयागु खः। वय्कः छम्ह अगमवक्ता खः। वय्कलं परमेश्वर व मनूतयगु न्ह्यःने ततःधंगु ज्याखँ यानादीगु खः।

20 जिमि तःधंगि पुजाहारीत व शासकतय्सं वय्कःयात स्याना छवयेगु फैसला यानाः कूसय् यख्खानाबिल।

21 जिमिसं ला वय्कःयागुपाखें हे इस्त्राएल देश लिफ्याना कायेखनी धकाः मतिइ तयागु खः। थ्व खँ छखे हे तये। थथे जूगु थनिं स्वन्हु दत।

22 “जिमिगु हे पुचःयापि सुं मिसातय्सं धकाः जिमित गजब यानाबिल। सुथ न्हापां इपिं चिहानय् वंबलय्

23 वय्कःयागु सीम्ह लुइके मफुत। इमिसं लिहां वयाः जिमित ‘येशू सिनाः म्वाना वये धुंकल’ धकाः धाःपिं स्वर्गदूत नं खना धकाः धाल।

24 जिमिगु पुचलय् च्वंपिं हे मनूत चिहानय् वनाः स्वःवंबलय् नं व मिसातय्सं धाःथें हे खन, वय्कःयात धाःसा मखं।”

25 अले वय्कलं धयादिल — “छिपिं ला मूर्ख मनूत जुयाच्चन खनी। अगमवक्तातय्सं धाःगु फुक्क खँय् विश्वास यायेत छिमिसं थाकु चायाच्चन।

26 छु मुक्ति बीम्ह ख्रीष्टं थथे दुःख सियाः तिनि तःधं जुइगु मखु ला?”

27 अले वय्कलं मोशानिसें कयाः फुक्क अगमवक्तातय्सं धर्मशास्त्रय् च्वया थकूगु वय्कःयागु हे खँ ध्वाथुइकादिल।

28 वय्कःपिं वनेमाःगु गांया न्ह्यःने थ्यन। वय्कः धाःसा अझ अनं नं तापाक झायादी त्यन।

29 अयनं इमिसं वय्कःयात थथे धयाः कर यात — “खिउँसे च्वनीन, थौं जिपि नाप हे चाहिनादिसैं।” अयजूगुलि वय्कः इपिं नाप हे च्वनादिल।

30 नयेत्यक्काः वय्कलं मरि कयाः सुभाय् बियाः कुचा थलाः इमित इनाबियादिल।

31 थुबलय् हे इमिगु मिखा चाल, अले इमिसं वय्कःयात म्हसिल। अयनं वय्कः इमिगु मिखां तनावन।

32 इमिसं थःथवय् थथे खँ ल्हात — “वय्कलं झीत धर्मशास्त्रयागु खँ ध्वाथुइकादीबलय् झीगु नुगः लसतां चंचं धाःगु मखु ला?”

33 अबलय् हे इपिं अनं दनाः यरूशलेमय् लिहां वन। अन इमिसं झिंछम्ह चेलात व इपिं नाप मुनाच्वंपिं मनूत नापलात। इमिसं इपिं निम्हयसित थथे धाल —

34 “धात्थें हे, प्रभु म्वाना वयादीगु खः खनी। सिमोनयाथाय् खनेदय्कः झाःगु नं खः खनी।”

35 अले इपि निम्हयसिनं नं लैय् जूगु खँ व मरि कुचा थःबलय् वय्कःयात म्हासीके फुगु खँ कन।

येशू चेलातय्थाय् खनेदय्कः झाःगु

मत्ती २८:१६-२०; मर्क १६:१४-१८; यूह २०:१९-२३; प्रे १:६-८

36 इपि थथे खँ ल्हाना च्वंबलय् हे येशू अन खनेदय्कः झाल। अले इमित धयादिल – “छिमित शान्ति दयेमा।”

37 वय्कःयात भूत धकाः मतिइ तयाः इपि तसकं ग्यात।

38 वय्कलं धयादिल – “छिपि छाया ग्यानागु? संका याये मते।

39 जिगु ल्हाः व तुति स्व, जि हे खः, जितः थिया स्व, थ्व जिगु ला व क्वँय्यागु म्हा खः। भूतयाके ला व क्वँय् दइ मखु।”

40 थुलि धयाः वय्कलं थःगु ल्हाः व तुति क्यनादिल।

41 लय्तायाः व छक्क जुयाः इमिसं थ्व खँय् विश्वास तकं याये मफुत। अयज्जुगुलि वय्कलं धयादिल – “छिमिके थन छुं नयेगु दु ला?”

42 अले इमिसं दय्कातःगु न्या बिल।

43 वय्कलं कयाः इमिगु हे न्ह्यःने नयादिल।

44 अले वय्कलं इमित धयादिल – “जिं छिपिनाप दुबलय् जिगु बारे धर्मशास्त्रय् अर्थात मोशाया व्यवस्था, अगमवक्ता व भजनया सफलइ च्वयातःगु फुक्क खँ पूवनेमाः धकाः न्हापा हे धयागु खः।”

45 अले धर्मशास्त्र थुइके फय्केत इमिगु नुगः चाय्काः

46 वय्कलं धयादिल – “मुक्ति बीम्हा ख्रीष्ट सिनाः हानं स्वन्हु दय्काः म्वाना वयेमाः धकाः च्वयातःगु दु।

47 अले ख्रीष्टयागु हे नामं पश्चाताप यानाः पाप क्षमा जुइगु खँ यस्शलेमनिसें फुक्क संसारय् न्येकेमाः।

48 छिपि हे थ्व खँया साक्षी खः।

49 “न्यँ, छिमित जिमि बाःनं बी धकाः धयादीगु छिमिथाय् छवयाहये। अयनं परमेश्वरयागु शक्ति छिमिके मवतले थ्व हे शहरय् पियाच्वँ।”☆

येशूयात स्वर्गय् थकाःगु

मर्क १६:१९-२०; प्रे १:९-११

50 येशू इमित बेथानियाय् ब्वना यंकादिल। अले लहाः ल्हनाः इमित आशिष बियादिल।

51 इमित थथे आशिष बिया च्वँच्चं हे वय्कः इपिं नाप बायावन, अले परमेश्वरं वय्कःयात स्वर्गय् थत यंकादिल।

52 अले परमेश्वरयात तःधंकाः तसकं लयल्यतातां इपिं यरूशलेमय् लिहां वन।

53 अले इपिं न्हियान्तिथं देगलय् मुनाः परमेश्वरया आराधना यानाच्चन।

Newar
Newar: Newar (Bible)

copyright © 2024 Nepal Bible Society and Wycliffe Bible Translators, Inc.

Language: Newar

Contributor: Wycliffe Bible Translators, Inc.

All rights reserved.

2025-05-17

PDF generated using Haiola and XeLaTeX on 19 Dec 2025 from source files
dated 17 May 2025

838cc630-4ccf-5055-be45-10a98a141cc7